

Tuhun vaha nacañyí Lucas sahá Jesucristo

Ndicani Lucas ndavaha nacañyí da tuhun yóho

¹ Sa xíní vahún, Teófilo ña sa cuahá ñayivi ndúcú na cañyí na tá cáa tá ín ña nayaha tañu nde. ² Ta najánañaha na nuú nde tóco ndihi ña nañini na janda mé saha. Mé na yóho cúu ná na naxica nuu nacañan na tuhun vaha saha Jesús nuú ñayivi. ³ Ta cúní ri yehe va cañyí i ña jáchi cuéé cuéé nandaca tuhún i ndaja cáa anda mé saha já ná cuu cañyí víi ndihi i ña nu mún, Teófilo, da quíhvi ndivaha ini i. ⁴ Jáchi cúní ña ná candañ vaha inún ndaja cáa ña ndaa ña najánañaha na nuun.

Cáxi tuhun in tátø Ndióxi ña cacu Juan, da jácandúta ñayivi

⁵ Mé tiempo cán nasacuu Herodes rey nuú na Judea. Ta nasahin in da cúu jutú naní Zacarías. Ta nasacuu da cuénta in táhnda jutú naní Abías. Ta ñájihí da naní ña Elisabet, ña naquixi chichi Aarón, da nasacuu jutú sanahá. ⁶ Mé Zacarías yóho xihin ñájihí da nasacuu na ñayivi naxica ndaa nu Ndióxi. Ta xihin ndinuhu ini na nacaja na ña sáhnda Ndióxi nuú tuhun mé á caja na. Ta ni in tuhún toho ñayivi coó nacuu ñehe íní na cañan núu na saha ná. ⁷ Joo coó toho jahyi na nacacu jáchi coó nacuu canduu jahyi Elisabet cán. Ta mé tiempo já sa nacayatá ndivaha ndíví na.

8 Ta ndaja coo in quivi nanditahan nuú mé táhndá jutú xíca xihin Zacarías cán caja chúun na cuéntá Ndióxi. 9 Tóco ndihi jutú cán nasajíquí na ndá da ná quee vaha ta da cán cacuu da quihvi chiníhmá ini veñuhu cáhnu ndácaan ñuu Jerusalén cán. Ta naquee vaha Zacarías. 10 Ta nani chiníhmá Zacarías cán ini veñuhu já nanditútú ñayivi ndúu na yéhe ñuhu cán ndicahán na Ndióxi. 11 Ta nani chiníhmá Zacarías nu náa cán ndácaan da já nacanáha in tátó Ndióxi nu dá cándichi a xoo cuáha nu náa nu chiníhmá da cán. 12 Tá naxini Zacarías tátó Ndióxi cán, nayihví ndivaha da ta ni co xini da ndia caja da. 13 Joo nandicahan tátó Ndióxi cán xihin dá já nacachi a já:

—A yíhvi tohún, Zacarías jáchi sa naxini johó Ndióxi nuú naxica tahvún nu á. Sahá ña cán quea caja mé á ña ná cacu in jahyi Elisabet, ñajihún. Ta cacún quivi dá cananí da Juan. 14 A juú quiahva cavatún ta cajii inún caja ta loho jan tá ná cacu da. Ta cuahá ga java na cajii íni na caja da tá ná cacu da. 15 Jáchi da cáhnu cacuu jahyún jan nu Ndióxi. A cóho da ni in túhún toho dó xíhi ñayivi xini na xihin. Ta cacuu da in da jándicutú ndaa Ndióxi xihin ínimá yii mé á janda tá cámaní cacu da. 16 Ta mé jahyún jan caja da ña ná ndicó coo cuahá na Israel nu Ndióxi, xitoho na. 17 Ta jihna ñuhú mé Juan cuhun da caja tiahva da ñayivi janda ná quixi mé á chindahá Ndióxi. Tá quiahva nandicutú ndaa ínimá profeta Elías xihin ínimá yii Ndióxi quiahva já ndicutú ndaa ínimá Juan xihin á já ná coo ndée dá caja da ñaha tátuhun nacaja Elías. Ta caja mé Juan ña ná ndique táhan máni ñayivi xihín jahyi na. Ta caja da ña ná coo johó ñayivi sáa

ini já ná caja na ña cún̄i Ndióxi. Quiahva já caja da cacu tiaḥva da ñayivi janda quiahva ná xinu quiví quixi da nasahan Ndióxi tuhun a chindahá a —ñacachi táto Ndióxi cán xih̄in Zacarías.

¹⁸ Anda já nandaça tuhún Zacarías cán táto Ndióxi já ñacachi da já xih̄in á:

—Ndaja caja i candaa ini i á mé a ndaa táhyí coo tá ín cáchún coo jáchi sa ñacayatá ndivaḥa i ta quiahva já ñacayatá ri ñájíhí v̄i —ñacachi Zacarías cán.

¹⁹ Anda já nanducú ñehe táto Ndióxi cán tuhun nu dá já cáchí a já xih̄in dá:

—Yehe cúu Gabriel ta chuun Ndióxi xíca nuu i cája i. Mé a cán nachindahá yehe ña ná quixi i caxi tuhun i ña yóho xuhun. ²⁰ Joo viti sahá ña coo ñacandúsún ña ñacachi i xuhun candoo níhun ña ná a cúu cahun janda quiahva ná xinu quiví cacu jahyún. Sa vaxi quiví coo tá ín ñacachi i xuhun coo —ñacachi táto Ndióxi cán xih̄in dá.

²¹ Joo ndaja coo ñayivi ndíta ndáti yéhe ñuhu cán sa ñacasáhá ndíhi ini na sahá ña sa ñacanahá ta coo Zacarías cán quéta jata véhe. ²² Joo tá ñaqueta Zacarías veñuhu coo ñacuu cahan da ni in túhún tuhun xih̄in ná. Xih̄in ña yóho ñacandaa ini na ña ñaxini da in ñaha ñacaja Ndióxi nu náa ȳi mé á cán. Jandá ndáḥa uun da cúu nuú ña cán jáchi ñacandoo níhi dá.

²³ Ta tá sa najáxinu Zacarías quiví cája chúun da veñuhu cán já ñaquee da cuanúhu dá vehe da. ²⁴ Tá sa ñayaha ña yóho já ñaquee jahyi Elisabet, ñájíhí Zacarías cán. Ta tixi uhun yoo coo ñaquee ña caca nuu ñá. Ta ñacahán ña: ²⁵ “Ñacaja Ndióxi ña yóho

xihín i viti já ná a cándehé ndaa nahá ga ñayivi yehe”, naçahán ña.

Cáxi tuhun táto Ndióxi xihin María ña cacu Jesús

²⁶ Tá naxinu iñu yoo ñúhu jahyi Elisabet cán já nachindahá Ndióxi mé Gabriel, táto mé á in ñuu naní Nazaret ndácaan estado Galilea. ²⁷ Nasahan táto Ndióxi yóho Nazaret naxito nihni a in ñá tacú naní María, ña natiin tuhun in da naní José ña ná tandaha ña xihin dá. Mé José yóho naquixi da chichi David, da nasacomí cuéntá sahá ñayivi Israel sanahá. ²⁸ Nandihvi táto Ndióxi cán nu ín ñá ta já naçachi a já xihin ña:

—Cáhan Ndióxi yehe xuhun, María jáchi cúun in ña ñañehe táhvi nu Ndióxi. Íin Ndióxi xuhun ta naçaja cuaha chága ñamaní xuhun a juú ga xihin java ga najihí —naçachi táto Ndióxi cán xihin ña.

²⁹ Joo tá naxini María táto Ndióxi cán já naçatontó ña táa johó ña ña cáhan mé a cán xihin ña. “Ta ndá cuéntá quea cáhan táto Ndióxi yóho já xihin yo”, naçahán ña. ³⁰ Anda já naçachi táto Ndióxi cán já xihin ña:

—A yíhvi tohún, María jáchi cúun in ña ñañehe táhvi nu Ndióxi. ³¹ Ta viti quee jahyún ta tá sa naçacu a já cacún quivi á ná cananí a Jesús. ³² Mé jahyún jan cacuu a ña cáhnu. Ta cachi ñayivi saha dá ña cacuu da in túhún jini já jahyi Ndióxi, mé á cáhnu nu ndíhi a. Ta mé Ndióxi, xitoho í caja ña ná cacomí jahyún cuéntá sahá ñayivi tá quiahva nasacomí David, da cúu tásáhnu jícó da cuéntá sahá ñayivi. ³³ Quixi da cacomí da cuéntá sahá ñayivi Israel ta anda ama cáa quivi cacomí

da cuénta saha ná —nacachi tátō Ndióxi cán xihin María.

³⁴ Anda já nandaca tuhún María tátō Ndióxi cán já cáchi ña já xihin á:

—Ndaja coo cacu jahyi i ta ni in tuhún toho taa coo ín xihín i —nacachi ña xihín á.

³⁵ Anda já nanducú ñehe tátō Ndióxi cán tuhun nu ña já cáchi a já:

—Ínima yii Ndióxi quéa quixi jándicutú yohó. Ta ndée Ndióxi, mé á cáhnu nu ndíhi a cán cava nuu a yohó tátuhun caja in vico. Saha ña cán quéa tá ná cacu jahyún jan cacuu da in da yii nacaxi Ndióxi caja chúun nu mé á. Ta cachi ñayivi saha dá ña cúu dá in tuhún jiní já jahyi Ndióxi. ³⁶ Ta cáxi tuhun i xuhun ña cacu jahyi Elisabet, ña cúu táhún cán vatí sa nacayatá ña. Ta viti sa naxinu inu yoo núhu jahyi ña, mé ña nacachi ñayivi saha ña a cúu coo jahyi ña. ³⁷ Jáchi Ndióxi cuu caja tóco ndihi ñaha —nacachi tátō Ndióxi cán xihin María.

³⁸ Anda já nacachi María já:

—Ndióxi cúu xitoho i ta ná caja mé á tá quiahva cuni a xihín i. Ná coo tá ín cáchi ndó coo.

Tá nandihí nacachi María cán ña yóho já naquee tátō Ndióxi cán cuahan.

Xíto nihni María Elisabet, ña cúu táhan ña

³⁹ Ta mé tañu quivi já já xínu María nasahan ña in ñuu ndacaan chí yucu cuénta Judea cán. ⁴⁰ Ta tá naquihvi ña vehe Zacarías, yí Elisabet cán já nacahan Ndióxi ña xihín Elisabet. ⁴¹ Ta tá naxini johó Elisabet nacahan Ndióxi María xihín ña chí nacandita ña loho ndacaan tixi Elisabet cán chí ivi laá nandicutú ndaa ña xihín ínima yii Ndióxi.

42 Anda já n̄acayuhú cóhó Elisabet já n̄acachi ñá já xih̄in María:

—Ni in túhún toho najihí cóo n̄acaja máni Ndióxi xih̄in tá quiahva n̄acaja máni á yohó. Ta n̄acaja yii mé á jahyún. 43 Ta cóo saha toho yehe ná quisún yóho, ñá cúú náná xitoho i coto nihnún yehe. 44 Jáchi tá n̄axini johó uun i ña n̄acahan Ndiósun xih̄in i ivi laá n̄acanda jahyi i ini tixi i jáchi n̄acajii íni a. 45 Tahví n̄acuún jáchi n̄acandúsún ña n̄acachi Ndióxi, xitoho í xuhun. Jáchi caja tá caja mé á ña n̄acachi a caja —n̄acachi Elisabet cán xih̄in María.

46 Anda já n̄acachi María já:

Cája cáhnu i Ndióxi, xitoho í xih̄in ínimā i.

47 Ta cájii ndivaha ini i xih̄in ña cája Ndióxi, mé a jácacu yehe.

48 Jáchi n̄andicuhun ini a sahá yehe, ñá ndáhví, ñá cúú in mozo mé á.

Ta cachi ñayivi ndúu viti xih̄in n̄a vaxi quiví canduu ñuyiví yóho ña n̄acaja cuaha Ndióxi ñamaní xih̄in i.

49 Jáchi mé Ndióxi, mé a cuu caja tóco ndihi ñaha n̄acaja cuahá ña náhnu xih̄in i.

Ta yii ndivaha quiví mé á.

50 Ta níi tiempo táhvi ini mé á saha tóco ndihi ñayivi, n̄a cája cáhnu mé á.

51 A juú quiahva náhnu ñaha n̄acaja mé á.

N̄asahnu a nuú n̄a ndíñehe jícó mé.

52 Ta n̄acandaa mé á chuun ndahá da náhnu ta najánuu ndáha mé á da.

Ta n̄andiñehe jícó mé á n̄a najánuu ndáha mé ñuyiví yóho.

53 Ta najándicutú ndaa mé á ñaha nuú na nandimaní ñaha cuxu.

Ta ñacandaa mé á ña ñasacomí na cuicá já ñataxí a ña cán ná quee na cuhun na.

54 Náchindeé a ña Israel, ña cája chúun cuéntá mé á.

Ta coó nandindójó a tahvi ini a saha ná.

55 Jáchi quiahva já ñasahan mé á tuhun a caja anda ama cáa quivi xihin Abraham ta xihín tásáhnú jícó yo, ña ñaquixi chichi mé dá, já ñacachi María cája cáhnú ñá Ndióxi.

56 Ta ñacandoo María ñasahin ñá vehe Elisabet tixi uní yoó. Anda já ñaquee ñá cuanúhu ñá vehe ñá.

Tá ñacacu Juan, da jácandúta ñayivi

57 Tá nandindaa quivi cacu jahyi Elisabet já ñacacu in ta loho. 58 Ta tóco ndihi ñayivi ndúu yati xihin ñá xihín na cúu táhan ñá ñasahan na xíto nihni na ña. Ta cájii íní na jáchi ñacandaa ini na ña ñacaja Ndióxi cuahá ñamaní xihin ña.

59 Ta tá ñaxinu ña loho cán uná quivi já ñasahan na ñachicaan na marca yiquí cuñu a tátuhun ín costumbre na. Ta ñacahán na cananí a Zacarías tá quiahva naní tátá a. 60 Joo já ñacachi Elisabet já:

—A cananí toho da já. Juan va cananí da — ñacachi ñá xihin na cán.

61 Anda já ñacachi na cán já xihin ña:

—Ndá cuéntá quea cananí jahyún já ta ni in túhún toho na vehún coó naní já.

62 Anda já ñacuu ndáha ná nu Zacarías cán ña ndáca tuhún na da ndaja coo cananí ña loho cán.

63 Anda já ñaxica Zacarías cán in tutu nu ná ta já ñacahyí da já: “Juan cananí da.” Tá ñacahvi na

cán ña yóho já ñacatóntó ndihi na. ⁶⁴ Ta chí sa mé hora já ñandicahan tucu Zacarías. Já ñacasáhá ña cája cáhnu da Ndióxi. ⁶⁵ Xihin tóco ndihi ña ñayaha yóho ñacatóntó ndihi ña ñasanduu yati xihin Zacarías cán. Ta níi cúu ñuu válí ñúhu chí yúcu cuéntá Judea cán ñandicuita nuu tuhun saha tóco ndihi ña ñayaha yóho. ⁶⁶ Ta tóco ndihi ña ñaxini johó ña yóho ñacasáhá ndícani ini na sahá. Já ñacasáhá ndáca tuhún táhan na já cáchí xihin táhan na já:

—Ndá ña cacuu ña loho yóho tá ná cuahnu da.

Ñacachi na ña yóho jáchí ñaxini táhyí ña ñamaní náhnu cája Ndióxi xihín ña loho cán.

Cája cáhnu Zacarías Ndióxi

⁶⁷ Anda já ñandicutú ínimá Zacarías, tátá Juan cán xihin ínimá yíi Ndióxi. Já ñacasáhá ña cáhan ña tuhun sahan Ndióxi nu dá cáhan ña. Já ñacachi da já:

⁶⁸ Cáhnu ná cacuu Ndióxi, mé a cúu xitoho ñayivi ñaqui xi chíchi Israel.

Jáchí ñaqui xi a jáca cu a mí, ña cúu cuéntá mé á.

⁶⁹ Ñachindahá Ndióxi mé a jáca cu a mí ná a cúhun yó indayá.

Ta íin ndéé á caja tóco ndihi ña náhnu.

Ta ñaqui xi a chíchi David, ña ñacaja chúun cuéntá Ndióxi sanahá.

⁷⁰ Ta já ñanda sanahá ndivaha ñasahan Ndióxi tuhun a ña caja mé á ña yóho.

Ta já ñajáyaha ña profeta cán tuhun ñacahan Ndióxi nuú ñayivi.

⁷¹ Ña ñacachi mé á quéa jáca cu a mí ndahá ña ihvi yo xihin ndáha ña co cúni mí.

- 72 Ta nacachi a tahvi ini a saha tasáhn̄u jícó yó, na nasanduu sanahá cán.
- Ta a ndíndójó toho mé á sahá tuhun yii nasahan nu ná jachi ña yii cúú tócó ndihi tuhun sahan Ndióxi nuú ñayivi.
- 73 Ña yóho cúú tuhun nacachi Ndióxi jaxinu coo a nuú tá nasahan mé á tuhun a nu Abraham, da nasacuu tasáhn̄u jícó yó cán.
- 74 Ta nacachi mé á xih̄in dá ña jacacu a mí ndahá na co cúni mí ja ná a cayih̄ví yó caja chúun í cuéntá mé á.
- 75 Ta ja ná cacuú ñayivi ndaa, na nandiquiahva mé caja ña cúni mé á tócó ndihi quivi ndúú ñuyívi yóho, nacachi Zacarías nu ndihi ñayivi cán.
- 76 Anda ja nacasáhá da cahan da xih̄in ña loho jahyi da ja cachí da ja xih̄in á:
- Ta yóhó, jahyi a, cachi ñayivi sahun ña cúun in profeta Ndióxi, mé a cúú cahn̄u nu ndihi a.
- Ta jihna ñúhú cuhún jacahún ñayivi ña ná cacu tiahva na ínima ná ndiquehe na mé a chin-dahá Ndióxi vaxi.
- 77 Ta xih̄in ña yóho cuu caxi tuhún xih̄in ñayivi ña caja cahn̄u ini Ndióxi sahá cuachi na.
- Já ná cuu cacu ndaa ínima ná ná a cúhun na indayá.
- 78 Sahá ña quihvi ini Ndióxi mí ta sahá ña táhvi ini mé á saha yó sahá ña cán quea janda indivi nu ín mé á nachindahá a in a cuu chindeé a mí ná ndih̄ví íchí saá cuéntá mé á.
- 79 Jáchi vaxi a jandiyeh̄e a nuú ñayivi ndúu nuú naá ña ná caca na íchi nuú cuu coo vaha ini na xih̄in Ndióxi, nacachi Zacarías xih̄in jahyi loho da.

80 Já načasáhá sáhn̄u ta loho cán cuah̄an da. Ta ndíndacú da xihín ñaha Ndióxi viti. Ta nasahiin da yucú íchí nuú cõ ndúu cuah̄á ñayivi janda quiahva naxinu quiví načasáhá jánaha da nuú na Israel.

2

Tá nacacu Jesús ñuu Belén (Mt. 1:18-25)

1 Ta mé tiempo cán tá nasacomí Augusto cuéntá sahá ñayivi ndúu ñuyiví já nasahnda da chuun ña ná nditaca quiví ndaja táhan ñayivi cómi da cuéntá saha. 2 Ta mé tañu nu cuití tá nanditaca quivi ná já nasacuu Cireneo gobernador estado Siria. 3 Ta tóco ndihi ñayivi nanditahan nu ná cuhun na tá ñuu tá ñuu nuú nacacu tásáhn̄u jícó na ná quee quivi ná. 4 Sahá ña cán quea naquee José ñuu Nazaret cuéntá Galilea cán já nasahan da ñuu Belén ña ndacaan estado Judea nuú nacacu David jáchi naquixi da chichi David. 5 Nasahan María xihin José ñuu Belén quee quivi ná. Mé María yóho cúú ña naxica da cacuu ñájihí da. Ta sa já ñúhu jahyi ná cuah̄an ña ñuu Belén. 6 Ta nani nasanduu na ñuu Belén cán naxinu quiví cacu jahyi María. 7 Ta nacacu jahyi nuú ña. Ta nachitiví ña a ticoto já nachindúhu ña a nu xixáhan quití cán. Mé nu sánduu quití cán nacacu jahyi María jáchi cóo nañehe ná vehe canduu na jáchi sa nacatáñu va vehe nuú canduu ñayivi xinu cõ ñuu Belén cán.

Cáxi tuhun táto Ndióxi xihín na ndáá ndicachi ña nacacu Jesús

8 Nasanduu java na ndáá ndicachi jana ná ñuú yati ñuu Belén cán. 9 Ta in náá cuití nanaha táto

Ndióxi mé á nu ná. Ta chí nandiyihvi ndaa nu ndúu na cán n̄acaja Ndióxi ta nayihví ndivaha na. ¹⁰ Joo nandicahan táto Ndióxi cán xih̄in ná já n̄acachi a já:

—A yíhvi toho ndó jáchi tuhun vaha quéa ñéhe e vaxi i cahan i xih̄in ndo. Ta xih̄in ña yóho cajii ndivaha ini tóco ndihi ñayivi. ¹¹ Jáchi mé quiv̄i víti n̄acacu in a jác̄acu a ndohó nuú cuachi ndó ta mé á cán cúu Cristo, xitoho ndó, ña n̄achindahá Ndióxi cacomí a cuénta saha ndo. Ta n̄acacu a ñuu Belén nuú n̄acacu David sanahá. ¹² Tá ná cuhun ndo cán já cuni ndó ña loho cán catíví a ticoto cándúhu á nu xixáhan quít̄i. Tá ná cuni ndó ña yóho já candaa ini ndó ña cahan i ña ndaa xih̄in ndo —n̄acachi táto Ndióxi xih̄in na ndáá ndicachi cán.

¹³ Ta nani cahan táto Ndióxi cán naxinu coo cuaha chága táto Ndióxi nu iin a cán. Mé táto Ndióxi yóho naquixi na indiví ta cája cáhnu na Ndióxi já cáchí na já:

¹⁴ Cáhnu ná cacuu Ndióxi iin indiví.

Ta ná coo vaha ini tóco ndihi ñayivi ndúu ñuyíví, mé na cájii ini xih̄in ñaman̄i cája Ndióxi xih̄in ná, n̄acachi táto Ndióxi cán.

¹⁵ Ta tá sa nandicó coo táto Ndióxi cán cuahan chí indiví já n̄acasáhá cáchí xih̄in táhan na ndáá ndicachi cán já:

—Cóho quíi yo ñuu Belén candehé yo ña n̄acachi Ndióxi, xitoho í xoh̄o ña n̄acuu ñuu Belén cán.

¹⁶ Já xínu na nasahan na ta tá naxinu coo na cán já nandinehe ná María xih̄in José xih̄in mé ña loho cándúhu nu xixáhan quít̄i cán. ¹⁷ Anda já n̄acasáhá nandicani na ndáá ndicachi cán nu ná ña n̄acachi táto Ndióxi xih̄in ná sahá ña loho cán. ¹⁸ Ta chí

cátóntó tóco ndihi ñayivi tá xíni johó na ña ndícani na ndáá ndicachi cán nu ná. ¹⁹ Joo nandicuhun ini María tóco ndihi ña nayaha ta ndícani ini ñá sahá. ²⁰ Tá nandihí já naquee na ndáá ndicachi cán cuahan na. Ta a juú quiahva cája cáhnu na Ndióxi cuahan na saha tóco ndihi ña naxini johó na xihín saha tóco ndihi ña naxini na jáchi nasahiin tá ín nacachi táto Ndióxi cán xihín ná.

Tá ñéhe na lée loho Jesús cuahan na ndiquiahva na cuénta saha mé á veñuhu cáhnu ñuu Jerusalén

²¹ Tá nayaha una quivi nacacu lée jahyi María cán já nachicaan na marca yiquí cuñu a tá quiahva ín costumbre na. Ta nasacu na quivi á cananí a Jesús jáchi quiahva já nacachi táto Ndióxi cán xihín María ña ndítahan cananí a janda tá cámaní cañuhu jahyi ñá.

²² Ta nu ley Moisés, ña nacyhyí da sanahá cáchí a ña tá ná ndihi nacacu jahyi in ñañáha, a cúu quihvi ña veñuhu anda ná yaha sáhdá ley quivi. Ta tá sa nayaha quivi cán já naqueehe María xihín José mé lée loho Jesús cán. Já ñéhe na ña cuahan na ndiquiahva na cuénta sahá nu Ndióxi veñuhu cáhnu ñuu Jerusalén cán. ²³ Nacaja na ña yóho jáchi já cáchí ley nasahnda Ndióxi sanahá: “Tóco ndihi taa valí, na cúu jahyi nuú najihí, ndítahan ndiquiahva na ña nu Ndióxi.” ²⁴ Ta jári najoco na ña sáhdá ley Moisés coo tá nandihí nacacu jahyi na. Ta ña yóho cúu ivi ndiyuu á ivi ndijata.

²⁵ Ta ndaja coo mé tiempo cán nasahiin in dataa naní Simeón ñuu Jerusalén cán. Ta nasacuu da in taa yaha ndivaha, da cája cáhnu Ndióxi. Ta ndáti da xinu coo quivi chindahá Ndióxi in da chindeé

na Israel já ná a ndóho ga ini na. Ta nandicutú ndaa ínima dá xihin ínima yii Ndióxi. ²⁶ Ta mé a cán quéa nacachi xihin dá ña a quiví toho da janda quiahva ná cuni táhyí da Cristo, mé a nasahan Ndióxi tuhun a chindahá a. ²⁷ Ta mé ínima yii Ndióxi ndáca Simeón cuahan da veñuhu mé quivi naxinu María xihin José cán caja na xihin Jesús tá quiahva sáhdá ley Moisés caja na. ²⁸ Tá nandique táhan da xihin ná já natiin da Jesús já nasañehe ndaa da a. Já nacasáhá da cája cáhnu da Ndióxi já cáchí da já:

²⁹ Tátá Ndióxi, sa cuu quiahva ndó ñamaní quivi yaa i viti,

jáchi sa najáxinu coo ndó nuú tuhun ndó, ña nasahan ndó nuú yehe, da cúu mozo ndo.

³⁰ Jáchi naxini i xihín nuú i mé a nachindahá ndó jácacu ndehe.

³¹ Nasacu ndó a ña ná jácacu a ndaja táhan ñayivi.

³² Mé a yóho jándiyehé a nuú na coo naquixi chichi Israel.

Ta saha mé a yóho cahan vaha ñayivi sahá na Israel, na cúu cuéntá mé ndo, nacachi Simeón.

³³ Chí nacatontó José xihin María táa johó na ña cahan Simeón saha Jesús. ³⁴ Tá nandihi naxica tahví Simeón nu Ndióxi saha ná anda já nacasáhá cáchí da já xihin María, náná Jesús:

—Nacaxi Ndióxi taa loho yóho ña ná caja da ná cuhun cuahá na Israel ndoho ini na ta caja da ña ná cacu ínima cuahá na cán. Naquixi da nu Ndióxi joo candají cuaha ná da ³⁵ já náha táhyí ña cáhvi ini in in na cán. Ta yóhó, María tahvi ndivaha inún sahá ña yóho ta cacuu a tátuhun tuxú na machiti ínimun —nacachi Simeón xihin María.

36 Ta mé cán nasah̄iin ri in ñá naní Ana, ñá jáyaha tuhun cáhan Ndióxi nuú ñayivi. Ta nasacuu ñá jahyi da naní Fanuel, da naquixi chichi Aser. Mé Ana yóho nacayatá ña. Tá yúta ñá natandaha ña joo usa laá cuia nasah̄iin ñá xihin yí ña já naxihi da. 37 Ta viti sa naxinu comi jícó comi cuia ín cuaan ña. Ñuu ta ndiví ín tuun ñá veñuhu cája cáhnu ñá Ndióxi. Xíjuhun ñá ta xíca tahví ña nu mé á. 38 Mé hora ín Simeón ndítuhún da xihin María já naxinu coo Ana cán. Ta tá nandihí nandiquiahva ñá ndixahvi nu Ndióxi já nacasáhá cáhan ñá sahá ña loho Jesús cán nuú ñayivi, na ndáti quixi quiví chindahá Ndióxi da chindeé na ñuu Jerusalén. Ta cáchí ñá ña jivi mé Jesús cán queá ndáti na quixi.

Tá nandicó coo na ñuu Nazaret

39 Tá nandihí nacaja José xihin María ña sáhndá ley Moisés cája na cán já cuanúhu na ñuu Nazaret, ña ndácaan estado Galilea cán. 40 Ta mé taa loho Jesús sáhnu da ta ndíndacú da. Ta johó ndíndíchí ga ví jini dá cuahan da. Ta cuahá ndivaha ñamaní cája Ndióxi xihin dá.

Ndácaan Jesús veñuhu cáhnu ñuu Jerusalén

41 Tá nu cuia sahan náná tátá Jesús víco pascua ñuu Jerusalén. 42 Ta tá naxinu Jesús uxu ivi cuia já ndáca táhan mé á xihin ná tá cuahan na víco ñuu Jerusalén cán jáchi já nasah̄iin costumbre ñayivi cája na tañu víco cán. 43 Ta tá sa nayaha víco cán já nandicó coo José xihin María cuahan na. Joo coo naxini na ña nacandoo Jesús ñuu Jerusalén cán. 44 Tañu ñayivi cuaha cán catáhan da vaxi da, nacahan na. Ta tá sa naxinu ní in quiví xíca na cuahan na já nacasáhá ndínducú na da tañu ñayivi

cúu táhan na xihín tañu na xíní táhan xihín ná.
 45 Joo coó nandiñehe ná da. Anda já nandico coo
 tucu na ñuu Jerusalén ndínducú na da.

46 Janda quiví uní ví já nandiñehe ná Jesús ini
 veñuhu cáhnu cán. Caa ín coo da tañu na jánaḥa ley
 Moisés cán. Taa johu da nu cáhan na ta ndáca tuhún
 da na sahá java ga ñaha. 47 Ta chí catóntó tóco
 ndihi ñayivi tá xíní johu na tuhun ndúcú ñehe da
 nuú na jánaḥa ley Moisés cán jáchi náḥa ña ndíchí
 jini dá. 48 Tá naxini María xihín José ña ndácaan
 Jesús tañu na jánaḥa ley Moisés cán já naçatóntó
 na. Anda já naçachi María já xihín Jesús:

—Jahyi maníi. Ndá cuéntá quéa naçajún ña yóho
 xihín nde. Yehe xihín tátún a juú quiahva ndícani
 ini nde xíca nuu nde ndínducú nde yohó —naçachi
 María xihín Jesús.

49 Anda já naçachi Jesús já:

—Ndá cuéntá quéa ndínducú ndó yehe. Á co
 xíní toho ndó ña ndítahan ndihi ini i cája i chuun
 naçahnda tátá i, mé á ín indiví nuú i cája i, vaḥa
 —naçachi Jesús xihín ná.

50 Joo ni María ni José coó naçandaa ini na ña
 naçachi Jesús cán xihín ná.

51 Anda já nandico coo Jesús cuahan xihín ná
 ñuu Nazaret. Ta naçaja da tóco ndihi ña cúní na. Ta
 nandicuhun ini María ña naçaja Jesús ini veñuhu
 cáhnu cán. 52 Ta sáhnu Jesús ta cátaçú ini da cuahan.
 Ta cájii ini Ndióxi xihín ña cája Jesús. Ta quiahva já
 cájii ri ini ñayivi va xihín ña cája da.

3

Cásáhá Juan cáhan da tuhun Ndióxi xihín ñayivi yucú íchí cán

(Mt. 3:1-12; Mr. 1:1-8; Jn. 1:19-28)

¹ Tá naxinu sahun cuja cómi Tiberio cuéntá sahá ñayivi ñuyívi já nasacuu Poncio Pilato gobernador nuú na ndúu estado Judea. Ta da naní Herodes nasacuu gobernador nuú na ndúu estado Galilea. Ta ñani Herodes, da naní Felipe cán nasacuu gobernador nuú na ndúu Iturea xihín nuú na ndúu Traconite. Ta da naní Lisantias nasacuu gobernador nuú na ndúu Abilinia. ² Ta Anás xihín Caifás nasacuu da sacuaḥa nu ndíhi jutú. Mé tiempo cán naḥaḥan Ndióxi xihín Juan, da cúu jahyi Zacarías, mé nu íin da yucú íchí cán. ³ Anda já nayaha Juan ndíjáá ñuu válí ñúhu yuhú yuta Jordán cán. Ta cáxi tuhun da nuú ñayivi ña ndítahan nu ná jándacoo na ña núu cája na já ná caja cáhnu ini Ndióxi sahá cuachi na ta já ná candúta ná. ⁴ Tóco ndihi ña yóho nayaha tá íin naḥachi Isaías tá naḥahí da sanahá: Vaxi quivi tá cahan cóhó in da tañu yucu íchí ta cachi da já:

“Caja tiaḥva ndó íchi nuú quixi xitoho í, ta cuná ndó in íchí ndacú nu mé á ña ná ndihvi a ínima ndo.

⁵ Tóco ndihi ña cúu táhvi ná ndicutú ndihi a. Tóco ndihi yucu xihín xiqui ná ndicava ndaa ndihi a.

Tóco ndihi íchí ndicava ná ndindaḥú ndihi a. Ta íchi ña co íin ndaa nuu ndindaḥú ndihi nu á.

⁶ Ta tóco ndihi ñayivi ndúu ñuyívi cuni na ndá quiahva jácaḥu Ndióxi ñayivi”, já cáchí tutu naḥahí Isaías sanahá ndivaḥa.

⁷ Ta ñacasáhá ñayivi ndái cuu na nu ín Juan ña ná jácandúta da na joo ñacasáhá xójo ndivaha ini da xihín ná já cáchí da já:

—Mé ndó cúú ndó tátuhun coo jáchi cúú ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. ⁸ Xíni ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna. Ta a cáhán ndo ña jácacu Ndióxi ndohó sahá ña cúú ndó na ña quixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cahán i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. ⁹ Mé ndó cúú ndó tátuhun in yíto, dó sa natiin na hacha cuahan na cahnda na. Ta tóco ndihi yíto, dó co sahan cuihi vaha nuu, tahnda do ta quee dó nu ñúhu cayi do. Quiahva já caja rí Ndióxi xihín ndóhó tá co cuni ndó ndicó coo ini ndó nu mé á —ñacachi Juan xihín ñayivi cán.

¹⁰ Anda já ñacasáhá ñayivi cán ndáca tuhún na da já cáchí na já xihín dá:

—Ndía ndítahan nuú nde caja nde.

¹¹ Já cáchí Juan já xihín ná:

—Ndá na ndúu ivi cotó ná quiahva na in a nuú na coo ñaha nuu. Ta ndá na ín ña cuxu ná cahnda java táhan na ña xihín na coo a nuu —cáchí Juan xihín na cán.

¹² Tañu na ñandai cuu cán ñaxinu ri java da játaca jiuhún cuénta impuesto ña candúta dá. Ta ñandaca tuhún da Juan já ñacachi da já:

—Maestro, ndía ndítahan nuú nde caja nde.

¹³ Anda já ñacachi Juan já xihín dá:

—Quehe ndó jiihún nuú ñayivi tá quiahva sáhná ley cuití va quehe ndó —ñacachi Juan xihín da cán.

¹⁴ Ta jári java da cúu soldado nandaca tühún da Juan já ñacachi da já:

—Ta ndehe ri ndía ndítahan caja nde.

Já ñacachi Juan já xihín dá:

—A cándaa ndó ña cómi ñayivi. A jáyihví ndó na sahá ña ná quiahva na ñaha nu ndo. Ta ni a jácojo ndó cuachi jata ná tá coo ñacaja na ña. Ta xini ñúhú coo vaha ini ndó xihín yahvi quéhe ndó sahá chuun cája ndó —ñacachi Juan xihín da cán.

¹⁵ Tóco ndihi ñayivi ndíhi ini na jáchi cúni na candaa ini na ña á mé Juan cúu Cristo, da ñachindahá Ndióxi cacomí cuéntá sahá ñayivi.

¹⁶ Joo nandicahan Juan xihín tóco ndihi ñayivi já ñacachi da já xihín ná:

—Mé a ndaa cája ndúta i ndohó xihín ticuú. Joo vaxi inga da ta da cán cúu da jándicutú ínima ndo xihín ínima yíi Ndióxi ta ña cán cacuu a tátuhun ñúhu cáyi. Ta da cán ín cuaha chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa dá. ¹⁷ Mé da vaxi cán caxi da ñayivi vaha tañu ñayivi quini. Cúu á tátuhun in dataa tá jáxixi da trigo xihín pala já ná quee xehe á já cacu vaha da ña. Ta xehe ñacana cán cuhun a cayí a xihín ñúhu ita ña a ndáhva toho —ñacachi Juan.

¹⁸ Quiahva johu ñacahan Juan nuú ñayivi tá ñacaxi tühun da tühun vaha nu ná. Ta cuahá java ga ñaha cáhan da xihín ná caja na. ¹⁹ Inga ñaha ñacaja da quéa najánani da Herodes, da cúu gobernador jáchi ñasahin Herodes xihín Herodías, ña

cúú ñájíhí ñani da, Felipe. Ta najánani Juan da sahá java ga ña núu ñacaja da. ²⁰ Joo ñacaja jóhó Herodes mé dá ta coó ñaxeen da coo jóho da nu cáhan Juan xihín dá. Ña ñacaja da quéa ñacaja chága da ña núu tá ñachicaan da Juan vecaa.

Tá ñacandúta Jesús

(Mt. 3:13-17; Mr. 1:9-11)

²¹ Tá cámaní ndácaan Juan vecaa, cája ndúta dá ñayivi ta já najácandúta ri da Jesús. Ta nani xíca tahví Jesús nu Ndióxi já ñanuna indiví. ²² Ta ñanuu ínimá yii Ndióxi jata Jesús. Ta ñasacaa ínimá yii Ndióxi yóho tá quiahva cáa in ndijata. Tá ñandihí já ñaxini jóho na ña cáhan in a indiví já ñacachi a já:

—Yóhó cúún jahyi maní i ta cájii ndivaha ini i xuhun —ñacachi a.

Ña yóho cúú quiví na ñasacuu tásáhnú jícó Jesús

(Mt. 1:1-17)

²³ Ñasandacaan Jesús tátuhun oco uxu cuiá tá ñacasáhá jánaḡa tuhun Ndióxi nuú ñayivi. Ta ñacahán ñayivi ña ñasacuu a jahyi José. Ta José cán ñasacuu da jahyi Elí, ²⁴ ta tátá Elí ñasananí Matat. Ta tátá Matat ñasananí Leví. Ta tátá Leví ñasananí Melqui. Ta tátá Melqui ñasananí Jana. Ta tátá Jana ñasananí José. ²⁵ Ta tátá José ñasananí Matatías. Ta tátá Matatías ñasananí Amós. Ta tátá Amós ñasananí Nahum. Ta tátá Nahum ñasananí Esli. Ta tátá Esli ñasananí Nagai. ²⁶ Ta tátá Nagai ñasananí Maat. Ta tátá Maat ñasananí Matatías. Ta tátá Matatías ñasananí Semei. Ta tátá Semei ñasananí José. Ta tátá José ñasananí Judá. ²⁷ Ta tátá Judá ñasananí Joana. Ta tátá Joana ñasananí

Resa. Ta tátá Resa ñasananí Zorababel. Ta tátá Zorababel ñasananí Salatiel. Ta tátá Salatiel ñasananí Neri. ²⁸ Ta tátá Neri ñasananí Melqui. Ta tátá Melqui ñasananí Adi. Ta tátá Adi ñasananí Cosam. Ta tátá Cosam ñasananí Elmodam. Ta tátá Elmodam ñasananí Er. ²⁹ Ta tátá Er ñasananí Josué. Ta tátá Josué ñasananí Eliezer. Ta tátá Eliezer ñasananí Jorim. Ta tátá Jorim ñasananí Matat. ³⁰ Ta tátá Matat ñasananí Leví. Ta tátá Leví ñasananí Simeón. Ta tátá Simeón ñasananí Judá. Ta tátá Judá ñasananí José. Ta tátá José ñasananí Jonán. Ta tátá Jonán ñasananí Eliaquim. ³¹ Ta tátá Eliaquim ñasananí Melea. Ta tátá Melea ñasananí Mainán. Ta tátá Mainán ñasananí Matata. Ta tátá Matata ñasananí Natán. ³² Ta tátá Natán ñasananí David. Ta tátá David ñasananí Isaí. Ta tátá Isaí ñasananí Obed. Ta tátá Obed ñasananí Booz. Ta tátá Booz ñasananí Salmón. Ta tátá Salmón ñasananí Naasón. ³³ Ta tátá Naasón ñasananí Aminadab. Ta tátá Aminadab ñasananí Aram. Ta tátá Aram ñasananí Esrom. Ta tátá Esrom ñasananí Fares. Ta tátá Fares ñasananí Judá. ³⁴ Ta tátá Judá ñasananí Jacob. Ta tátá Jacob ñasananí Isaac. Ta tátá Isaac ñasananí Abraham. Ta tátá Abraham ñasananí Taré. Ta tátá Taré ñasananí Nacor. ³⁵ Ta tátá Nacor ñasananí Serug. Ta tátá Serug ñasananí Ragau. Ta tátá Ragau ñasananí Peleg. Ta tátá Peleg ñasananí Heber. Ta tátá Heber ñasananí Sala. ³⁶ Ta tátá Sala ñasananí Cainán. Ta tátá Cainán ñasananí Arfaxad. Ta tátá Arfaxad ñasananí Sem. Ta tátá Sem ñasananí Noé. Ta tátá Noé ñasananí Lamec. ³⁷ Ta tátá Lamec ñasananí Matusalén. Ta tátá Matusalén ñasananí Enoc. Ta tátá Enoc ñasananí Jared. Ta tátá Jared ñasananí

Mahalaleel. Ta tátá Mahalaleel nasanani Cainán.
³⁸ Ta tátá Cainán nasanani Enós. Ta tátá Enós nasanani Set. Ta tátá Set nasanani Adán. Ta Ndióxi nacavaha Adán.

4

*Xíto ndojó tiñáhá sacuahá Jesús
 (Mt. 4:1-11; Mr. 1:12-13)*

¹ Tá nandihi cán naquee Jesús yuta Jordán. Ta nandicutú ndaa ínima mé á xihin ínima yii Ndióxi ta mé a cán nasandaca Jesús nasahan yucú íchí nuú co ndúu ñayivi. ² Ta cán nasahin Jesús tixi ivi jico quivi ta naxito ndojó tiñáhá sacuahá mé á. Ta tóco ndihi quivi cán coó naxixi a ta tá nandihi já nacasáhá cuico a. ³ Anda já nacachi tiñáhá sacuahá cán já xihin á:

—Tá ta jivi ndusa jahyi Ndióxi cúun, cahnda chuun ña ná nduu yu yóho pan.

⁴ Anda já nanducú ñehe Jesús tuhun nu ri já nacachi a já:

—Já cáchí tuhun Ndióxi: “A juú pan cuití cuxu ñayivi já catacu na, vaha. Xíní ñúhú caja ri na ña sáhná tuhun Ndióxi nu ná já quéa ná cuu catacu na nu Ndióxi”, —nacachi Jesús xihin ri cán.

⁵ Tá nandihi já ndáca tiñáhá sacuahá cán Jesús nasahan ri in jini yucú jicó xihin á já nañaha ri tóco ndihi ñuu ndúu ñuyívi nu á in tóo loho joho.

⁶ Anda já nacachi ri já xihin á:

—Candehé ndaja náhnu cúu ñuu ndúu ñuyívi ta yehe sáhná i chuun nuú ndaja táhan ña ta cuu jasá i ña nu yóhó jachi cuu jasá i ña yo nu cúni mí i jasá i ña. ⁷ Ta quiahva i ña nuun tá ná caxítún nuú i caja cáhnún yehe —nacachi ri xihin á.

8 Joo nanducú ñehe Jesús t_uhun n_u r_i já cáchí a já:

—Satanás, cuáhán caxoo jách_i já cáchí t_uhun Ndióx_i: “In t_uhún Ndióx_i, xitohún ndítahan caja cáhnún ta in t_uhún mé á ndítahan caja ndívún nu_u” —naçachi Jesús xihín tiñáhá sacua_ha cán.

9 Tá nandihi já ndáca tucu tiñáhá sacua_ha cán Jesús na_sa_han rí ñuu Jerusalén xihín á. Ta najánda_a rí a n_u jíco jin_i veñ_uhu cáhnu ndáca_an cán já naçachi rí já xihín á:

—Tá ta jivi ndusa jahyi Ndióx_i cúun jácana mún chí nin_u. 10 Jách_i nuú t_uhun Ndióx_i ndáa in t_uhun ña cáchí a já:

Cahnda Ndióx_i chuun n_u tát_o mé á ña ná candaa na yohó.

11 Ta ndiñehe ndáha ná yohó já quéa ná a ndícue_he sa_hun tá ná cachihin sa_hun xihín yu_u, cáchí t_uhun Ndióx_i —naçachi rí xihín Jesús.

12 Anda já nanducú ñehe Jesús t_uhun n_u r_i já cáchí a já:

—Íin inga tucu nuú naçahyi t_uhun Ndióx_i ta cáchí a já: “A cóto ndojó tohún Ndióx_i, xitohún” —naçachi Jesús xihín rí cán.

13 Ña cán quéa naquee xóo tóo tiñáhá sacua_ha n_u Jesús ta naquee rí cuah_an r_i jách_i coo nañe_he ín_i r_i ndá quiahva coto ndojó chága rí a.

Tá naçasáhá cáxi t_uhun Jesús t_uhun Ndióx_i nuú na estado Galilea

(Mt. 4:12-17; Mr. 1:14-15)

14 Ta ndaja coo nandicó coo Jesús estado Galilea. Ta ín cuahá ndée a jách_i nandicutú ndaa ínima mé á xihín ínima y_i Ndióx_i. Ta ndijáá ñayivi ndúu cán

naçasáhá nā cáhan nā saha mé á. ¹⁵ Ta naçasáhá a jánahā tuhun Ndióxi nuú ñayivi ini veñuhu in in ñuu na. Ta tóco ndihi na cáhan vaha na sahá ña cāja mé á.

Tá nasahin Jesús ñuu Nazaret

(Mt. 13:53-58; Mr. 6:1-6)

¹⁶ Tá nandihí já cuanúhu Jesús ñuu Nazaret nuú nasahnu a. Ta mé quivi ndíquehe ndée ná cán, nasahan mé á veñuhu. Ta nacaja tá quiahva sá caja mé á já nandaca ndichi a cahvi a tuhun Ndióxi nuú ñayivi. ¹⁷ Nasahan nā libro naçahyí profeta Isaías nu á ña ná cahvi a ña nuú nā ndúu veñuhu cán. Ta tá nasuná a libro cán já nandiñehe á nu ndáa ña cáchi a já:

¹⁸ Chútú ndaa ínima i xihin ínima yii Ndióxi, jáchi nacaxi mé á yehe ña ná cuhun i caxi tuhun i tuhun saá ña vaha nuú nā ndahví.

Ta nachindahá mé á yehe ña ná ndaja vaha i nā ín cuéha ini.

Ta nachindahá mé á yehe ña ná caxi tuhun i nuú nā ndúu ndahá tiñáhá sacuahā ndá quiahva caja na queta na ndáha ri.

Ta nachindahá mé á yehe ña ná cuná i nduchú núu nā cuaá já ná cuu candehé nā.

Ta nachindahá a yehe ña ná candaa i ña ndóho ini ñayivi.

¹⁹ Ta nachindahá mé á yehe ña ná cahan i xihin ñayivi ña sa naxinu coo tiempo vaha ndivaha jáchi cúni Ndióxi caja cuahá ñamaní xihin ñayivi, já cáchi ña naçahvi Jesús nuú nā cán.

²⁰ Tá nandihí já nachicaji Jesús libro cán já nandiquiahva mé á ña nuú da cāja chúun veñuhu

cán ta nasacoo a. Na ñúhu veñuhu cán sándehe na nu mé á. ²¹ Sahá ña cán quéa nacachi a já xihín ná:

—Mé quivi viti naxini ndó naxinu coo nuú tūhun nacahyí Isaías sanahá ndivaha —nacachi Jesús xihín na cán.

²² Ta ndijáá ñayivi cán cáhan vaha na saha Jesús ta catóntó na sahá ña ndató ndivaha tūhun cáhan xihín ná. Já nacasáhá ndáca tūhún táhan na já cáchí na já:

—Á a juú da yóho cúu jahyi José cán —cáchí na cáhan xihín táhan na.

²³ Anda já nacachi Jesús xihín na cán já:

—Cája i cuéntá cuni ndó cachi ndó tūhun yóho xihín i: “Yohó, da cúu doctor ndaja vaha jihna mún.” Ta xihín ña yóho cuni ndó cachi ndó xihín i: “Ña náhu naxini johó nde nacajún ñuu Capernaum cán, caja ña mé ñuu mún yóho ná cuni nde.”

²⁴ Anda já nacahan chága Jesús xihín ná já nacachi tucu a já:

—Mé a ndaa ná cahan i xihín ndo ña ni in tūhún toho ñayivi co ndíquehe vaha na profeta mé ñuu da. ²⁵ Mé a ndaa ná cahan i xihín ndo. Tá nasahiin profeta Elías sanahá já nasanduu cuahá ri na cuáan tañu ñayivi Israel ta nandoho ndivaha ini na jáchi naquixi in joco ndeé ndivaha sahá ña coó nacuun javi tixi uni cuia java. ²⁶ Joo coó nachindahá toho Ndióxi Elías ña ná cūhun da chindeé da na ndúu nación Israel cán. Ña nacaja Ndióxi quéa nachindahá a da nuú in ña cuáan nasahiin ñuu Sarepta yati ñuu Sidón cán. ²⁷ Ta quiahva já nasahiin ri tiempo tá nasacuu Eliseo profeta. Mé tiempo cán nasanduu cuahá na nandoho cuehe

táhyi nación Israel cán. Joo in túhún da nandaja vaha da cán, da naní Naamán, da naquixi ñuu tóho naní Siria —nacachi Jesús xihín na cán.

²⁸ Tá naxini johu na ñúhu veñuhu cán ña nacachi Jesús xihín ná já naxojo ndivaha ini na xihín á. ²⁹ Já nandicuïta na xihín á ta natavá na Jesús yuhú ñuu. Ta cán najánda na a jini yucú jícó nu cánúu ñuu cán. Já nacahán na chindahá nihni na a janda ninu. ³⁰ Joo nayaha Jesús cuahan nu ná já naquee a cuahan va.

In da nasandacaan ínimā quini ini
(Mr. 1:21-28)

³¹ Anda já naquee Jesús cuahan ñuu Capernaum, ña ndacaan estado Galilea. Ta cán nacasáhá jánaḥa tuhun Ndióxi nuú ñayivi mé quivi ndíquehe ndée ná. ³² Ta chí catóntó na tá quiahva jánaḥa Jesús nu ná jáchi cahan mé á tátuhun in da íin saḥa cahnda chuun.

³³ Mé ini veñuhu nu ndacaan Jesús jánaḥa cán nasandacaan in dataa, da ndacaan in ínimā quini ini. Já nacayuhú ínimā quini cán nu Jesús já cáchi ri já:

³⁴ —Jándacoo táji ndeḥe, Jesús, da ñuu Nazaret. Ndá cuéntá quea quíhvi nuún xihín nde. A vásún jándihún saḥá nde. Sa xini vaha i yohó ta cándaḥa cáxi ini i ña cúún in da yi nachindahá Ndióxi —nacachi ínimā quini cán xihín Jesús.

³⁵ Anda já nacasáhá Jesús jánani a ínimā quini ndacaan ini dataa cán já nacachi a já xihín ri:

—Caji yuhun ta janí da yóho —nacachi Jesús xihín ri.

Tá nacachi a ja chí najándacava ri quini dataa nuú na cán ja naqueta ri ini da cán. Ta coó nacaja ri ni in ña nuu xihin da. ³⁶ Tocó ndihi ñayivi nasanduu cán nayihví ndivaha na. Ta ja nacasáhá cáchí xihin táhan na ja:

—Ín ndivaha sahá tuhun cáhan Jesús yóho jachí xihin ña cáhan da sáhdá da chuun xihin ndée dá ta tává da ínima quini ta chí quee ri cuahan ri — nacachi xihin táhan na cán.

³⁷ Ta ní cúú ñuu válí cán nandicuíta nuu tuhun saha Jesús.

Ndaja vaha Jesús ña cúu xojo Simón Pedro
(Mt. 8:14-15; Mr. 1:29-31)

³⁸ Anda ja naquee Jesús veñuhu cán ja cuahan vehe in da naní Simón. Tá naxinu a cán ja naquihvi a ini vehe da. Ta naxini a ña quihvi ña cúú xojo Simón cán, ña chícaan cáhni ndee ña. Chí naxica tahvi na nu Jesús ña ná ndaja vahá mé á ña. ³⁹ Anda ja nacayati Jesús nu ña ja nasahnda chuun nuú cuehe cán ña ná quee a. Já nandindaa ña chícaan cáhni á ña chí ivi laá nandicoo ña ja nacasáhá cája ndíví ña ña cuxu na.

Ndaja vaha Jesús cuaha na quihvi
(Mt. 8:16-17; Mr. 1:32-34)

⁴⁰ Tá naqueta nuu candii mé quivi cán ja ñéhe ñayivi na quihvi ndúu nu ná naxinu na nu Jesús. Tá nuú cuehe nasandoho na cán ta tá nachinúu Jesús ndaha á jiní in in na ja nandivaha na nacaja mé á. ⁴¹ Ta cuaha táhan na quihvi cán nacana ínima quini ini na nacaja mé á. Ta tá queta ri quini cán ja cáyuhú cóhó ri nu Jesús ja cáchí ri ja:

—Yóhó cúún in túhún jini já jahyi Ndióxi —cáchi ri xihin Jesús.

Joo najánani Jesús ínima quini cán ta cõ cúnì a quiahva ñamanì ña ná cahan ri jáchi xínì vaha rí cán ña cúú mé á Cristo, da nachindahá Ndióxi cacomí cuéntá sahá ñayivi.

Jánaḥa Jesús tuhun Ndióxi nuú ñayivi ndúu estado Galilea

(Mr. 1:35-39)

⁴² Tá nativi inga quivi itaan já naquee Jesús ñuu cán ta cuahan in nu cáa xóo. Joo nacasáhá ñayivi ndínducú na mé á janda quiahva naxinu na nu ín a jáchi cúnì na caji na nuú á ná a jándacoo a na.

⁴³ Anda já nacachi Jesús já xihin ná:

—Ndítahan nuú i cuhun i caxi tuhun i xihin ñayivi ndúu java ga ñuu ña vaxi quivi cacomí Ndióxi cuéntá saha ná. Jáchi chuun yóho nachindahá Ndióxi yehe vaxi i —nacachi Jesús xihin na cán.

⁴⁴ Chí naxica nuu Jesús jánaḥa tuhun Ndióxi nuú ñayivi ini veñuhu estado Galilea cán.

5

Cája Jesús ña ná cuu tiin cuaha ná tiyacá

(Mt. 4:18-22; Mr. 1:16-20)

¹ In tañu ín Jesús yuhú tañuhú naní Genesaret. Ta a juú quiahva nataca ñayivi chí nacasáhá cándíhi na Jesús jáchi cúnì na cuni johó na tuhun Ndióxi. ² Ta naxini Jesús ivi barco ndíta dó yati yuhú tañuhú cán. Cõó da ñúhu ini dó jáchi sa naquee da tává tiyacá ta yati jin va ndícata da ñúnu dá. ³ Anda já naquihvi Jesús ini in táhan barco

cán, do cúu ñaha Simón. Ta ñacachi Jesús xihin Simón ña ná jácaxicá loho da do. Tá ñandihí já ñasacoo Jesús ini barco já ñacasáhá jánaħa nuú ñayivi janda mé ini barco cán. ⁴ Ta tá sa ñandihí ñacahan xihín ñayivi cán já ñacachi a já xihin Simón:

—Cañehe barco yóho ná cuħun dó xoo nu cúná chága ticui ta jácanún ñúnun tavún tiyacá — ñacachi Jesús xihin dá.

⁵ Anda já ñanducú ñehe Simón tuhun nu Jesús já cáhí da já xihin á:

—Maestro, nini yaa ñuú ñacaja chúun nde ña nducú nde tavá nde tiyacá. Ta coó ñaha ñatavá nde. Joo tá sa cáhí mé ndó já cajú i tá ín cáhí ndo cuħun i jácana i ñúnun i ini tañuhú —ñacachi Simón xihin Jesús.

⁶ Ta tá ñacaja da ña ñacachi Jesús xihin dá já a juú quiahva cuahá tiyacá ñatavá da chí janda ñúnun dá cán ñacasáhá táhnda. ⁷ Anda já ñacuu ndáħa dá nuú java ga da tává tiyacá ñuhu ini inga barco ña ná quixi da chindeé táhan da xihin dá. Anda já ñaquixi da cán chindeé táhan da xihin Simón. Já najacutú da ndíví barco cán xihín tiyacá chí janda nducú cacoo dó cán cahá tañuhú xihín ña cuahá tiyacá ñaquee ini dó. ⁸ Tá ñaxini Simón Pedro cán ña yóho já ñacaxítí da nu Jesús já cáhí da já xihin á:

—A cáyati ndó nuú i, xitoho i jáchí cúu u in taa cája cuachi.

⁹ Já ñacachi Simón jáchí ñayihví da. Ta quiahva já ñayihví da ñachindeé táhan xihin dá cán saħá ña cuaha nahá tiyacá ñatavá da. ¹⁰ Quiahva já

nayihví ri Jacobo xihin Juan, da cúu jahyi Zebedeo. Ndívi da yóho chindeé táhan da xihin Simón cán. Ta já nacachi Jesús já xihin Simón:

—A cáyihví tohún jáchi viti casáhún caca nuún tavún ñayivi tañu cuachi tá quiahva nacajún tá natavún tiyacá ini tañuhú —nacachi Jesús xihin dá.

¹¹ Ña cán quéa tá natavá da cán barco da yuhú tañuhú cán já najándacoo ndihi da ñaha da ta nandico da Jesús.

*Tá nandaja vaha Jesús in da ndóho cuehe táhyi
(Mt. 8:1-4; Mr. 1:40-45)*

¹² Ta ndaja coo ín Jesús in ñuu ta já naxinu coo in da ndóho cuehe táhyi nu á. Ta tá naxini da Jesús já nacaxítí da nu á janda quiahva nacani ndaa nuu dá nu núhu. Já nacasáhá xíca tahví da nu á já cáchí da já xihin á:

—Cuu ndaja vaha ndó yehe, xitoho i tá cúní ndo —nacachi da xihin Jesús.

¹³ Anda já nacani ndaa ndáha Jesús da já nacachi a já:

—Cúní ña ná ndivahún ña cán quéa nandivahún viti —nacachi Jesús.

Tá nacachi Jesús já chí ivi laá nandindaa cuehe táhyi nandoho da cán. ¹⁴ Anda já nasahnda Jesús chuun nu dá ña ná a ndícani da nuú ñayivi sahá ña nacaja xihin dá. Ña nacachi a xihin dá quéa:

—Cuáhán ndacún jánahún mún nuú jutú. Ta ndítahan jocún ñaha nu Ndióxi tátuhun nasahnda ley Moisés sanahá caja na sa nandivaha. Já ná candaa ini ñayivi ña sa nandindaa va cuehe nasandohún —nacachi Jesús xihín da cán.

15 Joo ví ga ví naçasáhá ndícuíta nuu tũhun sahá ña cãja Jesús. Sahá ña cán quẽa táca cuahá ndivaha ñayivi cuni joho na nu cáhan mé á xihín ná. Ta jári táca na jáchi cúni na ña ná ndaja vaha mé á na.

16 Joo tává xoo Jesús mé á xoo nuú coó ñayivi ta cán sã xica tahví a nu Ndióxi.

Ndája vaha Jesús in da naxihi tũchu saha
(Mt. 9:1-8; Mr. 2:1-12)

17 In taũu ndãcaan Jesús ini in vehe jánaħa nuú ñayivi. Taũu na cán naşanduú coo java na fariseo xihín java na jánaħa ley Moisés. Tóco ndihi na cúú ná na naquixi ndijáá ñuu válí ñúhu estado Galilea cán xihín ñuu válí ñúhu estado Judea xihín ñuu Jerusalén viti. Ta náħa Jesús ña ñéhe a ndée Ndióxi jáchi ndivaha ñayivi cãja mé á. 18 Mé hora já naxinu coo java dataa ta ñéhe da in xito loho nu cándúhu in da quihvi, da naxihi tũchu saha. Ta cúni da jáquihvi da da cán ini vehe nu ndãcaan Jesús cán já chindúhu dá da nu Jesús, naçahán da. 19 Joo coó naçuú cãja da quihvi da jáchi nãnditútú ndivaha ñayivi ndúu na yéhe vehe cán. Sahá ña cán quẽa nãndaa da jini véhe já naťavá da teja cándójó cán. Já najãnuu da xito loho nu cándúhu mé da quihvi cán taũu tóco ndihi ñayivi ñúhu ini vehe cán jãnda quiahva naxinu xito da quihvi cán nu ín Jesús.

20 Tá naxini Jesús ña cãndeé ini da ñéhe da quihvi cán mé á já naçachi a já xihín da quihvi cán já:

—Cãdehé. Sa naçaja cáħnu ini i sahá cuachún viti —naçachi Jesús xihín dá.

21 Andã já naçasáhá na jánaħa ley Moisés xihín na fariseo cán cáħán na: “Ndã da cúú da yóho ta ndã cuéntã quẽa ndãja núu da Ndióxi xihín tũhun

cáhan da. Jáchi ni in túhún toho ñayivi a cúu caja cáhnu ini sahá cuachi. In túhún jiní Ndióxi quéa cuu caja cáhnu ini sahá cuachi”, nācāhán nā cán.

²² Joo Jesús sa nācandaā va ini a ña cáhvi ini na cán sahá ña cán quéa nācachi a já xihín ná:

—Ndávaha cáhán ndo já. ²³ Á cáhán ndo ña ihvi chága cachi i xihín da yóho: “Nācāja cáhnu ini i saha cuachún viti.” Á tá coó tá cachi i xihín dá: “Ndicoo ta cuanúhu.” ²⁴ Candehé vaha ndo ná nahā i nu ndo ña ín sahá i, da nāchindahá Ndióxi nduu u ñayivi, caja cáhnu ini i sahá cuachi ñayivi ñuyiví yóho —nācachi Jesús xihín nā cán.

Anda já nācachi tucu a xihín da naxihí tuchu saha cán já:

—Ta viti cáhan i xuhun, cuándacoo ndiquehe xito lohún ta cuanúhu.

²⁵ Tá nācachi Jesús já chí ivi laá nāndicoo da nu ndíhi ñayivi nduu cán jáchi nāndivaha saha dá. Ta nāndiquehe da xito loho da nuú nāsandúhu dá. Anda já cája cáhnu da Ndióxi nāquee da cuanúhu dá vehe da. ²⁶ Ta tóco ndíhi ñayivi nāsanduu cán nācatóntó nā ta nācāja cáhnu na Ndióxi sahá ña nācāja Jesús. Ta a juú quiahva yíhví nā já nācachi na já:

—Ña nāhnu ndivaha va quéa nāxiní quivi viti —nācachi na.

*Cána Jesús in da naní Leví, da cáhan nā Mateo xihín, ña ná caca da xihín á
(Mt. 9:9-13; Mr. 2:13-17)*

²⁷ Tá nāndíhi já nāquee Jesús xíca cuahan. Ta cán nāxini a in da játaca jihún cuéntá impuesto. Mé da yóho naní da Leví ta ín coo da nu sácco nā játaca

jiuhún cuéntá impuesto cán. Anda já nacachi Jesús já xihín dá:

—Naha quí candicun yehe —nacachi a xihín dá.

²⁸ Anda já nandaca ndichi Leví cán ta najándacoo da tóco ndihi ñaha cán ta já nacasáhá ndíco da Jesús xíca da. ²⁹ Tá nandihí já nacavaha Leví in víco cáhnu mé vehe da cán ña caja cáhnu da Jesús. Ta cán nataca cuaha táhan na jataca jiuhún cuéntá impuesto ndúu na vehe da. Ta cuahá ga ñayivi nataca ndúu coo nu mesa cán. ³⁰ Joo na fariseo xihín na jánaha ley Moisés nacasáhá na cáhan núu na sahá na xíca tuun xihín Jesús já nacachi na já:

—Ndá cuéntá quea xíxi ndó xihín na jataca jiuhún cuéntá impuesto ta xihín java ga na caja cuachi —nacachi na cán xihín na xíca tuun xihín Jesús.

³¹ Anda já nanducú ñehe Jesús tuhun nuú na cán já nacachi a já xihín ná:

—Ñayivi ín vaha co xíní ñuhú toho na da caja tátá ñahá joo na quíhvi, na cán cúu na xíní ñuhú da caja tátá ñahá. ³² Ta yehe coó vaxi toho i cana i na sa ín vaha. Vaxi i cana i ñayivi, na caja cuachi ña ná jándacoo na cuachi caja na —nacachi Jesús xihín na cán.

Ndaca tuhún na Jesús ndá cuéntá quea co xijuhun da xíca tuun xihín á

(Mt. 9:14-17; Mr. 2:18-22)

³³ Anda já nacasáhá ndaca tuhún tucu na Jesús já cáchí na já xihín á:

—Xíní nde ña xíca tahví ndivaha va na nasaxíca tuun xihín Juan ta jári xijuhun ndivaha va na cán.

Ta quiahva já cája na fariseo. Joo na xíca tuun xihin yóhó jan ní tiempo xíxi na pan ta xíhi na vino. Ndá cuéntá quéa cája na já —nacachi na cán xihin Jesús.

³⁴ Anda já nanducú ñehe Jesús tuhun nu ná já cáchí a já xihin ná:

—Cúú á tátuhun tá cája na víco tándaha ta ín va mé da tándaha cán xihin ná já quéa co ndítahan nu ná cajuhun na. Quiahva já ín ri xihín yehe va. Coó saha cajuhun na xíca tuun xihín i jáchi ín vi xihin ná viti. ³⁵ Joo vaxi quivi ndindaa i nuú na yóho. Anda já casáhá na yóho cajuhun na —nacachi Jesús xihín na cán.

³⁶ Anda já nasacu Jesús quiahva nu ná já nacachi a já xihin ná:

—Ni in túhún toho ñayivi co sáhdá na in túhun jáhma saá já ndicahmá na in jáhma yatá. Jáchi tá ná caja na já játiví na jáhma saá cán. Ta ni co ndíque táhan vaha in jáhma yatá tá jándaha na ña xihín in túhun jahmá saá. ³⁷ Ta ni in túhún toho ñayivi co táán na vino saá ini in níi yatá. Jáchi tá ná caja na já já quéa jáchndi va vino saá níi yatá cán. Ta xihín ña yóho tivi níi cán ta tivi ri dó cúú vino cán va. ³⁸ Ña ndítahan caja na quéa taán na vino saá ini níi saá já ná cuu cañuhu vaha dó cán ta mé níi co cáhndi a. ³⁹ Ta ni in túhún táhan na xíhi vino yatá co xíca na vino saá coho na jáchi cáchí na ña vaha chága xíhi dó yatá —nacachi Jesús xihín quiahva sácú a nuú na cán.

6

Tá na xíca tuun xihin Jesús tuhun na yucu jiní

trigo quivi ndíquehe ndée ñayivi
(Mt. 12:1-8; Mr. 2:23-28)

¹ In quivi ndíquehe ndée ñayivi nani xíca Jesús cuahan xihín na xíca tuun xihín á já nayaha na tañu nuú naxutu na trigo. Já nacasáhá na cán túhun na yucu jiní trigo cán já tává na trigo já chínihni ndáha ná a ta sáxí na cásahan na. ² Tá naxini java na fariseo cán ña cája na já naxachi na já:

—Ndávaha cája ndó chuun ña co ndítahan caja ndó quivi ndíquehe ndée yo —naxachi na fariseo cán xihín na xíca tuun xihín Jesús.

³ Anda já nanducú ñehe Jesús túhun nu ná já naxachi a:

—Á a ñáha cahvi ndó nuú túhun Ndióxi nu cahan sahá ña naxaja David sanahá tá naxuico da xihín na xíca xihín dá. ⁴ Ña naxaja da cán quéa naquihvi da ini veñuhu Ndióxi ta natiin da pan yii já naxixi da ña ta nasahan da ña nuú na xíca xihín dá ña ná cuxu na. Joo jutú cuití va cúú na ndítahan nuú cuxu ña cán, nduu. ⁵ Ta yehe va, da nachindahá Ndióxi nduu ñayivi in sahá i cahnda i chuun sahá quivi ndíquehe ndée ñayivi —naxachi Jesús xihín na cán.

Tá nandaja vaha Jesús in da nahichi ndáha
(Mt. 12:9-14; Mr. 3:1-6)

⁶ Inga tucu quivi ndíquehe ndée ná já naquihvi Jesús ini in veñuhu ta nacasáhá jánaha nu ná. Ta ini mé veñuhu cán nasandacaan in dataa, da nahichi ndahá cuáha. ⁷ Ta ndaja coo na jánaha ley Moisés xihín na fariseo nání na Jesús sándehe na ña á ndaja vaha mé á da cán quivi ndíquehe ndée

na. Ta xihín ña yóho cáhán na cuu ñehe ínì na jácojo na cuachi jatá. ⁸ Joo sa xini va Jesús ña cáhvi ini na cán. Sahá ña cán quéa ñacachi a já xihín da nahichi ndáha cán já:

—Cuándacoo ta candichi mañnú yóho —ñacachi Jesús xihin dá.

Anda já nandaca ndichi da cán nuú Jesús.

⁹ Anda já ñacasáhá Jesús cáhan xihín java ga na ndúu cán já ñacachi a já xihin ná:

—Cuni johó ndó ná ndaca tuhún i ndohó. Ndía cáhí ley ndítahan caja í mé quivi ndíquehe ndée ñayivi. Á chindeé yo ñayivi á caja í ña núu xihin ná. Á jácací na á cahní yó na —ñacachi Jesús xihin ná.

¹⁰ Anda já nandicoto nihni Jesús nuú ndihi na ñacava nuu ndúu xihin á cán. Ta ñacachi a já xihin da nahichi ndáha:

—Jándaca ndáhun.

Ta tá najandaca da cán ndáha dá chí ivi laá nandivaha ndáha dá. ¹¹ Joo tóco ndihi na java ndúu cán ñaxojo ndivaha ini na. Já ñacasáhá ndítuhún xihin táhan na ña ndá quéa cuu caja na já ná cuu jándihi na saha Jesús.

*Tá ñacaxi Jesús uxu ivi da cacuu apóstol
(Mt. 10:1-4; Mr. 3:13-19)*

¹² Mé tañu já ñaquee Jesús ñasahan in jini yúcu caça tahví a nu Ndióxi. Ta ní cúu ñuú ñaxica tahví a nu Ndióxi. ¹³ Ta tá sa ñativi já ñacana mé á na xica xihin á. Ta tañu na cán ñacaxi a uxu ivi da cacuu da in táhndá ña cananí apóstol, da chindahá a caca nuu cáhan tuhun Ndióxi. ¹⁴ Ñacaxi a da naní Simón, da ñasacu tucu a quivi cananí Pedro. Ta ñacaxi a da cúu ñani Pedro, da naní

Andrés. Ta naçaxi a Jacobo xihin Juan xihin Felipe xihin Bartolomé ¹⁵ xihin Mateo xihin Tomás xihin Jacobo, da cúu jahyí Alfeo. Ta naçaxi a Simón, da naçica cuénta na cananista. ¹⁶ Ta naçaxi ri a Judas, ñani Jacobo xihin Judas Iscariote, mé da najicó túhún Jesús tá nu ndíhí.

Jánaḥa Jesús nuú cuahá ñayivi
(Mt. 4:23-25)

¹⁷ Tá nandihí nanuu Jesús jiní yúcu xihín na xíca tuun xihín á já naçinu a yojó ndaa naçahin a xihín ná. Ta cán naçanduuri cuahá ndivaha ñayivi táhan na naçixi ndijáá ñuu válí ndúu chí estado Judea xihín na ndúu ñuu Jerusalén xihín na ndúu ñuu Tiro xihín Sidón, ña ndúu yati yuhú tañuhú. Ta tóco ndihí ñayivi yóho naçinu na cuni johó na nu cáhan Jesús. Ta naçinu na jáchi cúní na ña ná ndaja vaha mé á na. ¹⁸ Ta tóco ndihí na naçañuhu ínima quini ini nandaja vaha ri Jesús na jáchi naçavá a ínima quini naçañuhu ini na. ¹⁹ Ta tóco ndihí ñayivi cúní na caní ndaa ndáha ná Jesús jáchi xihín ndéé mé á ndája vaha tóco ndihí na quíhvi.

Jánaḥa Jesús ndá quiaḥva cajji chága iní já ná a cánduu cuéḥayo
(Mt. 5:1-12)

²⁰ Tá nandihí já naçandehé Jesús nuú na xíca tuun xihín á já naçasáhá cáchí a já xihín ná:

—Tahví naçuu ndó, na cándahví jáchi ndóhó cúu na cacomí Ndióxi cuénta saha.

²¹ Tahví naçuu ndó, na cuíco viti ñúhú jáchi ndóhó cacuu na chutú ndaa tá ná ndihí.

Tahví naçuu ndó, na sácu viti jáchi ndóhó cacuu na casáhá cuacu tá nu ndíhí.

22 'Tahví ñacuu ndó tá cándají ñayivi ndohó ta casáhá táxi ña ndohó á cánahá ña xihín ndo. Ta tahví ñacuu ndó tá quéhe núu ña ndohó sahá ña cáhán ña ña cúú ndó ña núu ndivaha. Tá ná caja na tóco ndihi ña yóho xihín ndo sahá ña cándeé ini ndó yehe, ña nachindahá Ndióxi nduu ñayivi, tahví ñacuu ndó. 23 Já quéa ndítahan cájii ndivaha ini ndó mé quivi já jáchi sa ñaxica tahví Ndióxi in ña vaha ndivaha íin indivi quiahva nu ndo. Jáchi tá quiahva cája xíxi ña ñan xihín ndó viti quiahva já ñacaja xíxi ri tásáhnú jíco ña ñan xihín ña ñasacuu profeta sanahá.

24 'Joo ndáhví ñacuu ndó, ña cuicá viti jáchi sa ñacajii ndivaha va ini ndó ñuyíví yóho.

25 'Ndáhví ñacuu ndó, ña ñachutú ndaa viti jáchi ndohó cúú ña quixi tama nuu.

'Ndáhví ñacuu ndó, ña sácú viti jáchi ndohó cúú ña cuacu xihín ña cacuéha ini ndó.

26 'Ndáhví ñacuu ndó tá ná casáhá ñayivi cahan vaha na saha ndo jáchi quiahva já ñacahan vaha tásáhnú jíco ña ñan sahá ña profeta túhún ñasanduu najándahvi ñayivi sanahá.

*Xíni ñúhú quihvi ini ña co cúní mí
(Mt. 5:38-48; 7:12)*

27 'Tóco ndihi ndó, ña xíni joho nu cahan i yóho, ndítahan quihvi ini ndó ña co cúní ndohó. Ta xíni ñúhú caja vaha ndó xihín ndá ña cándají ndohó.

28 Xíni ñúhú caça tahví ndó nu Ndióxi ña ná caja yíi á ña ñachicaan cháhan jata ndo. Ta caça tahví ndó nu Ndióxi sahá ña cánahá xihín ndo. 29 Ta ndá ña ná cani in xoo sajóho ndó, cata ñee ndó inga xoo sajóho ndó nu ná ña ná cani na. Ta tá ná candaa na

jahmá ndeé ndo quiahva ndó ñamaní ña ná quehe ri na cotó ndo tá já cúni na. ³⁰ A cájihnda ndó nuú na xíca ñaha nu ndo. Ta ndá na cándaa ña cúu ñaha ndó, a ndíndaca ndó ña nu ná. ³¹ Tá quiahva cúni ndó caja ñayivi xihin ndo quiahva já ndítahan caja ri ndóhó va xihin ná.

³² Jáchí tá quíhvi ini ndó ñayivi sahá ña quíhvi ri ini na cán ndohó va, ndía vaha cája ndó jáchí quiahva já cája ñayivi quini. ³³ Ta tá cája vaha cuití ndo xihin na cája vaha xihin mé ndó, ndía vaha cája ndó jáchí quiahva já cája ri ñayivi quini va. ³⁴ Ta tá sahan tóo ndó ñaha ndó nuú ñayivi sahá ña cáhán ndo caja na ñamaní xihin mé ndó, ndía vaha cája ndó jáchí quiahva já cája ri ñayivi quini va. ³⁵ Joo ndóhó, xíní ñúhú quíhvi ini ndó na co cúni ndohó. Ta xíní ñúhú caja vaha ndó xihin ñayivi. Ta xíní ñúhú quiahva tóo ndó ñaha ndó ta a cándati ndó ña ná nducú ñehe na cán ña nu ndo. Tá ná caja ndó já já quea ñehe táhvi ndó ña vaha ndivaha caja Ndióxi ta nduu ndó jahyi Ndióxi, mé a cúu Ndióxi cáhnu ndivaha. Jáchí mé Ndióxi cándáhví ini a ndá na co ndíquiahva ndixahvi nu mé á ta cándáhví ri ini a ñayivi quini va. ³⁶ Xíní ñúhú tahnda ini ndó sahá ñayivi tá quiahva táhnda ini Ndióxi saha ná.

*Co ndítahan candehé ndaa yó ñayivi
(Mt. 7:1-5)*

³⁷ A candehé ndaa ndó ñayivi já ná a cája Ndióxi já xihin ndo. A chícaan ndó cuachi jatá inga na já ná a quehe Ndióxi cuénta sahá cuachi mé ndó. Caja cáhnu ini ndó saha ná já ná caja cáhnu ini Ndióxi saha mé ndó. ³⁸ Jasá ndo ñaha nuú ñayivi já ná ñehe ndó ñaha nu Ndióxi. Cúu á tátuhun cája

ñayivi tá jáchutú nā in ndoḥo xihín nuni ta quíji nihni na ndoḥo já ná ndituun a ta jácuYu chága nā nuni já táán nā ña ini a janda quiahva xíta ña yuhú ndoḥo cán. Tá quiahva cája mé ndó xihín ñayivi quiahva já caja Ndióxi xihín ndo jáchi tá cuaha sáhan ndó nuú ñayivi quiahva já cuaha quiahva ri Ndióxi nu ndóhó va —nācachi Jesús xihín nā cán.

³⁹ Tá nandihí já nasacu a quiahva nu ná já nācachi a já:

—A cuú toho caja in ta cuaa candaca da inga da cuaa cuhun da jáchi ndíví já da ndicava da yávi. ⁴⁰ Ni in túhún toho da xíca jácuaha tiaḥva chága nu mé da jánaḥa ñahá cán. Joo tá ná xinu quívi já catiaḥva vaḥa da já candaḥa ini da tóco ndihí ña xíní da najánaḥa ñahá cán.

⁴¹ Jáchi ndá cuéntá quea sándeḥé ndó ña núu cája ñani táhan ndó ta co sándeḥé ndo ndá quiahva náhnu chága ña núu cája mé ndó. Cúu á tátuhun ndácaan in xeḥe loho nduchú núu ñani táhan ndó nani ndácaan in yító ndúhu cáhnu ini nduchú núu ndo. ⁴² Ta tá a cuú cuni ndó yító cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: “Ñani i, ná tavá loho i xeḥe ndácaan nduchú núun jan.” Jándahvi ndó mé ndó xihín ña cája ndó. Xíní ñúhú tavá ndo yító cáhnu ndácaan nduchú núu mé ndó já ná nuna nu ndó cuni vaḥa ndó já ná cuu tavá ndó xeḥe loho ndácaan nduchú núu ñani táhan ndó —nācachi Jesús.

Tá xíní yo cuihi in yító já candaḥa iní ndá yító cúu dó
(Mt. 7:17-20; 12:34-35)

43 Anda já naçasáhá tucu a cáchí já:

—Coó toho yitó vaha cúun cuihi quini nuu. Ta ni coó yitó quini cuu cuun cuihi vaha nuu. 44 Jáchi xihín cuihi cúun nuú in in yitó cándaá iní ndá yitó cúú dó. A vája cúú tuhun sáhndá ñayivi tití ñuhú nuú tohíñú. Ta ni a vája cúú tuhun sáhndá na uva nuú tonáña yúcú. 45 In taa vaha cáhan da ndinuhu ña vaha jáchi ndinuhu ña vaha ñúhu ínimá dá. Ta in taa quini cáhan da ndinuhu ña núu jáchi ña núu queá ndácaan ínimá dá. Jáchi yúhu ñayivi cána tóco ndihi ña nandicutú ñúhu ínimá ná —nacachi Jesús.

*Sácu Jesús quiahva sahá ivi da nacavaha vehe
(Mt. 7:24-27)*

46 Cáhan tucu Jesús já cáchí a já:

—Ndá cuéntá queá cáhan xitoho nahá ndó yehe ta co cája ndó ña sáhndá i nu ndo. 47 Ná cahan i xihín ndó ndaja íin da vaxi nuú i cuni johó da tuhun cáhan i ta cája da ña cáchí i. 48 Cúú dá tátuhun in dataa nacavaha vehe. Tá naçasáhá da tává da sahá vehe da já nasata cúná da já ná chinúu da vehe da jatá tóto. Ta tá nasahnu cuahá yuta já nacani ndaa ñihí ticuúí cán jatá vehe da. Joo coó nandicava vehe da nacaja ticuúí cán jáchi tóyíí cándichi vehe da jatá tóto cán. 49 Joo ndá da xini johó nu cáhan i ta co cája da ña cáchí i, cúú dá tátuhun inga dataa, da nacavaha vehe nu ñúhu uun. Ta coó nasata da nuú nanduxu sahá. Ta tá nasahnu cuahá yuta já nacani ndaa ñihí ticuúí cán jatá vehe da. Ta xihín ña yóho nandicava vehe da ta chí nandihí saha chí uun —nacachi Jesús.

7

Tá nandaja vaha Jesús in da cája chuun nuú in jefe soldado

(Mt. 8:5-13)

¹ Tá nandihí nacaḥan Jesús xihín ñayivi cán já naḡuee a cuaḥan chí Capernaum. ² Mé ñuu Capernaum cán naḡahin in dataa, da sáhdá chuun nuú soldado naquixi ñuu Roma. Mé da yóho naḡahin in mozo da ta quíhvi ndivaha ini da mozo da. Joo ndaja coo mé mozo da yóho quíhvi ndeé da ta janda ja chá quivi da. ³ Tá naxini johó da sáhdá chuun nuú soldado yóho sahá Jesús já naḡchindahá da java na sacuaḡa táhan na naquixi chichi Israel já ná caḡa na ñamaḡi nuú Jesús quixi a ndaja vaha mozo da cán. ⁴ Tá naxinu na cán nuú Jesús naḡasahá xica taḡví ndivaha na nu á já cáchí na já xihin á:

—Ín sahá da sáhdá chuun nuú soldado yóho ña ná chindeé ndó da. ⁵ Jáchi quíhvi ini da tóco ndihí ñayivi ndúu nación Israel ta sa mé da jan cúu da naḡahnda chuun ña ná cavaḡa na veñuhu nde — naḡachi na cán xihin Jesús.

⁶ Anda já naḡuee Jesús cuaḡan xihin ná. Joo tá sa jalóho xinú coo na vehe da sáhdá chuun nuú soldado cán já naḡchindahá da java amigo da nuú Jesús ná caḡan na yuhú nuu da já naḡachi na já:

—A jándihí ndó mé ndó ndihvi ndó vehe e, xitoho i jáchi coó saḡa toho i ña ná ndihvi ndó vehe e. ⁷ Sahá ña cán quea coó naḡahān ndeé ini i cuḡun i ndinducú u mé ndó. Joo janda nu ín ndó jan caḡnda ndó chuun ña ná ndivaha mozo i já ndivaha da. ⁸ Jáchi ndúu java na náhnu cháḡa

sáhndá chuun nuú i. Ta ndúu ri soldado sáhndá ri yehe va chuun nuu. Ta tá chín dahá i in da ña ná cuhun da nu cuni mí i cuhun da ta cuahan da. Ta tá sáhndá i chuun nuú inga da ña ná quixi da nuú i ta vaxi da nuú i. Ta tá sáhndá i chuun nu mozo i ña ná caja da ña sáhndá i ta cája da ña —nacachi na.

⁹ Tá naxini johó Jesús tóco ndihi ña nacahan amigo da sáhndá chuun nuú soldado cán xihin á já nacatontó a xihin dataa cán. Anda já nasandehé a nu tóco ndihi ñayivi ndíco cuahan cán já nacachi a já xihin ná:

—Mé a ndaa ná cahan i xihin ndo ña a ñaha cuni i tañu na Israel in da cándéé cáhnu nahá ini Ndióxi tá quiahva cándéé cáhnu ini da yóho Ndióxi —nacachi Jesús xihin na ndíco jatá cán.

¹⁰ Ta tá nandíco cōo na cúu mozo da sáhndá chuun nuú soldado cán vehe da já naxini na ña sa nandivaha va da nasaquihvi cán.

Tá najánditacu Jesús jahyi in ña cuáan

¹¹ Tá sa nayaha ña yóho já naquee Jesús cuahan chí in ñuu naní Naín xihin na xíca tuun xihin á. Ta a juú quiahva cuahá ñayivi ndíco cuahan. ¹² Tá naxinu cōo a yati yuhú ñuu cán já naxini a ñayivi ñéhe na in ndii cuahan na jánduxu na. Mé ndii cán nasacuu da in túhún já nu náná da, ña cúu ña cuáan. Ta a juú quiahva cuahá ñayivi ñuu cán ndáca táhan xihin ña cuahan na jánduxu na jahyi ñá. ¹³ Tá naxini Jesús ña já natahvi ini a saha ña. Anda já nacachi a já xihin ña:

—A cuácu gaun.

¹⁴ Anda já nacayati Jesús nuú sató ndii cán já nacani ndaa ndáha á do. Anda já nasacuita na

ndójo sató ndii cán. Ta naçahan Jesús xihín da cúu ndii cán já naçachi a já xihín dá:

—Yehe cáhan i xuhun, da tacú, cuándacoo — naçachi Jesús xihín dá.

¹⁵ Anda já nasacoo da nasacuu ndii cán ta naçasáhá da cáhan da. Já nandiquiahva Jesús da nu náná da. ¹⁶ Tá naxini tóco ndihi ñayivi cuahan cán ña naçaja Jesús já yíhví na. Ta naçasáhá na cája cáhnu na Ndióxi já cáhí na já:

—In profeta cáhnu ndivaha cúu da naxinu coo tañu mí yóho viti.

Ta naçachi tucu na:

—Ndióxi quea naxinu coo nu yo ña ná chindee a ñayivi cuéntá mé á —naçachi na.

¹⁷ Ta níi cúu ñayivi cuéntá estado Judea xihín na ndúu yati cán naçandaa ini na sahá ña naçaja Jesús cán.

*Juan, da jácandúta ñayivi, nachindahá da java da xíca xihín dá nu Jesús
(Mt. 11:2-19)*

¹⁸ Ta ndaja coo nañehe Juan, da jácandúta ñayivi, tuhun saha tóco ndihi ña naçaja Jesús yóho jáchi nandicani na xíca xihín Juan ña nu dá. Sahá ña cán quea naçana da ivi táhan da xíca xihín da ¹⁹ já nachindahá da na nu Jesús ña ná ndaca tuhún na mé á á jivi ndusa cúu á Cristo, mé a chindahá Ndióxi cacomí cuéntá sahá ñayivi, á ndítahan candati na inga ga quixi. ²⁰ Tá naxinu na xíca xihín Juan nu ín Jesús já naçachi na já xihín á:

—Da naní Juan, da xíca jácandúta ñayivi, da cán cúu da nachindahá ndehe vaxi nde ndaca tuhún nde ndohó á cúu ndó Cristo, ña chindahá Ndióxi

cacomí cuéntá sahá ñayivi, á ndítahan candati nde inga ga —ñacachi na cán xihin Jesús.

²¹ Mé hora naxinu coo na cán nu in Jesús já naxini na nandaja vaha Jesús cuahá ñayivi quíhvi, na nasandoho tá nuú cuehe. Ta natavá a ínimá quini nasañuhu ínimá java na. Ta cuahá ndivaha na cuaá nandinuna nuu nacaja Jesús. ²² Sahá ña cán quéa tá nanducú ñehe Jesús tuhun nuú na xica xihin Juan cán já nacachi a já xihin ná:

—Cuáhán ndó ndicani ndó nu Juan saha tóco ndihi ña naxini ndó cája i xihin tóco ndihi ña naxini johó ndó cáhan i. Ta ndicani ndó nu dá ña ndínuna nuú na cuaá ta ndícaca na réncó cája i. Ta ndája vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínimá ná. ²³ Tahví nacuu na co jándacoo ña cándéé ini na yehe —ñacachi Jesús xihin ná.

²⁴ Tá naquee na nachindahá Juan cán cuahan na já nacasáhá Jesús cáhan saha Juan nuú ñayivi cán já cáhí a já xihin ná:

—Ndía nacaán ndó cuni ndó tá naqueta ndó nasahan ndó sándehe ndo Juan yucú íhí cán. A juú da cán cúu ta láchá já quíji nuu da tátuhun quíji nuu in tíyoó cája tachí. ²⁵ Ndía naqueta ndó candehé ndó. A juú da cán cúu ta ndíxi jahmá lándá ndivaha. Sa xini vaha ndó ña co ndúu toho da ndíxi jahmá lándá yucú íhí. Ndá da ndíxi jahmá lándá ta cája da ña cuni yiquí cuñu da, mé da cán cúu da ndúu vehe rey cuití va. ²⁶ Ndía nasahan ndó naxini ndó cán. Á coó nasahan ndó cuni johó ndó nu cáhan in da cúu profeta nu ndo. Mé a ndaa

da cán cúú dá in profeta ta íin chága saha dá a juú ga inga profeta nasanduu sanahá. ²⁷ Jáchí mé Juan cúú dá da cáhan tuhun Ndióxi saha tá cáchí a já: Chindahá i in da canuú cuhun nu mún, já ná caja tiahva da íchi nuú quisún, já nacahyi a sanahá.

²⁸ Candehé ndo ná cahan i xihin ndo. Tañu tóco ndihi ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuénta saha ná, vatí cúú ná na coó saha, na cán cúú na cáhnu chága a juú ga Juan —nacachi Jesús.

²⁹ Tá naxini johu tóco ndihi ñayivi ndúu cán ña yóho já nandicuni na ña cája ndaa Ndióxi tóco ndihi ñaha. Na nacahan já cúú na najácandúta Juan ta tañu na cán nasañuhu java ri na játaca jihún cuénta impuesto. ³⁰ Joo na fariseo xihin na janaha ley Moisés, na coó najácandúta Juan cán, na cán cúú na naquehe núu na tóco ndihi ñamaní cúní Ndióxi caja xihin ná. ³¹ Anda já nacachi Jesús já xihin ná:

—Ná cahan i xihin ndó ndaja íin ñayivi ndúu tiempo viti. ³² Cúú ná tátuhun na valí sácoo sájíquí nuú yahvi ta cáyuhú na nuú java ga na valí ndúu cán já cáchí na já: “Nativí nde tótíví nu ndo joo coó naxeen ndó cata sáhá ndo. Ta naxita cuéha ndivaha nde nu ndo ta ni coó nasacu ndó.” ³³ Quiahva já íin ñayivi ndúu tiempo viti jáchí naquixi Juan, da jácandúta ñayivi ta naxijuhun da ta coó naxihi da vino joo nacachi ndó saha dá ña ndácaan ínima quini ini da. ³⁴ Ta tá naxinu yehe, da nachindahá Ndióxi nduu ñayivi ta xíxi i pan ta xíhi i vino já nacasáhá cáchí ndo sahá i ña cúu u in ta ndehé ndivaha ta xíhi ndivaha i. Ta cáchí ndo

ñá cátoó ndivaha i cacuu u amigo na cája cuachi xihín na játaca jiuhún cuénta impuesto. ³⁵ Joo na cúní cándaá ini ña ndaa, na cán cúu na cándaá ini ña cája Juan xihín yehe ña ndaa —ñacachi Jesús xihín na cán.

In Jesús vehe Simón, da cúu fariseo

³⁶ In táhan da fariseo ñacana da Jesús ña ná cuhun a cuxu a vehe da. Anda já nasahan Jesús vehe da já nasacoo a nu mesa. ³⁷ Joo ndaja coo in ñañaña, mé ñá ñuu cán tá ñañehe ña tuhun ña ñaxinu Jesús vehe Simón cán cuxu a já ñaxinu ña xihín in yúyú alabastro, ña ñachutú ndaa xihín síti támi sáhan ñacasaa ña nu Jesús. Mé ñañaña yóho cúu ña in ña cája cuahá cuachi. ³⁸ Ta sácu ña ñacaxítí ña saha Jesús ta xihín ticuij nu ña najácuchu ña sahá. Ta tá ñandihí já najáhichí ña do xihín íj jini ña. Anda já ñatati yuhu ña sahá. Ta ñachojó ña síti támi sáhan cán jata sahá á. ³⁹ Tá ñaxini mé da fariseo, da ñacana Jesús vehe da cán ña yóho já ñacahán da já: “Tá profeta ndusa ná cacuu da yóho ta sa cándaá va ini da ndá ña cúu ña cáni ndaa ndáha saha dá jáchí cúu ña ña cája cuahá cuachi”, ñacahán Simón cán.

⁴⁰ Anda já ñacachi Jesús já xihín da fariseo cán:
—Candehé Simón, cuni johó ná cahan i xuhun
—ñacachi Jesús xihín dá.

Anda já ñacachi Simón cán já xihín Jesús:
—Cahan mé á xihín i, xitoho i —ñacachi da.

⁴¹ Anda já nasacu Jesús in quiahva nu dá já ñacachi a já xihín dá:
—Ñasanduu ivi dataa ta nasayicá da jiuhún nu mé da sáhan too a cán. In da nasayicá uhun ciento

ta inga da nasayicá ivi jico uxu. ⁴² Ta ni in da cán co ndéé da चाहि da ña yicá da sahá ña cán quéa nacaja cáhnu ini da sahan too jihún cán sahá ña yicá ndívi da cán. Ta viti cachún xihín i, Simón, ndá da cáhún tixi ndívi da yóho cacuu da da quihvi ini chága mé da, da nacaja cáhnu ini saha cuéntá ña nasayicá da cán —nacachi Jesús xihín Simón.

⁴³ Anda já nanducú ñehe Simón cán tuhun nu Jesús já nacachi da já xihín á:

—Cája i cuéntá ña quihvi ini chága da nasayicá cuahá jihún cán nu dá —nacachi da.

Anda já nacachi Jesús já xihín Simón:

—Mé a ndaa cáhún —nacachi a.

⁴⁴ Anda já nasandehé Jesús ña nachojó sítí sahá cán já nacachi a já xihín Simón:

—Candehé vaha ñañaha jan, Simón. Naquihvi i vehún joo coo nasahún ticuú ndoo sahá i. Joo ñañaha yóho najácuchu ña sahá i xihín ticuú nu ña. Ta tá nandihí já najáhichí ña sahá i xihín ijí jini ña. ⁴⁵ Ta yóhó, coo natatí yuhún sajóho yehe tá nasaa i vehún. Joo ña yóho, janda nani naquihvi ña vehún tátí yuhu ña sahá i. Ta anda viti ñuhú cája ña a. ⁴⁶ Ta ni coo nachojó tohún sítí jini i tá naxinu i vehún. Joo ña yóho nachojó ña sítí támi sahan sahá i. ⁴⁷ Ta cáhí i xuhun, Simón, ña xihín ña cája ña yóho náha ña mé a ndaa quihvi ini ña yehe jáchi nacaja cáhnu ini i sahá cuachi ña vatí cuahá ndivaha cúú á. Joo ndá na cáhán ña chá cuití va cuachi cája cáhnu ini i saha, na cán cúú ri na chá cuití quihvi ini na yehe —nacachi Jesús xihín Simón.

⁴⁸ Anda já nacasahá cáhí a já xihín ñañaha cán:

—Sa nacaja cáhnu ini i sahá cuachún viti.

49 Ta tóco ndihi java ga na nataca ndúu coo nu mesa vehe Simón cán nacasáhá cáchí xihín táhan na já:

—Ndá ta cúu da yóho jáchi janda cuachi cája ñayivi cája cáhnu ini da saha —nacachi xihín táhan na cán.

50 Anda já nacachi Jesús já xihín ñáñáha cán:

—Nacacu ndaa ínimun jáchi nacandee ínún yehé. Cuanúhu ta a ndícani ga ínún viti —nacachi Jesús xihín ña.

8

Tá java najihí chindeé na Jesús

1 Tá nandihí nayaha ña yóho já nacasáhá Jesús xíca nuu a cuahá ñuu náhnu xihín ñuu válí ña caxi tuhun a xihín ná ña sa nacayati quivi cacomí Ndióxi cuénta saha ná. Ta ndíco ndíhuxu ivi na apóstol cán mé á. 2 Ta nasandaca táhan java ri najihí xihín á, na natavá mé á ínimá quini ini xihín na nandaja vaha mé á nuú cuehe nasandoho na. Tañu najihí yóho nasandacaan ña naní María, ña cáhan na Magdalena xihín. Mé María yóho cúu ña natavá Jesús usa ínimá quini ini. 3 Ta catáhan ri in ña naní Juana cuahan ña xihín na cán. Mé Juana cúu ña ñájihí da naní Chuza, da cómi cuénta saha vehe Herodes. Ta jári in ña naní Susana naxica nuu ña xihín Jesús. Cuaha chága najihí naxica nuu na xihín á ta nachindee ñahá na xihín ña cómi na.

Sácu Jesús quiahva sahá in da sátá tata

(Mt. 13:1-17; Mr. 4:1-12)

4 Naqueta ñayivi cuahá ñuu jáchi cúní na cuni na Jesús. Ta tá sa nataca cuahá ñayivi nu ín Jesús,

naçasáhá cáhan xih̄in ná. Ta nasacu a in quiahva nu ná já nacachi a já xih̄in ná:

5 —In da sátá tata naquee da cuahan da cata da ña. Ta tá sátá da ña cuahan da já nacuyu java ña íchi. Ta tá nayaha ñayivi já nachiníhni saha joho na a ta já naxinu laa nasaxí rí ña. 6 Ta java tata cán nacuyu a tañu yuu. Ta tá nanduta mé tata cán, cama chá nahichi a jáchi íchí ndivaha tañu yuu cán. 7 Ta java ga tata cán nacuyu a tañu tohíñú ta tá nanduta ña já nanditáha ndihi a nacaja tohíñú, dó nasahnu xih̄in á cán. 8 Joo java tata nacuyu a nu ñuhú vaha. Ta tá nasahnu a já najáquee na cuahá ñaha nu á. Janda in ciento tata nacana jatá in in nuú tata cán —nacachi Jesús xih̄in ná.

Ta tá nandihni nandicani Jesús ña yóho nu ná já nacahan cóhó a nu ná já nacachi a já xih̄in ná:

—Ndá ndó, na ín joho, ná cuni joho ndó —nacachi Jesús xih̄in na cán.

9 Anda já naçasáhá na xíca tuun xih̄in á cán ndáca tuhún na mé á ndía cúnj cachi quiahva nacachi a xih̄in ñayivi cán. 10 Ta nanducú ñehe Jesús tuhun nu ná já nacachi a já xih̄in ná:

—Ña coo nacandaa ini ndó jihna, ña cán cándaa ini ndó viti jáchi nasuná Ndióxi xíní túnj ndó cándaa ini ndó ndá quiahva cacomí mé á cuénta sahá ñayivi. Joo sácú u quiahva nuú java ga ñayivi já queá vatí sándehe na joo cúú ná tátuhun na co tívi nuu. Ta vatí xínj joho na, cúú ná tátuhun na jóho jáchi co cándaa ini na ña cáhan i xih̄in ná —nacachi Jesús xih̄in na xíca tuun xih̄in á cán.

Ndícani Jesús ña cúnj cachi quiahva nasacu a nuú na cán

(Mt. 13:18-23; Mr. 4:13-20)

¹¹ Anda já nacachi Jesús já xihín ná:

—Ña yóho cúnj cachi quiahva nasacu u nuú ñayivi yóho: Mé tata cán cúú á yuhú nuú tuhun Ndióxi, ña xíca java na cáhan na xihín ñayivi. ¹² Mé tata ña nandicava íchi cán náha nu yo ndá quiahva ín java ñayivi. Xínj johó na tuhun Ndióxi joo tá nandihí já vaxi tiñáhá sacuahá ta cája rí xihín ná ña ndíndójó na ña já ná a cándúsa na tuhun Ndióxi ña ná a cácu ndaa ínima ná. ¹³ Ta tata ña nandicava tañu yuu cán náha nu yo ña ndúu java ñayivi ta xínj johó na tuhun Ndióxi ta cájji ín na ndíquehe na ña. Joo sahá ña co ñéhe ín yóho á cuhun cúná a sahá ña cán queá chá tiempo cuití va cándúsa na tuhun Ndióxi. Jáchi tá casáhá ndóho ini na sahá tuhun Ndióxi chí jándacoo va na ña. ¹⁴ Ta tata ña nandicava tañu tohíñú cán náha nu yo ña ndúu java ñayivi ta xínj johó na tuhun Ndióxi joo co jándacoo na íchi naxíca na jihna. Ta casáhá ndícani ini na sahá ñaha ñuyíví yóho ta casáhá na catóo na canduu cuahá ñaha cuíca nu ná ta casáhá ndicají ini na caja na ña núu. Sahá ña cán queá cúú á tátuhun tata ña co cána ñaha jáquee na nuu jáchi coó nasahnu na xihín tuhun Ndióxi. ¹⁵ Joo tata ña nandicava nu ñuhú vaha cán náha nu yo ña ndúu java ñayivi ta xínj johó na tuhun Ndióxi xihín ndinuhu ini na ta cája na ña sáhndá a nu ná. Ta sahá ña ndíco cáhnu na Ndióxi ta co jándacoo na mé á sahá ña cán queá cúú ná tátuhun tata nasahan cuahá ñaha ña cuu jáquee na nuu jáchi sáhnu na

xihín tuhun Ndióxi —nācachi Jesús ndícani a nuú nā xíca tuun xihín á cán.

*Sácú Jesús in quiahva sahá in lámpara
(Mr. 4:21-25)*

¹⁶ Ni in túhún toho ñayivi cō ndícahmi na in lámpara ta anda já chíjahvi na jatá xihín in ñaha. Ta ni cō chícaan jehé nā ña tixi xito. Ña cája na quéa chínúu jícó nā ña já ná yehe a nuú nā quíhvi ini vehe cán. ¹⁷ Ni in túhún toho ñaha a cuú coo jehé nahá jáchi xinu quivi já ndáca náha nu á. Ta ni in tuhun nācahan jehé ñayivi a cuú coo jehé nahá jáchi xinu quivi já candaa ini tóco ndihi ñayivi sahá tuhun nasahin jehé cán.

¹⁸ Sahá ña cán quéa ndítahan coo johō vaha ndó nu cáhan i xihín ndo. Jáchi da ín ñaha nuu, ñehe táhvi dá coo chága ñaha nu dá joo da coó ñaha nuu, janda ña loho ín nu dá ndindaa —nācachi Jesús.

*Tá naxinu coo náná Jesús xihín ñani a nu ín a
(Mt. 12:46-50; Mr. 3:31-35)*

¹⁹ Anda já naxinu coo náná Jesús xihín ñani a mé nu ín a cán. Joo coó nācuu cayatí na nu á jáchi a juú quiahva nāchutú ñayivi ndúu na xihín á cán.

²⁰ Anda já nasahan in da caxi tuhun da xihín Jesús já cáchí da já xihín á:

—Jatā véhe cáa ín nánún xihín ñanún ta cahan nā xuhun cúni nā —nācachi da cán xihín Jesús.

²¹ Anda já nācachi Jesús xihín tóco ndihi ñayivi ndúu cán já:

—Ndá nā xini johō tuhun Ndióxi ta cája na ña cáchí a, nā cán cúú ná tátuhun náná i xihín ñani i —nācachi Jesús xihín ná.

Tá najácatáji Jesús tachi xihín tañuhú tá ndícojo do

(Mt. 8:23-27; Mr. 4:35-41)

²² In quiví naquihvi Jesús ini in barco xihín na xíca tuun xihín á. Ta já nacachi a já xihín ná:

—Cóho inga xoo tañuhú yóho.

Anda já naquee na cuahan na. ²³ Ta nani xójo cava na tañuhú cán cuahan na já nanaá ini Jesús naquiji á. Ta in náá cuití naxinu in tachi quini ndivaha nuú tañuhú cán ta nacasáhá ndíndita dó ta jáchutú do ini barco cán. Ta chí iyo ndivaha cáa jáchi cuu cacoo barco cahá ticuú. ²⁴ Anda já nasahan na ndíñehe na Jesús já nacachi na já xihín á:

—Maestro, Maestro. Cácoo barco yo cahá ticuú cuahan do —nacachi na xihín á.

Anda já nandicoo Jesús já nacasáhá jánani a tachi xihín ticuú ndícojo cán. Tá nandihi já najáyaa mé á tachi xihín ticuú chí táji ní uun nacandoo nuú tañuhú cán. ²⁵ Anda já nacachi Jesús já xihín na xíca tuun xihín á:

—Ndaja vaha co cándeé ini ndó yehe —nacachi a.

Joo na cán nayihví na ta nacatontó na. Ta chí jandá ndáca tuhún táhan na já cáchí na já:

—Ndá da cúu dataa yóho ña anda tachi xihín tañuhú cándúsa nu cáhan da —nacachi xihín táhan na cán.

Tá natava Jesús ínimá quini nasañuhu ini in dataa ñuu Gadara

(Mt. 8:28-34; Mr. 5:1-20)

²⁶ Tá nandihi já cuahan na ta naxinu coo na ñundáhyi cuéntá Gadara, ña cándo inga xoo

tañuhú ta ndícoto nihni táhan xihín estado Galilea. ²⁷ Tá nanuu Jesús barco cán já nacayati in dataa, da ñuu Gadara cán nu á. Mé da yóho sa nacannahá ndivaha ñúhu ínimá quini ini da. Ta já cáa vichí láhlá da xíca nuu da. Ta ni cō íin da vehe. Tañu nu jánduxu na ndji cán va íin tuun da. ²⁸ Tá naxini da Jesús nandicava xítí da nu á ta já nacayuhú da já nacachi da já xihín á:

—Ndá cuéntá quea vasún quihvi nuún xihín i. Yóhó cúún Jesús, da cúú in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i.

²⁹ Nacachi da ña yóho xihín Jesús jáchi nacasáhá sáhndá mé á chuun nu ínimá quini cán ña ná quee rí ínimá da cán. Ta cuahá tañu nasatiin rí da. Ta vatí nacató na ndáha dá xihín saha dá xihín cadena joo nasahnda túhún dá ña nacaja rí quini cán. Ta já nacaja rí ña ná cunu da cuhún da chí yucú íchí nuú cō ndúu ñayivi. ³⁰ Nandaça túhún Jesús mé rí quini cán já nacachi a já xihín ri:

—Ndaja nanún.

Anda já nanducú ñehe da cán tuhun nu á já nacachi da já xihín á:

—Legión naní i.

Nacachi da cán ña naní da Legión jáchi cuahá ndivaha rí quini nandihvi rí ini da. ³¹ Ta mé rí quini ñúhu ini da cán naxica tahví rí nu Jesús ña ná a chindahá a rí cuhún rí nu ndúu ínimá ndji. ³² Ta yati in ndica yucu cán nasanduu cuahá ndivaha cóchí xixáhan rí. Saha ña cán quea naxica rí quini cán ñamaní nu Jesús ña ná ndihvi rí ini cóchí ndúu cán. Anda já nasahan Jesús ñamaní nu ri. ³³ Chí naquee rí quini dataa cán cuahan rí já nandihvi

rí ini cóchí cán. Ta tóco ndihi cóchí yóho xínu rí cuahān rí nanuu rí nu ndáyi já najáqueta nuu rí mé rí ini tañuhú cán ta já nacandaa rí ticuij já naxihí rí.

³⁴ Tá naxini mé dataa ndáá cóchí cán ña yóho já naxinu da cuahān da caxi tuhun da ña nayaha yóho nuú ñayivi ñuu Gadara cán xihín nuú java ga na ndúu yati cán. ³⁵ Anda já naqueta ñayivi sándehé na ña nacuu cán. Ta tá naxinu coo na nu ín Jesús cán já naxini na ín coo mé da nasañuhu rí quini ini cán saha Jesús. Ta sa nandaca ndixi da jáhma ta chí sa nandicaxí táhyí ini da. Tá naxini na ña yóho chí nayihví na. ³⁶ Ta na naxini nuú natavá Jesús rí quini ini dataa cán, na cán cúu na nandicani ña nuú na coo naxini cán. ³⁷ Tá naxini johō na ñuu Gadara cán ndaja nasahin já naxica tahví ndihi na nu Jesús ña ná quee a cuhun a jáchí yihví ndivaha na. Sahá ña cán quéa nandihvi tucu Jesús ini barco cán ña ná quee a cuhun a. ³⁸ Joo tá cámaní quee a cuhun a já nacasáhá da naqueta rí quini ini cán xica tahví da nu Jesús ña ná quiahva mé á ñamaní cuhun da xihin á. Joo nasahnda Jesús chuun nu dá ña ná candoo da. Já nacachi a já xihin dá:

³⁹ —Cuanúhu vehún. Ta já ndicanún nuú na vehún ndaja náhnu ñaha nacaja Ndióxi xuhun — nacachi Jesús xihín da cán.

Anda já naquee da cán cuahān da. Já nandicani da nu tóco ndihi na Gadara cán ndaja cáa ña nacaja Jesús xihin dá.

Tá nandaja vaha Jesús jahyi jhí Jairo xihín in ñá

nacani ndaa ndáha jáhma á
(Mt. 9:18-26; Mr. 5:21-43)

⁴⁰ Tá nandicó coo Jesús inga xoo tañuhú cán, a juú quiahva cávatá ñayivi naxinu na ndiquehe na mé á jáchi mé cán nasanduu na ndáti na mé á.

⁴¹ Anda já nacasaá in dataa naní Jairo, da sáhdá chuun veñuhu. Mé Jairo yóho naxinu da nacaxítí da saha Jesús já naxica tahví da nu á ña ná cūhun a vehe da. ⁴² Jáchi xíhi ñá loho cúu jahyi jíhí da ta in já cúu ñá nu dá ta ndácaan ñá tátuhun uxu ivi cuia. Chí naquee Jesús cuahan ta nani xica cuahan vehe Jairo cán a juú quiahva cuahá ñayivi ndico na jatá cuahan na ta chí janda cándíhi na mé á cuahan na.

⁴³ Ta tañu ñayivi cuahan cán ndácaan in ñáñáha ta ndítahví ñi ñá tixi uxu ivi cuia. Ta najándihi ndihi ñá jjuhún ña nuú na cája tátá ñayivi joo ni in na coo nacu caja tátá ñahá. ⁴⁴ Joo nacayati ñá chí jatá Jesús ta natiin ñá yuhu jáhma á. Chí ivi laá nasacuiin ñi ñá cán.

⁴⁵ Anda já nacasáhá Jesús ndáca tuhún a tóco ndihi ñayivi já nacachi a já xihin ná:

—Ndá ndó nacani ndaa ndáha yehe —nacachi a xihin ná.

Joo ni in na coo nasahan tuhun nu á. Saha ña cán quea nacachi Pedro xihin java ga da xica tuun xihin mé á cán já xihin á:

—Maestro, a juú quiahva cándíhi ñayivi mé ndó ta chindahá nihni johó na mé ndó vaxi na ta cáa ga mé ndó ndáca tuhún ndo ndá na nacani ndaa ndáha ndohó —nacachi da cán xihin á.

⁴⁶ Anda já nacachi Jesús já:

—Íin in na nacani ndaa ndáha yehe jáchi nacandaa ini i ña nandivaha in na xihin ndée mí i —nacachi Jesús.

⁴⁷ Joo ndaja coo mé ña nandivaha cán tá naxini ñá ña nacandaa ini Jesús sahá ña nacaja ñá já nandiquiji ninu ñá xihin ña yihví ña ta já naxinu coo ña nacaxítí ña nu Jesús. Ta nu ndíhi ñayivi ndúu cán nacasáhá ña ndícani ñá nu á ndá cuéntá quéa nacani ndaa ndáha ña mé á chí ivi laá nandivaha ñá. ⁴⁸ Anda já nacachi Jesús já xihin ña:

—Jahyi a, nandivahún jáchi nacandúsún yehe. Cuanúhu. Ta a ndícani ga inún —nacachi Jesús xihin ña.

⁴⁹ Ta nani cáhan Jesús xihin ñá cán já naxinu in da naquixi chí vehe Jairo, da sáhdá chuun veñuhu cán. Já nacachi da cán já xihin dá:

—Sa naxihí va jahyi ndó. A jáquihvi ga ndó da xíca jánaha ñayivi jan.

⁵⁰ Joo tá naxini joho Jesús ña nacachi da cán já nacachi a já xihin Jairo:

—A cáyhví tohún. Candúsa cuití vún yehe chí ndivaha va jahyún —nacachi Jesús xihin dá.

⁵¹ Tá naxinu coo Jesús vehe Jairo cán coo naxeen a quiahva ñamani ña ná quihvi ñayivi ini vehe cán xihin á. Na naquihvi xihin á nasacuu Pedro xihin Jacobo xihin Juan xihin tátá mé ñá loho cán xihin náná ña. ⁵² Jandá joho ndíváá ñayivi sácu ndivaha na ndúu na saha ñá loho cán. Anda já nandicahan Jesús xihin ná já nacachi a já:

—A cuácu ndó. Coó naxihí toho ñá loho yóho. Quiji cuití va ñá —nacachi a xihin ná.

⁵³ Joo nacasáhá na cán sácu ndaa na Jesús jáchi xini na ña sa naxihí ñá loho cán ta sa cúu ñá

ndii. ⁵⁴ Anda já natiin Jesús ndáha ñá naxihí cán já naçahan cóhó a xihín ña já naçachi a já:

—Ñá loho, cuándacoo.

⁵⁵ Chí ivi laá nanditacu ñá loho cán já nandicoo ñá. Ta naçahnda Jesús chuun ña ná quiahva na ña cuxu ñá. ⁵⁶ Chí a juú quiahva naçatóntó tátá náná ñá loho cán sahá ña naçaja Jesús. Joo naçahnda Jesús chuun nu ná ña ná a ndícani na nuú ni in ñayivi sahá ña nayaha.

9

Tá naçindahá Jesús ndíhuxu ivi na xíca tuun xihín á ña ná cuhun na caxi tuhun na tuhun Ndióxi nuú ñayivi

(Mt. 10:5-15; Mr. 6:7-13)

¹ Najánditaca Jesús ndíhuxu ivi na xíca tuun xihín á já naçahan ndée nu ná ña ná cuu tavá na tá nuú ínimá quini ñúhu ini ñayivi ta naçahan ndée mé á nu ná ña ná cuu ndaja vaha na tá nuú cuehe ndóho ñayivi. ² Naçahnda Jesús chuun nu ná ña ná caxi tuhun na xihín ñayivi ña sa naçayati quiví cacomí Ndióxi cuéntá sahá ná. Ta naçahnda chuun nu ná ña ná ndaja vaha na na quíhvi. ³ Ta naçachi a já xihín ná:

—A cáñehe ndó ñaha cuhun ndó íchi. Ni garróte ni yátí ni pan ni jiuhún a cáñehe ndó cuhun ndo. In tuhún cotó cañehe ndó cuhun xihín ndo. ⁴ Tá ná xinu coo ndó in vehe, canduu ndó vehe jan janda quiahva ná ndindaa quiví quee ndó cuhun ndo. ⁵ Ta ndá ñuu nuú co cúní na ndiquehe vaha na ndohó, cuáhán quee ndó ñuu jan ta catí ndó ña yácá sahá ndo já ná nahá ña cuahan cuachi na cán jata mé va na —naçachi Jesús xihín ná.

⁶ Andá já naquee na cán cuahan na ta nasahan na naxica nuu na ndijáá ñuu válí. Xíca na cáxi tuhun na nuú ñayivi tuhun vaha cáhan saha Jesús, mé a cuu jácacu ñahá. Ta ndája vaha na na quíhvi.

*Tá naxihi Juan, da nacaja ndúta ñayivi
(Mt. 14:1-12; Mr. 6:14-29)*

⁷ Ta ndaja coo Herodes, da cúu gobernador cán nacandaa ini da saha tóco ndihi ña cája Jesús. Ta chí co xini da ndia cahán da jáchi java na cáchi na xihin dá ña cúu Jesús mé Juan, da najácandúta ñayivi ta viti nanditacu tucu da cáchi java na xihin dá. ⁸ Ta java ri na cáchi na ña cúu Jesús profeta Elías, mé da naxica nuu sanahá ta viti naxinu tucu da nu ná. Ta java na cáchi na ña cúu á in táhan na profeta nasanduu sanahá joo túni quea nanditacu tucu a xíca nuu a, cáchi na. ⁹ Andá já nacachi Herodes já xihin ná:

—Mí yehe cúu da nasahnda chuun ña ná chituhun ná jico da naní Juan cán. Ta co xini ndá da cúu da naní Jesús yóho. Jáchi mé a ndaa xini joho i ña cája cuahá ndivaha da ña náhnu —nacachi Herodes cán.

Ta chí cúni Herodes cuni da Jesús.

*Sáhan Jesús ña cuxu uhun mil tao
(Mt. 14:13-21; Mr. 6:30-44; Jn. 6:1-14)*

¹⁰ Tá nandicó coo na nachindahá Jesús caca nuu cahan tuhun Ndióxi xihin ñayivi cán nu in mé á já nandicani na nu á saha tóco ndihi ña nacaja na nuú nasahan na. Andá já ñéhe Jesús na nasahan na in nu cáa xoo yati chí ñuu Betsaida cán. ¹¹ Joo tá nacandaa ini ñayivi ndá xoo cuahan Jesús já ndico na cuahan na. Ta nandiquehe vaha Jesús na

ta nandicani a nu ná ña sa ñacayati quiví cacomí Ndióxi cuéntá saha ná. Ta nandaja vaha mé á na quíhvi.

¹² Ta tá sa cáhini cuahan já ñacayati ndíhuxu ivi na apóstol cán nu Jesús já ñacachi na já xihín á:

—Cahan ndó xihín ñayivi ná quee na cuhun na ndiquehe ndée ná ta ná nducú na ña cuxu na ñuu válí xihín nuú yati chá yóho nu ndúu ñayivi jáchí coó ñaha mé va nu ndúú yóho —ñacachi na cán xihín Jesús.

¹³ Anda já ñacachi Jesús já xihín ná:

—Mé ndó quiahva ndó ná cuxu na —ñacachi a xihín ná.

Anda já ñacachi na cán já xihín á:

—Uhun víxí pan xihín ivi laá tiyacá cuití va ín nuú nde. Ta ama ná cuhun ri ndehe cueen nde ñaha cuxu tóco ndihi ñayivi ndúu yóho —ñacachi na cán.

¹⁴ Jáchí ñayivi cán cúú ná tátuhun uhun mil taa. Anda já ñacachi tucu Jesús já xihín na xíca tuun xihín á:

—Cacu coo ndó na tá táhnda ivi jico uxu, ivi jico uxu na.

¹⁵ Chí ñasacu coo ndíhuxu ivi na apóstol cán na. ¹⁶ Anda já ñatiin Jesús ndíhuhun pan xihín ndíví tiyacá cán já ñasandehé a chí indiví já nandiquiahva ndixahvi nu Ndióxi sahá ña cán. Tá nandihí já ñasahnda java táhví a ña já ñasahan ña nuú na xíca tuun xihín á cán já nanditahnda ña cuxu ñayivi ndúu cán. ¹⁷ Ta tóco ndihi na ñañehé ñaxixi janda quiahva ñachutú tixi na. Tá nandihí já ñajachutú na uxu ivi toyicá xihín ña ñacandoo ñaxixi ndihi na cán.

Tá náhma Pedro ña cúu Jesús mé a nāchindahá Ndióxi cacomí cuéntá sahá ñayivi (Mt. 16:13-28; Mr. 8:27-9:1)

¹⁸ In tañu tá nācana xóo Jesús xihín nā xíca tuun xihín á ña caca tahví a nu Ndióxi já nandaca tuhún mé á nā já nācachi a já xihín ná:

—Ndá da cáchí ñayivi cúu yehe —nācachi a xihín ná.

¹⁹ Anda já nanducú ñehe nā cán tuhun nu á já nācachi na já xihín á:

—Java ñayivi cáchí nā ña cúu ndó Juan, da najácandúta ñayivi. Ta java na cáchí nā ña cúu ndó profeta Elías. Ta cáchí java ga ví nā ña cúu ndó in táhan profeta nasanduu sanahá, da nanditacu tucu xíca nuu viti —nācachi nā xíca tuun xihín Jesús cán.

²⁰ Anda já nandaca tuhún Jesús nā já nācachi a já xihín ná:

—Ta ndóhó ri ndá da cáchí ndo cúu u —nācachi a xihín ná.

Anda já nācachi Pedro já xihín á:

—Mé ndó cúu Cristo, ña nāchindahá Ndióxi cacomí cuéntá sahá ñayivi —nācachi da xihín á.

²¹ Joo nācachi Jesús xihín nā xíca tuun xihín a ña coto a ndícani na ña yóho nuú ni in túhún ñayivi.

²² Anda já nācachi a já xihín nā cán:

—Yehe cúu u da nāchindahá Ndióxi nduu ñayivi ta ndítahan nuú i ndoho ndivaha ini i. Ta nā sacuahā veñuhu xihín nā sacuahā nuú jutū xihín nā jánahā ley Moisés candají nā yehe ta anda já cahní nā yehe. Joo tá ná xinu uní quivi já nditacu tucu u —nācachi a xihín ná.

²³ Tá nandihí já nacachi tucu a já xihín ndihí na xíca tuun xihín á cán já:

—Ndá na cúní candico yehe ndítahan nu ná ndihí chága ini na sahá yehe a juú ga saha mé ná. Ta ndijáá ní quivi ndítahan coo tiahva na ndoho ini na sahá yehe ta coo caja toho a ná quivi na sahá i. ²⁴ Jáchí ndá na cátóó coo chága ñuyíví yóho ndihí saha ná. Joo ndá na sahan ndeé ini quivi sahá i ñehe táhvi ná catacu na anda ama cáa quivi. ²⁵ Vatí ná quee vaha in na ñuyíví yóho ta cómí na tóco ndihí ñaha ñuyíví joo ndá chuun quea tá nu ndíhí ndihí saha ná indayá. ²⁶ Ndá na cacahan nuu sahá i xihín sahá tuhun vaha cáhan i quiahva já cacahan ri nuu yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán nahá ndaja cáhnu cúu yehe jáchí quixi i xihín ndée Ndióxi ta xihín ndée tátó mé á viti. ²⁷ Mé a ndaa ná cáhan i xihín ndo ña ndúu java na ndíta yóho ta ni a quíví toho na janda quiahva ná xinu quiví cuni na cacomí Ndióxi cuéntá sahá ñayivi —nacachi Jesús xihín na cán.

*Tá nandijama Jesús quiahva cáa
(Mt. 17:1-8; Mr. 9:2-8)*

²⁸ Ta tá nayaha tátuhun una quivi nacachi Jesús ña yóho xihín ná já nandaa jiní in yúcu ña caca tahví a nu Ndióxi. Ta ndáca táhan Pedro xihín Jacobo xihín Juan cuahan na xihín á. ²⁹ Ta nani xíca tahví Jesús nu Ndióxi já nandijama quiahva cáa nuu á. Ta janda jáhma ndíxi a cán nandiyaa cachi ña ta chí a juú quiahva yehe ña. ³⁰ Anda já naxini na ivi taa ndúu da ndítuhún da xihín Jesús.

In da cán cúú Moisés ta inga da cán cúú Elías. ³¹ A juú quiahva ndató ndíyehē ndaa nu ndúu na cáhan na xihín Jesús ta ndítuhún na sahá ña jándoho na ini a ñuu Jerusalén ta já quivi a. ³² Ta vatí cūni cuju Pedro xihín java ga na catáhan xihín dá cán nasandita na. Ta naxini na ndá quiahva cáhnu cúú Jesús xihín da ivi táhan ndúu xihín á cán. ³³ Ta tá naçasáhá cáxicá Moisés xihín Elías cán nu Jesús cuahān na já naçachi Pedro já xihín Jesús:

—Maestro, ndaja vaha cúú á ndúu nde yóho jáchi já cuu cavaha nde uní vehe tiyahvá válí. In a coo mé ndó ta inga coo Moisés ta inga coo Elías — naçachi da.

Joo chí cō xīni mé va Pedro ndía cáa cáhan da. ³⁴ Ta nani cáhan da ndíta na já nanuu in vico jata ná ta najájahví a na. Ta chí naçasáhá yíhví na xíca tuun xihín Jesús cán tá naxini na naçava nuu vico cán na. ³⁵ Andá já naxini johō na cáhan in a tañu vico cán já naçachi a já:

—Da yóho cúú jahyi maní i. Cuni johō ndó nu cáhan da.

³⁶ Tá nandihī naxini johō na ña cáchí a cán já naxini na ña íin in túhún jīni mé va Jesús. Ta mé na xíca tuun xihín á cán naçahiin táji yúhu ná sahá ña naxini na ta coo nandicanī na sahá nuú nī in túhún ñayivi.

Tá nandaja vaha Jesús in taa loho ndácaan ínima quini ini

(Mt. 17:14-21; Mr. 9:14-29)

³⁷ Ta inga quiví itaan tá nanuu Jesús xihín na xíca tuun xihín á jīni yúcu cán já naqueta cuahá ndivaha ñayivi cuahān na ndique táhan na xihín

Jesús. ³⁸ Anda já nandicahan cóhó ndivaha in dataa tañu tóco ndihi ñayivi cán já nacachi da já xihin Jesús:

—Maestro, caja ndó ñamanj candehé loho ndó jahyí i jáchi in túhún jiní já cúu dá nuú i. ³⁹ Ta ndacaan in ínima quini ini da ta tíin rí dá ta cája rí xihin dá ña ná ndahyi cóhó da. Ta cája rí ña ná quivi yihí da ta já cána cuyu chiquiñu yúhu dá. A juú quiahva cája xíxi rí quini cán xihin dá ta chí co cúni rí janí rí da. ⁴⁰ Sa naxica tahví i nuú na xica tuun xihin ndo ña ná tavá na mé rí quini cán joo coo nacuu caja na ña —nacachi da cán xihin Jesús.

⁴¹ Anda já nacachi Jesús já:

—Ndahví nahá nacuu ndó jáchi sa cuahá ndivaha quivi in i xihin ndo ta a ñaha candeé ini ndó yehe. Cúu ndó ñayivi quini ndivaha chí co ndéé ga ini i xihin ña cája ndó. Taxi ndó taa loho jan chóho —nacachi Jesús xihin ná.

⁴² Ta tá cáyati taa loho cán cuahan da nu Jesús já nacaja rí quini cán ña ná ndicava da nu ñúhu ta cán nacaja rí ña ná quivi yihí tucu da. Anda já najánani Jesús rí quini cán já nandivaha taa loho cán ta nandiquiahva mé á da nu tátá da. ⁴³ Ta tóco ndihi ñayivi nasanduu cán nacatontó na tá naxini na ña nahnu cája Ndióxi.

Ta nani catontó na ndúu na sahá ña nahnu cája Jesús cán já nacasahá cahán mé á xihin na xica tuun xihin á. Já nacachi a já xihin ná:

⁴⁴ —Cuni johó vaha ndó ña yóho ta coto a ndíndójó ndó ña. Tiin na yehe, da nachindahá Ndióxi nduu ñayivi ta já ndiquiahva na yehe ndahá java dataa —nacachi Jesús xihin ná.

⁴⁵ Joo ni in táhan na xíca tuun xihín á cán coó naçandaa ini na ndíá cúní cachi Jesús. Jáchi coó nanuna xíní túni ná ña ná candaa ini na ña. Ta yíhví na ndaça tuhún na mé á ña ná ndicani a ña nu ná.

Ndicani Jesús ndá na cúú na ín chága saha
(Mt. 18:1-5; Mr. 9:33-37)

⁴⁶ Tá nandíhi já naçasáhá na xíca tuun xihín Jesús cán ndítuhún xihín táhan na saha ndá da cúú da cáhnu chága tañu mé ná. ⁴⁷ Anda já naçini Jesús ña cáhvi ini na cán já naçiin a in òa loho já naçacu ndichi a da jíin á. ⁴⁸ Já naçachi a já xihín ná:

—Ndá na ná ndiquehe vaaha òa loho yóho sahá ña quíhví ini na yehe, ndiquehe ri na yehe viti. Ta ndá na ndiquehe yehe, ndiquehe ri na tátá j, mé a naçindahá yehe. Ndá na coó saha mé tañu tóco ndíhi ndó, na cán cúú na ín chága saha nu Ndióxi —naçachi Jesús xihín na cán.

Tá ndúu java na ndiquehe saha yo já quea cuahan na xoo í
(Mr. 9:38-40)

⁴⁹ Anda já naçachi Juan já xihín Jesús:

—Maestro, naçini nde in daça ta cáhan da quívi mé ndó já tává da ínima quini ñúhu ini ñayivi. Joo co xíca nuu da xihín yo sahá ña cán quea naçaji nuu nde nu dá caja da ña —naçachi da cán.

⁵⁰ Anda já naçachi Jesús já xihín dá:

—A cájé nuu ndó nu dá sahá ña cája da ña. Jáchi ndá da co ndíndita caja xíxi xoho, mé da cán cuahan da xoo mí —naçachi Jesús.

Jánaçi Jesús Jacobo xihín Juan

⁵¹ Tá naçayati quiví ndindita Jesús cuḥun a indiví coó nayihví a quehe a íchi cuḥan chí ñuu Jerusalén. ⁵² Naçindahá Jesús java na xíca xihin á ña ná cuḥun cuéé na in ñuu loho ndácaan estado Samaria cán já ná nducú na nuú canduu tóo na chí naquee na cuḥan na. ⁵³ Joo coó naheen toho na Samaria cán ndiquehe na Jesús jáchi naḥini na ña cuḥan chí ñuu Jerusalén. ⁵⁴ Tá naḥini Jacobo xihin Juan cán ña yóho já naçachi da já xihin Jesús:

—Á co cúní ndó, xitoho i ña ná cahnda nde chuun ña ná cuyu ñúhu cáyi indiví já ná jánaá nde sahá ñayivi yóho tá quiahva naçaja profeta Elías sanahá —naçachi na xihin á.

⁵⁵ Anda já nandicoto nihni Jesús nu ná já naçasahá jánani a na já naçachi a já xihin ná:

—Co xíní ndó ña a váha toho cáhvi ini ndó já. ⁵⁶ Jáchi coó naquixi toho yehe, da naçindahá Ndióxi nduu ñayivi, ña ná jánaá i sahá ñayivi. Naquixi i ñuyiví yóho jáchi cúní ña ná çacu ndaa ínimá ná —naçachi Jesús xihín na cán.

Anda já naquee na cuḥan na inga ñuu loho.

Na cúní candico Jesús

(Mt. 8:19-22)

⁵⁷ Ta nani xíca na cuḥan na já naçachi in dataa já xihin Jesús:

—Cúní candico i ndohó ndá naçuu nuú cuḥun ndo —naçachi da.

⁵⁸ Anda já nanducú ñehe Jesús tuhun nu dá já cáhí a já xihin dá:

—Ndicuui cúu rí ta vaṭi ín cáva ñúhu rí. Laa cúu rí ta vaṭi ín táca ñúhu rí. Joo yehe, da naçindahá

Ndióxi nduu ñayivi chí ni nuú cuju mí i coó va —
 ñacachi a xihin dá.

⁵⁹ Tá nandihí já ñacachi Jesús já xihín inga da:
 —Naha quí candico yehe.

Joo nanducú ñehe da cán tuhun nu Jesús já cáhí
 da já xihin á:

—Quiahva jihna ndó ñamaní nuú i ña ná cūhun
 i jánduxu tátá i já quixi i candico i ndohó —ñacachi
 da xihin Jesús.

⁶⁰ Anda já ñacachi Jesús já xihin dá:

—Ná cūhun mé ñayivi, na a ñáha cacu ndaa
 ínima jánduxu na ndii jan. Joo yóhó, cuáhán caxi
 tuhun nuú ñayivi ña sa nandindaa quiví cacomí
 Ndióxi cuéntá saha ná —ñacachi Jesús xihin dá.

⁶¹ Anda já ñacativi inga dataa nu Jesús já
 ñacachi da já xihin á:

—Jesús, candico i ndohó cúni. Joo quiahva ndó
 ñamaní nuú i ná cūhun loho i ndindayí jihna ñúhú
 i na vehe e já quixi i candico i ndohó —ñacachi da
 xihin Jesús.

⁶² Anda já ñacachi Jesús já xihin dá:

—Ndá da cásahá ndico yehe ta já ndico coo tucu
 da cuahan da chí jata, cúú dá da coó chuun toho
 cacomí Ndióxi cuéntá saha. Jáchí da cán cúú dá
 tátuhun da tíin yata ta cásahá da xútu da cuahan
 da joo tá nandihí ndicoto nihni tucu da chí jata ta
 chí coó saha dá cacomí Ndióxi cuéntá saha dá —
 ñacachi Jesús.

10

*Chindahá Jesús uní jico uxu taa cūhun da cahan
 da tuhun Ndióxi xihín ñayivi*

¹ Tá nandihi já naçaxi Jesús inga unj jico uxu chága dataa. Ta tá ivi tá ivi da nachindahá a da cuahan da já ná cuhun cuéé da çahan da tuhun Ndióxi xihín ñayivi ndúu tóco ndihi ñuu nuú naçacu ini Jesús cuhun a coto nihni a ñayivi.

² Anda já naçachi a já xihín ná:

—Mé a ndaa ndúu cuahá ndivaha ñayivi, na cúnj cuni johu tuhun Ndióxi joo coo cuahá na cúnj cuhun çahan ña xihín ná. Cúú á tátuhun vaha ndivaha naçana ní nuú utu joo ndímaní na jáquee ña. Ña cán quéa xíní ñúhú caça tahví ndo nuú da xihín ñaha utu cán ña ná chindahá chága da na jáquee nuú utu da. Quiahva já ndítahan caça tahví ndo nu Ndióxi ña ná chindahá chága mé á na caca nuu çahan tuhun Ndióxi xihín ñayivi já ná ndiquehe vaha na ña. ³ Mé ndó cúú ndó na chindahá i cuhun caca nuu çahan tuhun Ndióxi. Mé a ndaa iyo ndivaha cáa nuú cuhun ndo jáchi cacuu ndó tátuhun ndicachi válí tañu cuahá ndivahyí.

⁴ Tá naçaque ndó cuahan ndo coto a cáñehe ndó yátí cuhun ndo ni jihún ni inga ndusa ndó a cáñehe ndó cuhun ndo. Ta a cácuíta ndó çahan Ndióxi ndó xihín ñayivi ndique táhan xihín ndó íchi. ⁵ Ta tá ná xinu coo ndó in vehe, jihna ñúhú çahan Ndióxi ndó xihín na ndúu vehe cán já cachi ndó já xihín ná: “Ná coo vaha ini ndó, na ndúu vehe yóho”, cachi ndó xihín ná. ⁶ Ta tá mé a ndaa ín vaha ini ñayivi ndúu vehe cán já a cándo nuu toho tuhun naçachi ndó xihín na cán. Joo tá coo ín vaha ini na cán já a quéhe ndó cuéntá sahá ña naçachi ndó ña ná coo vaha ini na jan jáchi a juú na coo vaha ini cúú toho na jan. ⁷ Tá ná xinu coo ndó in vehe nu ndiquehe vaha na ndohó, canduu ndó mé vehe jan. Ta a

cáca nuu ndó tá vehe tá vehe nducú ndo nuú coo ndó. Ta ndá ñaha íin nu ná sahan na nu ndo cuxu ndó á coho ndó, tiin ndó a ndáha ná. Jáchí ndítahan nuú in dataa ndiquehe da ña catacu da sahá chuun cája da. ⁸ Ta tá ná xinu coo ndó in ñuu nu ndiquehe vaha na ndohó, cuxu ndó ndía cúu mé a sahan na nu ndo. ⁹ Ta ndaja vaha ndó ndá na quíhvi ndúu cán. Ta cachi ndó já xihin ná: “Sa nacayati quívi cacomí Ndióxi cuéntá saha ndo”, cachi ndó xihin ná. ¹⁰ Joo tá ná xinu coo ndó in ñuu nu coo cúni na ndiquehe vaha na ndohó, cuáhán ndó cáyé ñuu cán já cachi ndó já xihin ná: ¹¹ “Janda ña yáca natiin ndaa sahá nde ñuu ndó yóho quíji nihni nde ta xihín ña yóho náha nde ña cuahan cuachi ndó jata mé va ndó. Jáchí sa nacaxi tuhun va nde xihin ndo ña sa nacayati quívi cacomí Ndióxi cuéntá sahá ñayivi”, cachi ndó xihin ná —nacachi Jesús xihín na cán.

¹² Anda já nacachi tucu a já xihin ná:

—Tá ná xinu coo quívi caja vií Ndióxi sahá ñayivi já jándoho chága mé á ini ñayivi ñuu jan a juú ga tá quiahva najándoho a ini na ñuu Sodoma sanahá —nacachi Jesús xihin ná.

Cáhan Jesús sahá ñuu nu ndúu ñayivi, na coo cúni jándacoo cuachi

(Mt. 11:20-24)

¹³ Anda já nacachi tucu Jesús xihin ná já:

—Ndáhví nahá nacuu ndó, na ñuu Corazín. Ta ndáhví nahá nacuu ndó na ñuu Betsaida. Cuahá ndivaha ña náhnu nacaja i nu ndo joo coo naxeen ndó ndicó coo ini ndó jándacoo ndó cuachi ndó. Sanahá najándihi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña

náhn̄u n̄uú n̄a cán tá quiahva n̄acaja i n̄u mé ndó, sa najándacoo va n̄a cán cuachi na, nduu. Ta chí īvi laá ndaca ndixi na jahmá ndíí ta jácuyu na yaa yíquí jíní n̄a, nduu. Jáchi xihín ña yóho jánaḥa n̄a ña nandicó cōo ini na sahá cuachi na. ¹⁴ Joo tá ná xinu quivi caja vií Ndióxi sahá ñayivi já ndoho chága ini mé ndó, n̄a ñuu jan a juú ga tá quiahva nandoho ini ñayivi nasanduu ñuu Tiro xihín ñuu Sidón sanahá. ¹⁵ Ta viti cáhan i xihín ndó, n̄a ndúu ñuu Capernaum. Janda indiví cúní ndó cūhun ndó joo sahá ña sáá ini ndó cūhun ndó janda indayá, caja Ndióxi —nacachi Jesús.

¹⁶ Anda já nacachi a xihín n̄a xíca tuun xihín á já:

—Ndá n̄a xíní jōho n̄u cáhan ndo ta cája na ña cáchí ndo já quéa cúú á tátuhun cája na ña cáchí yehe xihín ná caja na. Ta ndá n̄a cándají ndohó cúú á tátuhun cándají ri na yehe va. Ta ndá n̄a cándají yehe, cándají ri na Ndióxi, mé a n̄achindahá a yehe quixi i ñuyíví yóho —nacachi Jesús xihín n̄a chindahá mé á cūhun cáhan tūhun Ndióxi xihín ñayivi cán.

Anda já naquee na cuahan na.

Tá nandicó cōo ndihuni jico uxu n̄a n̄achindahá Jesús caca nuu cáhan tūhun Ndióxi

¹⁷ A juú quiahva cájii íní n̄a uní jico uxu n̄a n̄achindahá Jesús cáhan tūhun Ndióxi cán tá nandicó cōo na. Já nacachi na já xihín Jesús:

—Tá cáhan nde quivi ndó sáhdá nde chuun n̄u ínima quini ta chí xíní jōho rí ta cája rí ña sáhdá nde n̄u rí —nacachi n̄a cán xihín Jesús.

¹⁸ Anda já nacachi Jesús já xihín ná:

—Mé a ndaa quéa cáhan ndó jan. Jáchi naxini i xihín nuu mí i ndá quiahva naquee Satanás, rí cúu tiñáhá sacuaḥa indiví ta nandicava rí nu ñuhu tátuhun in tasa. ¹⁹ Chí nasahan i ndée nu ndóhó ña ná cuu cahnda ndó chuun nuú tiñáhá sacuaḥa. Já cuu cuani nihni ndó jatá coo xihín jata líhma ta a ndóho ndó ni in ñaha. Ta nasahan i ndée nu ndó ña ná cuu quee vaha ndó nuú ndihi ña núu cúni tiñáhá sacuaḥa caja rí xihín ndo. ²⁰ Vatí cájii ini ndó sahá ña cándúsa rí quini nu sáhdá ndó chuun nu rí joo ndítahan cajii chága ini ndó sahá ña sa naquee va quivi ndó ña cuhun ndó indiví — nacachi Jesús xihín ná.

*Tá nacajii ndivaha ini Jesús
(Mt. 11:25-27; 13:16-17)*

²¹ Ta chí mé hora já nacaja ínima yii Ndióxi ña ná cajii ndivaha ini Jesús. Já nacasáhá cáchi a já:

—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indiví xihín ñuyívi. Jáchi najánaḥa ndó ña ndichí ndivaha nuú ñayivi, na coo cuahá saḥa nuú java ga na. Ta nacaja ndó ña ná a cúu candaa ini na ndichí xihín na tácu ini ñaha mé ndó. Já nacaja ndó jáchi já nasacu ini ndó caja ndó — nacachi Jesús.

²² Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ña ná cacomí i cuénta sahá. Ta ni in túhún toho ñayivi co xini vaha na yehe, da cúu in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na co xini vaha yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jánaḥa i

nụ sáhá Ndióxi, tátá i já ná candaá vaha ini na yo cúú mé á —nācachi Jesús.

²³ Anda já nasandehé a nuú nā xíca tuun xih̄in á cán. Já nācasáhá cáchí a já xih̄in mé cuití nā:

—Tahví nācuu ñayivi tá ná cuu candehé nā tóco ndihi ñā xíní mé ndó viti. ²⁴ Mé a ndaa ná cahan i xih̄in ndo ñā cuaha táhan nā profeta nasanduu sanahá ta cuaha táhan nā nasacomí cuéntá sáhá ñayivi sanahá cúní nā cuni na tóco ndihi ñā xíní ndo cája i. Joo coó naxini na ñā. Ta cúní nā cuni johō na ñā xíní johō ndó cáhan i xih̄in ndo. Joo coó naxini johō na ñā.

Sácu Jesús quiahva sáhá in da Samaria, da nacaja vaha

²⁵ Ta ndaja coo in da jánaḥa ley Moisés nandaca ndichi da cahan da xih̄in Jesús jáchí cúní da coto ndojó ñahá da. Ta nācachi da já xih̄in á:

—Maestro, ndíā ndítahan caja i já ná cuu catacu u indiví anda ama cáa quiví —nācachi da xih̄in á.

²⁶ Anda já nanducú ñehe Jesús tūhun nū dá já nācachi a já xih̄in dá:

—Ndaja cáchí ley Moisés. Ndaja cáchí ley tá cáhvún ñā —nācachi Jesús xih̄in dá.

²⁷ Anda já nanducú ñehe da jánaḥa ley Moisés cán tūhun nū Jesús já nācachi da já:

—“Quihví inún Ndióxi, xitohún xih̄in tóco ndihi ínimun ta xih̄in ndinuhu inún. Ta quihví inún a xih̄in tóco ndihi ndéun ta xih̄in tóco ndihi xíní túnun. Ta quihví inún ñani táhún tá quiahva quihví inún mún” —nācachi da cán nanducú ñehe da tūhun nū Jesús.

²⁸ Anda já nācachi Jesús já xih̄in dá:

—Mé a ndaa vaha va nacahun. Cuáhán caxa tóco ndihi ña yóho já ñehe táhvun catacún indivi anda ama cáa quivi —nacachi Jesús xihin dá.

²⁹ Joo da jána ha ley Moisés cán cuni da candoo vaha da nuú ñayivi ndúu cán sahá ña cán quea cáchi da já xihin Jesús:

—Yo já cúu ñani táhan i.

³⁰ Anda já nandicaní Jesús nu dá já cáchi a já xihin dá:

—In tañu naquee in dataa ñuu Jerusalén cuahan da ichi ña nanuu cuahan chí ñuu Jericó. Ta ndaja coo cán naqueta java ta cuíhná nu dá. Ta natiin na da ta nacaja cuíhná ndihi na ñaha da janda jáhma dá viti naquehe na. Tá nandihí já nacani quini ndivaha na da janda quiahva nasahni too na da. Já naquee na cuahan na. ³¹ Ta ña vaha quea nayaha in jutú mé ichi cán. Joo tá naxini ñahá da já nayaha saa da cuahan va da. ³² Ta sa mé ichi cán nayaha ri in da naquixi chichi Leví ta tá naxini da da nandicuehe cándúhu ichi cán já nayaha saa da cuahan da. ³³ Jári in da Samaria xica cuahan mé ichi cán. Joo tá naxini da da nandicuehe cándúhu ichi cán chí natahvi ini da saha dá. ³⁴ Anda já nacayati da nu cándúhu dá. Já nacaja tátá da nuú nandicuehe da quíhvi cán xihin síti xihin vino viti. Ta já nacató da nuú nandicuehe cán xihin ticoto. Tá nandihí najánda da da jata búrró jana dá já ñehe ñahá da cuahan da. Já nanducú da vehe coo too da quíhvi cán ña ná candaa na da. ³⁵ Ta inga quivi itaan tá nasacu ini da Samaria cán quehe da ichi cuhun da já natavá da ivi jiuhún caa nasahan da nuú da xihin ñaha vehe cán. Já nacachi da já

xihin dá: “Cajún ñamaní candaa vahún da quíhvī yóho. Ta tá ná chicaoan chágun jiuhún xihin dá, a ndicani toho inún jáchi chahvi mí vi ña nuun tá ná ndicó ɔo i”, cáchí da Samaria cán —ñacachi Jesús.

³⁶ Anda já nandaça tuhún Jesús da jánaha ley Moisés cán já ñacachi a já xihin dá:

—Ta viti cachún xihín i tixi ndihuni da nayaha ichi nuú nasanduhú da nandicuehe ñacaja taa cuihná yóho, ndá da cúú da nanaha ña mé a ndaa táhyí quíhvī ini da ñani táhan da —ñacachi Jesús.

³⁷ Anda já ñacachi da jánaha ley Moisés já:

—Da natahvi ini sahá da nandicuehe jan, da jan cúú da cája i cuénta nanaha da ña mé a ndaa quíhvī ini da ñani táhan da —ñacachi da cán.

Anda já ñacachi Jesús já xihin dá:

—Ta viti cuáhan ri yóhó va, quíhvī inún ñani táhún tá quiahva ñacaja da Samaria yóho —ñacachi a xihin dá.

Tá nasahan Jesús vehe Marta xihin María

³⁸ Naquehe Jesús ichi xíca cuahan janda quiahva naxinu ɔo a in ñuu loho. Ta cán nandiquehe vaha in ñá naní Marta mé á vehe ñá. ³⁹ Ta nasahin in quíhvī Marta yóho, ñá naní María. Ta naxinu ɔo María nasacoo ñá yati saha Jesús jáchi cuni ñá cuni johó ñá nu cáhan mé á. ⁴⁰ Joo ndaja coo a juú quiahva ndíhi ini mé Marta cája ndíví ñá ñaha cuxu na ndácaan ña. Anda já ñacayati ñá nu Jesús já ñacachi ñá já xihin á:

—Candehé ndo, xitoho i. Á co sándehe toho ndó ña in túhún mí i cája ndíví i ñaha ta ñá cúú quíhvī i jan ɔo chíndeé loho ñá yehe. Cahán loho ndó xihin

ñá ná chindeé ñá yehe —nācachi Marta cán xihin Jesús.

⁴¹ Anda já nanducú ñehe Jesús tuhun nu ña já cáchi a já xihin ña:

—Marta loho, a juú quiahva ndícani inún ta ndíhi inún jáchi ín ndivaha chuun nuun. ⁴² Joo ín in túhún ñaha ña ín chága saha ta cúú á ña ndítahan cajún. Ta María, ñá cúú quihvun yóho nācaxi ñá ña vaha chága. Ta ni in na a cúu caji nuu nu ñá cuni johó ñá tuhun cáhan i —nācachi Jesús xihin ña.

11

Jánaha Jesús na xíca tuun xihin á ndaja caja na cacā tahví na nu Ndióxi
(Mt. 6:9-15; 7:7-11)

¹ In tañu xíca tahví Jesús nu Ndióxi ndácaan. Ta tá nandíhi naxíca tahví a já nācachi in táhan da xíca tuun xihin á cán já xihin á:

—Jánaha ndó ndehe, xitoho nde cacā tahví nde nu Ndióxi, tátá yo tá quiahva nācāja Juan, da nācāja ndúta ñayivi. Jáchi najánaha da nuú na nasaxíca xihin dá ndá quiahva caja na cacā tahví na nu Ndióxi —nācachi da cán xihin Jesús.

² Anda já nācachi Jesús já xihín na cán:

—Tá ná cacā tahví ndo nu Ndióxi já cachi ndó já: Tátá Ndióxi, ña ín indiví, cáhnu ná cacuu quivi ndo.

Ná tandaa quí quíví cacomí ndó cuéntá sahá nde. Ta ná coo tá ín cúni mé ndó coo ñuyíví yóho tá quiahva ín indiví cája ndó.

³ Quiahva ndó nuú nde ña ndímaní nuú nde cuxu nde in in quivi.

4 Caja cáhnu ini ndó sahá cuachi nde tá quiahva cája cáhnu ini nde saha tóco ndihi ña núu cája ñayivi xihín nde.

Ta a quiahva ndó ñamaní ña ná coto ndojó tiñáhá sacuahá ndehe já ná a cája nde cuachi nu ndo, já cachi ndó caça tahví ndo —nacachi Jesús.

5 Anda já nasacu Jesús in quiahva nu ná já nacachi a já xihín ná:

—Cúu á tátuhun tá ná cuhun ndó vehe in amigo ndo java ñuú táji ta já cachi ndó já xihín dá: “Amigo, á a quiahva tóun uní pan nuú i ⁶ jáchi nacasaá in da xíní táhan xihín i vehe e ta cúu dá da nasahan xícá ta coó ñaha nuú i quiahva i cuxu da”, cachi ndó xihín amigo ndo. ⁷ Ta viti ná caja í cuéntá nducú ñehe da ndácaan ini vehe cán tuhun nu ndo já cachi da já: “A jáquihvún yehe jáchi ndáji tuun yéhé. Ta ndúu jahyi válí i quíji na xihín i nuú xito ta a cúu caja i ndacoo i quiahva i ndá ñaha nuun”, cachi da cán xihín ndo ná caja í cuéntá.

⁸ Mé a ndaa ná cahan i xihín ndo ña vatí co cúni da jan ndacoo da quiahva da ñaha nu ndo sahá ña xíní táhan ndó xihín dá joo ndacoo tá ndacoo da quiahva da ñaha nu ndo sahá ña jáquihvi ndó da. Sahá ña cán quéa ndacoo da quiahva da tóco ndihi ña xíní ñúhú ndo nu ndo. ⁹ Ña cán quéa cahan i ña yóho xihín ndo: Ndá ñaha ndímani nu ndo xíní ñúhú caça ndó ña nu Ndióxi ta já quiahva mé á ña nu ndo. Ndinducú ndo ña cúni ndo ta ñehe ndó ña caja Ndióxi. Cúu á tátuhun catí ndáha ndo yéhé ta já nuna yéhé nu ndo. ¹⁰ Jáchi na xícá, na cán cúu na ñehe va. Ta na ndúcú ñaha, na cán cúu na ndíñehe

va. Ta na cáti ndáha yéhé, na cán cúu na ndínuna yéhé nuu.

¹¹ Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhé ri ndó quiahva ndó yuu nu á ña ná caxí a. Ta ama ná quiahva ndó coo caxí a tá xíca cuñu tiyacá caxí a. ¹² Ta ama cuéhé ri ndó quiahva ndó líhma caxí jahyi ndó tá xíca ndivi nu ndo. ¹³ Vatí cúu ndó ñayivi cája cuachi joo xini vaha ndó quiahva ndó ña vaha nuú jahyi ndó. Ta ndaja ga ví cája Ndióxi, tátá ndo, mé a ín indivi xihin ndo. Quiahva mé á ínimá yii á nu ndá na ná caca ña nu á —nacachi Jesús.

Chícaan na cuachi Jesús ña ñéhe a ndée tiñáhá sacuaḥa

(Mt. 12:22-30; Mr. 3:20-27)

¹⁴ In tañu táva Jesús ínimá quini ini in dataa, da nanduu níhi, nacaja rí quini. Ta tá sa nacana mé rí quini ini da cán nacaja Jesús anda já nandicahan tucu da. Ta chí nacatontó cuahá ñayivi ndúu cán tá naxini na ña yóho. ¹⁵ Joo java na nacasáhá cáchi na já saḥa Jesús:

—Taa yóho cúu táva da rí quini ñúhu ini ñayivi jáchi mé Beelzebú, rí cúu tiñáhá sacuaḥa nu rí quini cán, sahan rí ndée rí nu dá cája da ña —nacachi na.

¹⁶ Ta java ga na cuni na coto ndojó na Jesús sahá ña cán quéa naxica na nu á ña ná caxa mé á ñaha xitúhún quixi indivi já ná cuni na. ¹⁷ Joo xini vaha va Jesús ña cáhvi ini na cán sahá ña cán quéa nacachi a já xihin ná:

—Tá sáhdá java táhan ñayivi ndúu in ñuu ta ndúu na cuahá táhdá já cásáhá cáni táhan ndaja

táhan mé va na já cama chá ndihi sahá ñuu nu ndúu na cán. Ta quiahva já yáha xihín na ndúu in vehe tá cásáhá sáhdá java táhan na ta cáni táhan na já cama chá ndihi sahá vehe na. ¹⁸ Ta quiahva já yáha xihín Satanás, rí cúu tiñáhá sacuaḥa va. Tá ná cani táhan ndaja táhan mé rí já quea ndihi saḥa ndée ña cómi ri. Cáhan i ña yóho xihín ndo jáchi cáchi ndo ña tává i rí quini ini ñayivi xihín ndée Beelzebú, rí cúu tiñáhá sacuaḥa. ¹⁹ Joo tá mé a ndaa cúu ndusa ña cáchi ndó sahá i jan, ndáchi quehe na cúu cuéntá mé ndó jan ndée tává na rí quini ini ñayivi. Ama ná cachi ndó ña tává ndó rí quini xihín ndée tiñáhá sacuaḥa. Ña yóho náha ña co cáhvi ndaa ini ndó. ²⁰ Joo yehe xihín in túhún ndée Ndióxi tává i ínima quini ini ñayivi. Ta xihín ña yóho náha cáxi a ña sa naxinu coo quivi cacomí Ndióxi cuéntá saḥa ndo —cáchi Jesús.

²¹ Ta sácú Jesús quiahva nu ná ta xihín ña yóho jánaha ña quee vaha mé á xihín tiñáhá sacuaḥa. Já cáchi a já:

—Íin in dataa ta tóyí cáa da ta ñéhe da ndá chúun chindeé da mé dá. Ta nani ndáa da vehe da mé a ndaa coo toho ñaha ndoho ñaha da jáchi ndáa vaha da ña. ²² Joo tá ná quixi inga ta, da ndacú chága a juú ga mé da cán ta quee vaha da xihín dá já candaa ndihi da ndá chúun ña naçandeé ini da mé dá. Ta já caja tá cúni mé da ndacú chága cán xihín ñaha da inga cán.

²³ 'Ndá na coo cuahan xoo i, cúu ná na co cúni yehe. Jáchi ndá na co chindeé yehe xihín ña cája i, cúu ná na sáji nuu nuú i.

Jánaḥa Jesús ña cuahá tañu ndicó coo tucu rí quini ini ñayivi vatí sa naquee rí

(Mt. 12:43-45)

²⁴ Tá quéta in rí quini ini in dataa já quée rí cuahan rí xíca nuu rí ndijáa yucú íchí ndínducú rí nuú candoo rí. Ta tá co ndíñeḥe rí ña já cásahá cáhvi ini rí já: “Cóho ndicó coo tucú ini da nuú naṣandacaan í cán jáchi cúú á tátuhun vehé”, cáhán rí. ²⁵ Ta tá xínu coo rí ini da cán já sándeḥé rí ña ín vií va ini da cán tá quiahva vií ini vehe tá naṭihvi á ta nandaca ndójó vaha tóco ndihi ñaha ini a. ²⁶ Anda já quée tucu mé rí quini cán cuahan rí quehe rí usa ga rí quini chága a juú ga mé rí já xínu ndihi rí ndihvi rí ini da cán. Ta mé da cán ndiquini chága da a juú tá naṣandacaan in tálaá rí ini da —naçachi Jesús.

Ndá na cúú na tahví chága naçuu

²⁷ Ta nani cáhan Jesús tuhun yóho nuú ñayivi já naçayuhú cóhó in ñáñáha tañu ñayivi cuaha cán já naçachi ñá já:

—Tahví naçuu ñá najácacu yohó, mé ñá najácuáhnu yohó —naçachi ñá xihín Jesús.

²⁸ Anda já naçachi Jesús já:

—Tahví chága naçuu ñayivi tá xíni johó na tuhun Ndióxi ta cája na ña cáchí a —naçachi Jesús.

Xíca ñayivi quini ña ná caja Jesús ña xitúhún cuni na

²⁹ Tá ndítaca cuahá ñayivi nu ín Jesús já naçasahá mé á cáhan xihín ná já naçachi a já:

—Quini ndivaha va ñayivi ndúu tiempo viti. Xíca na ña ná caja í ñaha xitúhún nu ná. Joo cóo toho ña cán coo. Ña cuni ndusa na quéa ndoho

i tá quiahva nandoho Jonás, da nasacuu profeta sanahá. ³⁰ Jáchi mé ñayivi nasanduu sanahá ñuu Nínive cán nacandaa ini na ña nachindahá Ndióxi Jonás nu ná. Ta quiahva já canda ri ini na ndúu viti ña nachindahá ri Ndióxi yehe va, da nanduu ñayivi. ³¹ Tá ná xinu quivi caja ví Ndióxi sahá cuachi ñayivi ndúu tiempo viti anda já ndicuita in ña nasacomí cuénta sahá ñayivi ndúu chí sur sanahá ta chicaan ña cuachi jata ñayivi ndúu tiempo viti. Jáchi mé ña cán vatí nasahin xica ndivaha ña nu rey Salomón sanahá nasahan ña cuni johu ña tuhun ndichí cahan da. Ta yehe in chaga sahá i a juú ga Salomón joo co cándusa ndó yehe. ³² Ta jari ñayivi nasanduu Nínive sanahá cán ndicuita na chicaan na cuachi jata ndo tá ná xinu quivi caja ví Ndióxi sahá cuachi ñayivi ndúu viti. Jáchi mé na nasanduu ñuu Nínive cán najandacoo na cuachi cája na tá nahan Jonás xihin ná ña nacachi Ndióxi coo. Ta yehe in chaga sahá i a juú ga Jonás joo co cándusa ndó yehe.

*Nduchú núu yo cúu á tátuhun in lámpara
(Mt. 5:15; 6:22-23)*

³³ Ni in túhun toho ñayivi co chicaan ñuhu ná in lámpara ta já quehe na ña sácú na in nuú jehé. Ni co chicaan na ña tixi sato. Ña cája na quea chinúu jícó na ña já ná yehe nuú na quihvi ini vehe cán. ³⁴ Nduchú núu yo cúu á tátuhun in lámpara jándiyehé a nu yo já xini yo nu xica í. Ta tá tívi vaha nduchú núu yo já cuu candehé vaha í nu xica í. Joo tá co tívi nduchú núu yo já quea xica í nu naá ndivaha. ³⁵ Cuénta coo ndó a juú cahan ndo ña cúu ndó na xica nu yehe ta cáa ví ndó cája ndó

cuachi tátuhun na xíca nu naá. ³⁶ Tá ná quiahva ndó ñamaní jándiyehē Ndióxi ínimá ndo já a cája ga ndó cuachi jáchi a cáñehē ga ndó ínimá quini. Tá cája ndó ña cúni Ndióxi já cúú á tátuhun in lámpara jándiyehē ínimá ndo —ñacachi Jesús.

Chícaan Jesús cuachi jatá na fariseo xihín jatá na jángħa ley Moisés

(Mt. 23:1-36; Mr. 12:38-40; Lc. 20:45-47)

³⁷ Tá nandihí ñacahan Jesús já ñacana in da fariseo Jesús ña ná cūhun a cuxu a vehe da. Tá nandihí já ñasahan Jesús vehe da já ñaquihvi a ñasacoo a nu mesa xihín java na cán. ³⁸ Joo ndaja coo da fariseo cán chí ñacatóntó da jáchi ñaxini da ña coó ñandahá Jesús cacoo a cuxu a tá quiahva ín costumbre mé na fariseo cán. ³⁹ Anda já ñacachi Jesús já xihín da fariseo cán:

—Ndóhó, na fariseo, ndíhi ini ndó cája ndó costumbre ña ndícata ndó jatá vaso xihín jatá cohó viti joo co ndíhi ini ndó ndícata ndó ini a. Quiahva já cája mé va ndó jáchi ndíhi ini ndó ndahá ndo tátuhun costumbre ndo joo co ndíhi ini ndó ndaja víi ndo ínimá ndo nuú ñachutú ndaa xihín ñaha quini cáhvi ini ndó. ⁴⁰ Ndaja tóntó jiní ndo. Á co xini toho ndó ña tá ñacavaha Ndióxi ñayivi já ñacavaha mé á yiquí cuñu na ta ñacavaha mé á ínimá ná. ⁴¹ Caja ndó ñamaní xihín na ndahví xihín ndinuhu ini ndó já ná coo víi ndó nu Ndióxi.

⁴² Ndáhví ñacuu ndó, na fariseo. Mé ndó tá cáchí ndo sáhan ndó ñaha nu Ndióxi já cávaha ndó uxu táhnda ñaha ndó cán. Ta in a sáhan ndó nu Ndióxi ta quéhe ndihí ndó ña java cán. Quiahva já cája ndó xihín minu estila xihín yucu lotá ta quiahva já cája

ndó xih̄in tá nuú ñaha cána nu ñúhu ndo. Joo co cája ndó ña ndaa xih̄ín ñayivi. Ta ni co quih̄vi ini ndó Ndióxi. Joo ña cúni Ndióxi caja ndó quéa ná caja ndaa ndó ta ná quih̄vi ini ndó a. Ta a ndíndójó ndó quiahva ndó ñaha nu Ndióxi.

⁴³ Ndáhví nacuu ndó, na fariseo. Jáchi tá sáhan ndó veñuhu cátoó ndo cacoo ndó nu sácoo na náhnu. Ta cúni ndó ña ná cahan Ndióxi toni ñúhú ndivaha ñayivi xih̄in ndo tá ndique táhan na xih̄in ndo íchi.

⁴⁴ Ndáhví nacuu ndó, na jánaha ley Moisés. Ta ndáhví nacuu ndó, na fariseo. Jáchi co cúu ndó tá quiahva ndaa ndó. Mé ndó cúu ndó tátuhun yávi nu táan na ndii jáchi núu cája ndó. Vatí xójo cava ñayivi yáha na nuú nanduxu ndii cán joo co xini na ña cúu á in yávi nu ñúhu ndii jáchi coo yuu ñañi a —nacachi Jesús.

⁴⁵ Anda já nanducú ñehe in da jánaha ley Moisés cán tuhun nu Jesús já nacachi da já xih̄in á:

—Maestro, xih̄in tuhun cáhan jan jándih̄vi ri a ndehe va.

⁴⁶ Anda já nacachi Jesús já xih̄in dá:

—Ndáhví nacuu ri ndóhó va, na jánaha ley Moisés. Jáchi cája ndó ña ná coo ih̄vi ndivaha ley já ná a cúu caja ñayivi ña. Joo mé ndó cája ndúsa ndó xih̄in ná ña ná caja na ña vatí ni mé ndó a cúu caja ndó ña.

⁴⁷ Ndáhví nacuu ndó jáchi cúu á tátuhun cávaha ndó ñañi nu jánduxu ndó na profeta, na nasahní tásáhnu jícó ndo sanahá. ⁴⁸ Ta xih̄in ña yóho náha ndó ña cáji ini ndó xih̄in ña nacaja tásáhnu jícó ndo sanahá tá nasahní na na profeta. Ta viti cúu á tátuhun chíndeé táhan ndó xih̄in na cán jáchi mé

ná nasahní nā nā profeta ta mé ndó nacavaha ndó nuú nanduxu nā.

⁴⁹ Xíni vaha Ndióxi ñayivi ta ndaa nacahan mé á tá nacachi a já: “Chindahá i java profeta xihín java apóstol nu ndo. Joo mé ndó cahni ndo java na ta java na ndicuita ñee ndó nā”, nacachi Ndióxi sanahá. ⁵⁰ Joo viti caça Ndióxi cuéntá nuú ñayivi ndúu tiempo viti saha tóco ndihi nā profeta, nā naxihí ndijáá tiempo janda nani nacava sáhá saha ñuyiví. ⁵¹ Caça Ndióxi cuéntá nuú ñayivi ndúu tiempo viti sahá nā profeta ndii naxihí sanahá. Caça mé á cuéntá sahá Abel, da naxihí nacaja Caín cán. Ta caça mé á cuéntá sahá ndijáá nā profeta naxihí tiempo naquixi cán janda quiahva naxinu coo a nuú caça cuéntá sahá ndii Zacarías. Mé da yóho nasahní nā da ini veñuhu sanahá tañu nu náa xihín nuú yii ndivaha. Ña cán quéa cahan i xihin ndó ña caça Ndióxi cuéntá saha tóco ndihi ndii jan nuú ñayivi ndúu tiempo viti.

⁵² Ndáhví nacuu ndó, nā jánaha ley Moisés. Jáchi cája ndó ña ná a cúu candaá ini ñayivi ña cáchi tuhun Ndióxi. Ta xihín ña yóho cúu ndó nā sáji nuu cuití va jáchi ni co sahan ndó ñamaní nu ná ña ná candúsa na ña ndaa. Ta mé ndó vatí xíni ndó cúu á ña ndaa joo co cája ndó ña cáchi a —nacachi Jesús xihín nā jánaha ley Moisés cán.

⁵³ Tá nacachi Jesús ña yóho já naxojo ndivaha ini nā jánaha ley Moisés cán xihín nā fariseo cán xihin á. Ta já nacasáhá nā ndáca tuhún cuaha chága nā mé á sahá ña cuni nā jáquihvi cuití ñahá nā. ⁵⁴ Ta nasacu cuaha ná tuhun ihvi nu á jáchi ndúcú nā ndá quiahva chicaan nā cuachi jatá xihín in tuhun

ñā ná yaha yúhu á caħan.

12

Jánaha Jesús saħá na co cúu ná tá quiahva ndáa na

¹ Ta nani cáħan Jesús cán naçasáhá táca cuahá ndivaha ñayivi. Cuaha mil na naçasáhá ndái cuu na cán. Janda quiahva cándíhi táhan ndaja táhan mé ná xihín á cuahān ná. Nu cuítí naçaħan Jesús xihín na xíca tuun xihín á já cáchí a já:

—Cuéntá coo ndó xihín na fariseo jáchi cúu ná tátuhun yúsa naħaa quée xihín harina ña cávaha na pan. Co cúu ná tá quiahva ndáa na. ² Ta ni in túhún toho ñaha a cúu coo jehé nahá jáchi cana tá cana tuhun saħá. ³ Tóco ndihi tuhun naçaħan jehé ndó ñuu já vaxi quivi cuni johō ñayivi ña ndiví táhyí. Tóco ndihi ña naçaħan jehé ndo tá ndájí yéhe já vaxi quivi candaa ini tóco ndihi ñayivi ñuu saħá —naçachi Jesús xihín na xíca tuun xihín á.

*Yo já ndítahan cayihví yo
(Mt. 10:26-31)*

⁴ Anda já naçasáhá cáħan Jesús xihín ndihi na cán já cáchí a já:

—Candehé ndo, na cúu amigo i. Cúni caħan i xihín ndo ña a cáyihví toho ndó ñayivi, na cuu caħní yiquí cuñu ndó. Jáchi ña jan cúu ndihi va ña cája na ta a cuú caja na ni in ñaha xihín ínima ndó.

⁵ Ta viti ná caħan i xihín ndó yo já ndítahan ndusa nu ndó cayihví ndo: Ndítahan cayihví ndó Ndióxi jáchi mé a cán quéea cuu caja ña ná quivi ndó ta tá nandihí cuu chicaaħn ínima ndo ini indayá. Mé a cán quéea ndítahan ndusa cayihví ndo.

6 'Sa xini vaha ndó ña uhun laa válí yahvi rí ivi jjuhún. Vatí núu ndivaha sáhan ñayivi rí joo cō ndíndójó toho Ndióxi saha ri jáchi ndáá mé á ri. 7 Quiahva já íin ri saha mé ndó nu Ndióxi. Jáchi janda íjí jini ndó jan ndáhvi tá in tá in a nu Ndióxi. A cáyhvi toho ndó jáchi ndiyahvi chága ndóhó nu Ndióxi a juú ga cuahá laa válí.

*Tá cahan cáxi ñayivi ña cúú ná cuéntá Jesús
(Mt. 10:32-33; 12:32; 10:19-20)*

8 'Mé a ndaa ná cahan i xihin ndó ña ndá na cáxi tuhun nuú ñayivi ña cuahan na cuéntá mí i já quéa cachi mí i, da nachindahá Ndióxi nduu ñayivi saha ná ña mé a ndaa cúú ndusa na cán cuéntá mí i. Já cachi i xihin tátō Ndióxi. 9 Joo ndá na ná cachi xihín ñayivi ña cō xini toho na yehe já quéa ni yehe a ndícuni toho i na ña cúú ná cuéntá mí i nu tátō Ndióxi.

10 'Ta ndá na ná cahan núu sahá yehe, da nachindahá Ndióxi nduu ñayivi, caha cáhnu ini i saha ná. Joo ndá na ná cahan núu saha ínima yii Ndióxi, na cán cúú na a cája cáhnu ini toho Ndióxi saha.

11 'Tá ná tiin na ndohó ña cañehe na ndohó cūhun ndó nahma ndó nuú na sacuaha veñuhu á nuú na jutixia sahá i, a ndícani toho ini ndó ña ndá tuhun quéa cahan ndó nuú na cán. 12 Jáchi tá ná xinu cō hora cahan ndó nuú na cán, jánaha ínima yii Ndióxi nu ndo ndá tuhun nducú ñehe ndó nuú na cán —nacachi Jesús xihin ná.

In da cuicá, da nacaja quíhvi

13 In táhan da ndacaan tañu ñayivi cuaha cán nacahan da xihin Jesús já nacachi da já xihin á:

—Maestro, caḥan loho ndó xihín ñani i ña ná caḥnda java da ñaha ña najándacoo tátá nde nuú nde tá naḥihi na —naçachi da xihín Jesús.

¹⁴ Anda já nanducú ñehe Jesús tuhun nu dá já naçachi a já xihín dá:

—A juú juéxe cúu yehe já coo i caḥnda java i ñaha ndó, vaḥa.

¹⁵ Anda já naçachi tucu a já xihín na ndúu cán:

—Cuni joho vaḥa ndó. Cuénta coo ndó ña ná a ndiáva nahá ini ndó canduu cuahá ñaha cuicá nu ndo. Jáchí a juú saḥa ña ndúu cuahá ñaha cuicá nu ndó chí cuu catacu nahá chága ndó, vaḥa —naçachi Jesús.

¹⁶ Anda já naçacu a in quiahva nu ná já naçachi a já xihín ná:

—Naḥahin in da cuicá ta a juú quiahva naḥahnu vaḥa ñaha nu ñúhu dá. ¹⁷ Anda já naçasáhá mé da cuicá cán ndicani ini da já naçahán da já: “Ndáchí taán toho í cuahá nahá ñaha naçana nu yo yóho jáchí coó ga nuú cañuhu a”, naçahán da. ¹⁸ Anda já naçahán tucu da já: “Ña caja í quéa ndicani ndihi í yáca ní ñaha í já cavaḥa í ña náhnu chága. Ta cán taán yo ndihi ña naçana nu yo ta cán taán yo tóco ndihi java ga ña cómi yo. ¹⁹ Anda já cachi i já xihín mí i: Sa cuahá ndivaḥa va ñaha naçacu vaḥún viti. Ta queta ña cusún tíxi cuahá ndivaḥa cuia. Ta viti jandá ndiquehe ndée cuití vún. Cuxu cuití vún. Coho cuití vún. Ta jandá cajii cuití ini vún, já va cachi i xihín mí i”, naçahán da. ²⁰ Joo naçahan Ndióxi já naçachi a já xihín dá: “Taa quíhví, sa mé ñuú viti quivi vún. Ta tóco ndihi ña naçacu vaḥún jan a juú ña cusún cúu á. Ndá na cúu mé va na cuxu ña jan”, naçachi Ndióxi xihín dá. ²¹ Quíhví ndivaḥa

cája ñayivi tá ndája tútú nā ñaha ñuyívi yóho joo cō ñúhu ini na saha Ndióxi ña ná caja na ña cúní mé á. Sahá ña cán quéa cúú ná nā ndahví ndivaha nu mé á —nacachi Jesús xihín ná.

Ndaá Ndióxi nā cúú ndusa jahyi mé á

(Mt. 6:25-34)

²² Tá nandihí já nacahan Jesús xihín nā xíca tuun xihín á cán já nacachi a já xihín ná:

—A ndícani toho ini ndó sahá ña cuxu ndó catacu ndó ta ni saha jáhma candixi ndó. ²³ Jáchi cáhnu chága mé ndó a juú ga ña xíxi ndó xihín ña ndíxi ndó. ²⁴ Candehé ndó rí naní ticacá jan. Cō xútu rí ta ni cō jáquee rí. Ta ni cōó yáca nu táán rí ñaha rí. Joo sahan va Ndióxi ñaha cuxu rí ña ná catacu rí vatí laa va cúú rí. Ta mé ndó ndiyahví chága ndó a juú ga laa jan. ²⁵ A ndícani toho ini ndó jáchi cōó toho a ñéhe ndó ndícani ini ndó. Ni in túhún toho ndó a cúu ndaja jícó ndo mé ndó java metro chága sahá ña ndícani ini ndó. ²⁶ Tá ta ni loho ña yóho a cúú caja ndó, ndíá ndóho ndó ndícani nahá ini ndó caja ndó java ga ñaha, dá já.

²⁷ Candehé ndo ndá quiahva ndató sáhnu ita. Cō cája chúun a ta ni cō cávaha jáhma á. Joo mé a ndaa ná cahan i xihín ndo ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahjin cuahá ñaha cuíca. ²⁸ Candehé ndó ndaja ndáa vaha Ndióxi yucu ita vatí ín tóo a viti ta itaan cáyi a jándihí sahá. Ta ndiyahví chága mé ndó a juú ga yucu ita. Joo cō cándúsa ndó ña candaa mé á ndohó. Ña cán quéa xíní ñúhú candee ini ndó Ndióxi ña quiahva tá quiahva mé á jáhma candixi ndó. ²⁹ Ta a ndícani

ini ndó ndaja caja ndó ñehe ndó ña cuxu ndó xihín ña coho ndó. ³⁰ Jáchí ñayivi, na cō xíní íchí cuéntá Ndióxi, na cán cúú na ndícani cuahá ini saha tóco ndihi ña yóho. Joo cúú ndó cuéntá Ndióxi, mé a cúú tátá ndo ta xíní vaha mé a ña ndímaní nu ndó catacu ndó. ³¹ Joo ndítahan nu ndó ndiquiahva ndó mé ndó ndáha Ndióxi ña ná cacomí a cuéntá saha ndo já quiahva mé a nu ndo ña ndímaní nu ndo catacu ndó.

Indiví cúú nu ndítahan ndaja tútú ñayivi ña vaha (Mt. 6:19-21)

³² 'A cáyihví toho ndó jáchí mé ndó cúú ndó tátuhun ndicachi válí janá í. Mé a ndaa chá va cúú ndó joo cájii ini Ndióxi ña cómí a cuéntá saha ndo. ³³ Jicó ndó ña cómí ndo ta jasá ndó ñaha nuú na ndímaní ñaha nuu. Jáchí quiahva já ndaja tútú ndó ñaha vaha indiví nuú cuhun ndo. Jáchí mé cán a ndíhi sahá ña vaha cómí ndo. Ta ni na cuíhná a cuú quíhvi na caja cuíhná ñaha ndó cán. Ta ni tiquíjí a cuú jándihi rí sahá ñaha ndó cán. ³⁴ Jáchí nuú nandaja tútú ndo ña ndáyahvi nu ndo, cán coo ri ínima ndo.

Náha Jesús ña xíní ñúhú canduu tiahva ñayivi cuhun na xihín mé á

³⁵ 'Xíní ñúhú canduu tiahva ndó candati ndó ndá hora ndicó cōo tucu u quixi í ndiquehe e ndohó. ³⁶ Xíní ñúhú cacuu ndó tátuhun mozo tá ndátí tiahva da ndicó cōo xitoho da, da cuahan vícō tándaha. Ndátí tiahva da cuná da yéhé nu dá tá ná xinu cōo da caní ndáha dá yéhé. ³⁷ Tahví nacuu mozo tá cō quíjí da ndúu da tá ná xinu cōo xitoho da. Mé a ndaa ná cuahan í xihín ndo ña janda mé da

cúu xitoho da cán ndiquehe ñahá da ta já cacoo da da nu mesa da ta já chicaan da coho cuxu mozo da. ³⁸ Coó caja toho a ña ná xinu coo xitoho da java ñuú táji á tá sa yati tivi, tahví nacuu mozo cán tá ndíta da ndúu da tá naxinu xitoho da nu dá. ³⁹ Candehé ndo jáchi xini ñuhú candaa ini ndó ña yóho. Tá xini in dataa ndá hora cuni na cuihná quihvi na vehe da já quéa a cúju da jáchi ndáa vaha da vehe da já ná a quihvi na caja cuihná na ñaha vehe da. ⁴⁰ Quiahva já xínú ñuhú canduu tiahva ri ndóhó va jáchi quixi tucu yehe, da nachindahá Ndióxi ndúu ñayivi mé quivi co cáhan ndo quixi i —nacachi Jesús xihin ná.

*In mozo vaha xihin in mozo a váha
(Mt. 24:45-51)*

⁴¹ Anda já nandaca tuhún Pedro Jesús já nacachi da já xihin á:

—Á nuú ndehe cuití nasacu ndó quiahva yóho á nasacu ndó ña nuú ndaja táhan ñayivi ndúu yóho.

⁴² Anda já nacachi Jesús já xihin dá:

—Ña cáhan i yóho cáhan i ña xihin da tácu ini, da cája vaha ndusa. Cúu á tátuhun in mozo tá jándacoo xitoho da chuun ndáha dá ña ná quiahva da cuxu na java ga cúu mozo xihin dá cán. Anda já naquee mé xitoho da cuahan da. ⁴³ Tahví nacuu mé mozo cán tá xinu coo xitoho da ta ndíñehé dá da cája da chuun ña nacandoo nu dá caja da. ⁴⁴ Mé a ndaa ná cáhan i xihin ndo ña quiahva xitoho da cán chuun nu dá ña ná cacomí da cuénta saha tóco ndihi ñaha cómi xitoho da. ⁴⁵ Joo da cúu mozo yóho tá ná casahá da cáhan da ña cayáncá ndivaha xitoho da ndicó coo da ta sahá ña cán quéa casahá da cája xíxi

da xihín java ga na cúu mozo xihín dá cán. Ta já cáa ga da cásáhá xíxi da ta xíhi da ta já xíni da. ⁴⁶ Ta ndaja coo xinú coo xitoho mozo cán mé quiví co cáhán da. Anda jáví jándoho quini xitoho da cán ini da jáchi coo naja da ña ndítahan caja da. Ta ndoho da yóho tá quiahva ndóho tóco ndihi na sáa ini, mé na coo cája ña sáhdá xitoho na nu ná caja na.

⁴⁷ Tá ná candaa ini mozo ña cúní xitoho da caja da joo coo ín tiahva da caja da ña ta ni coo cúní da caja da ña sáhdá xitoho da nu dá, da cán cúu da ndoho ndivaha ini. ⁴⁸ Joo tá ín in mozo ta coo cánda vaha ini da ndá quéa cúní xitoho da caja da ta ndaja coo cája da in ñaha ña coo táhán ini xitoho da xihín já quéa chá cuití va ndoho ini da. Tá ná caja Ndióxi cuahá ñamaní xihín in ñayivi já quéa ndítahan caja chúun cuaha ná nu mé á. Ta tá sa cándeé ini ñayivi inga na já quéa ndinuhu ñamaní náhnu chaga caca na cán ña ná caja na xihín ná.

*Cája Jesús ña sáhdá java táhan ñayivi
(Mt. 10:34-36)*

⁴⁹ Yehe naquixi i ñuyíví yóho cahnda java táhan i ñayivi já ná nahá na cúní cuhun xoo mí i xihín na coo cúní cuhun xoo i. Ta ña yóho cúu á tátuhun naquixi i chícaan ñúhu i ñuyíví yóho. Ta cúní ña ná ndihi quí chuun naquixi caja i yóho. ⁵⁰ Vaxi quiví ndoho ndivaha ini i ta a juú quiahva ndíhi ini i ndátí xinú coo mé quiví jan. ⁵¹ A cáhán toho ndó ña naxinú i ñuyíví yóho caja i ña ná coo vaha ini ñayivi. Ña vaxi yehe caja i quéa ná cahnda java táhan na. ⁵² Jáchi viti xihín chí nuu cacuu a tátuhun canduu uhun ñayivi in vehe joo a cúní táhan na

sahá yehe jáchi ivi na cacuu cuénta mí i ta uní na candají yehe. Á tá coó ta uní na quihvi ini yehe ta ivi na candají ri yehe. ⁵³ Ta jári da cúu tátá cani táhan da xihín jahyi da sahá yehe. Ta jári ndicuíta dataa cani táhan da xihín tátá da sahá yehe. Ta jári najihí cani táhan na xihín jahyi jhí na sahá yehe. Ta jári najihí cani táhan na xihín náná na sahá yehe. Ta jári ndicuíta najihí cani táhan na xihín sanu na sahá yehe. Ta jári ndicuíta najihí cani táhan na xihín xojo na sahá yehe —nacachi Jesús.

*Có cúní ñayivi candaq ini na yo cúu Jesús
(Mt. 16:1-4; Mr. 8:11-13)*

⁵⁴ Anda já nacachi tucu Jesús já xihín ñayivi:

—Mé ndó tá xíní ndo ndicuíta vico vaxi a ñuu ndó chí xoo nu quéta candii já cáchí ndó ña cuun javi ta chí cúu ndusa dó. ⁵⁵ Ta tá xíní ndo vaxi tachí chí xoo sur já cáchí ndo ña ihní ndivaha coo ta chí ihní ndusa sáhin. ⁵⁶ Có cúu ndó tá quiahva ndáa ndó. Cándaa vaha ini ndó ña cúu ñuyívi ta cándaa ini ndó cahan ndó ndá quéa coo tá sándehe ndó indiví. Joo có cúní ndó candaq ini ndó ña jánaha i nu ndo.

*Ndítahan caja vaha ndó xihín na có cúní ndohó
(Mt. 5:25-26)*

⁵⁷ Ndávaha có tává vaha ndó cuénta ndía quéa vaha ta ndía quéa a váha. ⁵⁸ Tá sácú ini na saha ndó cuhun ndó vecaa ta ndáca táhan ndó xihín na cán cuahan ndó nuú na jutixia, xíní ñúhú nducú ndó ndá quiahva ndique táhan máni tucu ndó xihín ná nani xíca ndó íchi cuahan ndo. Já quéa ná a cáñehe na cán ndohó cuhun ndó nu juéxe jáchi da cúu

juéxe cán ndiquiahva da ndohó ndáha policia ta policia cán chicaan da ndohó vecaa. ⁵⁹ Mé a ndaa ná cahan i xihin ndo ña tá ndácaan ndó vecaa jan chí a cána ndó janda quiahva ná chahvi ndihi ndó ña yíca ndo nuú da cán já janí da ndohó —nacachi Jesús xihin ná.

13

Cáhan Jesús ña ndítahan jándacoo ñayivi cuachi cája na

¹ Mé tiempo já naxinu coo java na ndicani na nu Jesús sahá ña nasahní Pilato java dataa estado Galilea nani jóco da nu Ndióxi. Ña cán quéa cáchi na ña nacatáhan níi da naxihí xihín níi quíti, rí jóco da. ² Anda já nacachi Jesús já xihin ná:

—Á cáhán ndo ña naxihí da Galilea yóho sahá ña íin chága cuachi da a juú ga java ga na Galilea. ³ A juú a já jáchi quiahva já ndihi ri saha ndohó va tá ná a jándacoo ndó cuachi cája ndó. ⁴ Sannahá ndivaha já naxihí sahun uní taa jáchi nandicava in torre naní Siloé jata ná. Á cáhán ndo ña nandicava torre cán jata na yóho jáchi nasahin chága cuachi na a juú ga na ñuu Jerusalén. Joo co cúu á quiahva já. ⁵ Mé a ndaa ná cahan i xihin ndo ña quiahva já ndihi ri saha ndohó va tá ná a jándacoo ndó cuachi cája ndó —nacachi Jesús xihin ná.

Sácu Jesús quiahva sahá in titó ñuhú, dó co cána cuhi nuu

⁶ Anda já nasacu Jesús in quiahva nu ná já nacachi a já xihin ná:

—In dataa najándeé da in titó ñuhú nu ñuhú dá. Ta tá nayaha tiempo já nasahan da sándehe da do

ñā á cána tító ñuhú nu do. Joo co mé rí nandinehe dá. ⁷ Anda já nacachi da já xihín da ndáá ñúhu dá cán: “Candehé, sa naxinu uní cuia já cuití quixi i ndúcú u tító ñuhú nu yító yóho. Ta coó ñaha cána nu do. Vaha chága ná cahndún do jáchi ndá chuun quea candichi uun dó cája táñu dó nu ñúhu i”, nacachi da xihín da ndáá ñúhu dá cán. ⁸ Anda já nacachi da ndáá ñúhu dá cán já xihín dá: “Quiahva ndó ñamaní, xitoho i ña ná coo too ga dó cuia víti ná jáyai i ñúhu saha do ta ná chicaan loho i tata saha do. ⁹ Ta xihín ña yóho jonáa cana cuíhi nu do. Ta tá coó ñaha cána nu do já cahnda ndó do tá cúni ndó”, nacachi mozo cán xihín xitoho da —nacachi Jesús.

Mé quivi ndiquehe ndée ñayivi ndája vaha Jesús in ñá xica tojo

¹⁰ Ta ndaja coo in quivi ndiquehe ndée ná já nasandacaan Jesús veñuhu jánaha tuhun Ndióxi nuú ñayivi. ¹¹ Ta mé ini veñuhu cán nasandacaan in ñáñaha, ña quíhvi sahun uní cuia. In ínima quini cúu rí naquihvi ini ñá ta nacaja rí ña ná nditojo ñá ta chí ni loho a cuú jándicaa ñá mé ñá. ¹² Tá naxini Jesús ña já nacana mé á ña já nacachi a já xihín ña: —Ndaja vaha i yohó viti —nacachi Jesús xihín ña.

¹³ Anda já nachojó a ndáha á jata ña chí mé hora já nandicaa yiquí cuñu ñá ta nacasáha ña cája cáhnu ñá Ndióxi. ¹⁴ Joo mé da cúu sacuaaha veñuhu cán nacasáha ndícuehe da jáchi nandaja vaha Jesús ñáñaha cán mé quivi ndiquehe ndée ná. Já nacasáha cáchi da cán já xihín ñayivi ndúu ini veñuhu cán já:

—Íin iñu quivi núná nu yó cája chúun í ta tañu quivi já cuu quixi ndó catátá ndo tá cúní ndo. Joo a quixi ndó catátá ndo quivi ndíquehe ndée yó — nacachi da xihín ná.

¹⁵ Anda já nacachi Jesús já xihín da sacuaḥa veñuhu:

—Co cúu ndó tá quiaḥva ndáa ndó. Cája mé ndó chuun quivi ndíquehe ndée yo tá ndaxí ndo tindiḡi á búrrō jana ndó sáhan ndó jácoho ndó ri ticuúí. ¹⁶ Ta viti candehé ndo ñáñáḥa yóho. Cúu ñá ñá naquixi chichi Abraham ta sa íin saḥun uní cuia naquehe cueḥe ña nacaja Satanás, mé tiñáhá sacuaḥa. Ta mé ndó cáhán ndo ña a váha toho nacaja i ña najaní i ñáñáḥa yóho ndáḥa cueḥe ña nandoho ñá tixi cuaḥá cuia. Joo mé a ndaa nanditahan nuú i janí i ña ndahá cueḥe yóho coo caja toho a cúu á quivi ndíquehe ndée yo — nacachi Jesús.

¹⁷ Tá nacachi Jesús ña yóho chí a juú quiaḥva nacacahan nuú na co cúní Jesús cán. Joo tóco ndihi java ga ñayivi cán cájii ndivaha ini na jáchi naxini na ña cája Jesús ña náhnu ndivaha.

*Sácu Jesús quiaḥva saḥá in ndíqui mostaza
(Mt. 13:31-32; Mr. 4:30-32)*

¹⁸ Tá nandihí já nacachi tucu Jesús já:

—Ná ndicani i nu ndó ndaja íin nu ndíquiaḥva ñayivi mé ná ndáḥa Ndióxi ña ná cacomí a cuéntá saḥa ná. ¹⁹ Cúu á tátuhun in ndiquí mostaza ña chíhin in dataa nu ñúhu dá. Ta mé ndíqui loho yóho sáhnu a janda quiaḥva ndúu a tátuhun in yitó cáhnu nu xínu coo laa chójó ri táca ri nu ndáḥa do — nacachi Jesús.

Sácú Jesús quiahva saha ndaja cája yusá naxiaa tá quée a xihin harina

(Mt. 13:33)

²⁰ Anda já nacachi tucu Jesús já:

—Ná ndicani i nu ndo ndaja in nu ndiquiahva ñayivi mé ná ndáha Ndióxi ña ná cacomí a cuénta saha ná. ²¹ Cúú á tátuhun tá cávaha na pan ta quée yusá naxaa xihin harina. Cúú á tátuhun tá cáva táhan in ñáñáha loho yusá naxaa xihin unj táhnda náhnu harina ña ná jánañu a tóco ndihi mé yusa cán —nacachi Jesús.

Táhán ndivaha yéhe nuú quihvi ñayivi cuhun na indiví

(Mt. 7:13-14, 21-23)

²² Nandiquehe Jesús íchi cuahan chí ñuu Jerusalén ta ndijáa ñuu náhnu xihin ñuu válí nu yáha jánaha mé á tuhun Ndióxi cuahan. ²³ Ta ndaja coo nandaca tuhun in da Jesús já nacachi da já xihin á:

—Xitoho í, á chá cuití va ñayivi cacuu na cacu ndaa ínimá cuhun chí indiví —nacachi da xihin Jesús.

Anda já nanducú ñehe Jesús tuhun já cáchí a já xihin dá:

²⁴ —Cúú á tátuhun in in yéhe táhán loho nuú ndihvi ñayivi indiví. Ña cán quéea xini ñuhú ndó ndihini ndó ndihvi ndó chí yéhe loho cán jáchi cuahá ndivaha ñayivi ndítihvi na ña quihvi na joo a cúu quihvi na. ²⁵ Jáchi tá quiahva in in xitoho vehe quiahva já in Ndióxi. Jáchi tá ná ndicoo da cúu xitoho vehe cán chícaji tuun da vití yéhe vehe da já xinu coo ndó cándichi ndó jata véhe cáni ndáha

ndó yéhé já cachi ndó já: “Á ndúyu ndó, xitoho i. Á a cája ndó ñamaní cuná loho ndó yéhé ná quihvi nde”, cachi ndó xihin dá. Ta já nducú ñehe da cán tuhun nu ndó cachi da já xihin ndo: “Cuáhán ndo jáchi co xini toho i ndohó.” ²⁶ Ta já casáhá mé ndó cachi ndó já xihin dá: “Cuahá tañu sa naxixi nde ta naxihi nde xihin ndo. Ta ní cáyé ñuu nde naxica nuu ndó najánaha ndó ñayivi.” ²⁷ Anda já nducú ñehe da cán tuhun nu ndo já cachi da já xihin ndo: “Sa nacahan vi xihin ndo ña co xini toho i ndá na cúu ndohó. Caxoo ndihi ndó nuú i jáchi cúu ndó ñayivi cája ndinuhu ña núu.” ²⁸ Ta cán ndusa quéa cuacu cóhó ndo ta casáhá cahñá nuhu ndó xihín ña cojo ini ndó. Jáchi cán cuni ndó Abraham xihín Isaac xihín Jacob xihín tóco ndihi na profeta. Cuni ndó ña ndúu na indivi cán ta cómí Ndióxi cuéntá saha ná. Ta a juú quiahva tahnda ini ndó jáchi tavá xoo Ndióxi ndohó ña ná a ndihvi ndó nu ndúu na cán. ²⁹ Jáchi xinu ñayivi ndúu ndijáá ñuyiví nu Ndióxi ta ndaca nduu na nuú cacomí Ndióxi cuéntá sahá ñayivi. ³⁰ Ta mé quivi cán já cuni ndó java ñayivi, na coó saha mé nuú ñayivi ta nduu na na íin chága saha nu Ndióxi. Ta cán cuni ndó java na ndíñehe jícó mé viti ta a cóo toho saha ná nu Ndióxi —nacachi Jesús.

Táhnda ini Jesús ta sácu a sahá ñayivi ndúu ñuu Jerusalén

(Mt. 23:37-39)

³¹ Mé quivi já naxinu coo java na fariseo nu Jesús já nacachi na já xihin á:

—Cuáhán inga ñuu coún jáchi sácú ini Herodes cahní da yohó —nacachi na xihín á.

³² Anda já nacachi Jesús já xihín ná:

—Cuáhán ndó caḥan ndó xihín da cátóó jándahvi ñayivi jan ta cachi ndó xihín dá ña táva i ínima quini ñúhu ini ñayivi ta ndája vaha i na quíhvi ta caja tá caja i ña yóho janda quiahva ná xinu coo quiví jándihi i chuun yóho. ³³ Joo sa mé Jerusalén jan quivi vi jáchi jan cúu nu sáhní na profeta. Ta viti nditahan caca nuu yí vi íchi xíca i cuahan i yóho —nacachi Jesús.

³⁴ Anda já nacachi tucu Jesús já:

—Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndícuíta ndó cáni ndó na nachindahá Ndióxi nu ndó xihín yuu. Cuahá ndivaha tañu cuni jánditaca ndíhi i ndohó joo coo naxeen ndó. Cúu á tá quiahva cája nduxú tá játaca rí jahyi válí ri tixi ndíxi ri. ³⁵ Ta viti cuni johó ndó ña cáhan i xihín ndó. Vaxi quiví janí ndáha mé vehe ndó candoo a. Ta mé a ndaa ná cahan i xihín ndó ña a cuni ga ndó yehe janda quiahva ná xinu coo quiví cachi ndó: “Cáhnú nahá ná cacuu da vaxi cuéntá Ndióxi, xitoho í” —nacachi Jesús.

14

Tá nandaja vaha Jesús in da naquihvi cuiñu

¹ Ta ndaja coo in quiví ndíquehe ndée ná já nasahan Jesús naxixi a vehe in da cúu sacuaḥa nuú na fariseo. Ta java ga na fariseo cán nacasáhá nání na Jesús ndúu na. ² Ta mé yati nu Jesús cán nasahiin in dataa, da naquihvi cuiñu yiquí cuñu. ³ Anda já nandaca tuhún Jesús na jánaha ley Moisés xihín na fariseo já nacachi a já xihín ná:

—Á núná nū yó ndaja vaha í in da quíhvi mé quívi ndíquehe ndée yó, á cō núná toho nū yó cája í ña —ñacachi Jesús xihín ná.

⁴ Joo táji ñasahiin yuhú na cán. Anda já nandaja vaha Jesús da quíhvi cán já ñacachi a xihín dá ña ná quee da cūhun da. ⁵ Ta já ñacachi a já xihín na fariseo cán:

—Mé ndó tá ndicava búrro á tindiQUI jana ndo ini in táhvi chí ivi laá tavá ndó ri. Ta cōó caja toho a á cúú á quívi ndíquehe ndée yó —ñacachi Jesús.

⁶ Joo cōó ñacuu nducú ñehe na tūhun nū Jesús.

⁷ Anda já ñaxini Jesús ña jandá joho ndáçaxi na ñataca cán nuú vaha cacoó na já ñajánaḥa nū ná ndía vaha chága ndítahan caja na. Já ñacachi a já:

⁸ —Tá ná cana in na yohó cūhun in vícō tándaḥa, a ndúcú tohún cacoún nū sácōo na náhnu. Jáchi cuu xinu cōo in da íin chága saḥa a juú ga yohó. ⁹ Ta da ñacana yohó vícō cán cuu cachi da já xūhun: “Quiḥva nū íin coún jan ná cacoó da yohó”, cachi da xūhun. Anda já cacahan nuun já queún cūhun cacoún janda nū ndíhí. ¹⁰ Ña ndítahan cajún quea cacoún janda nū ndíhí. Já quea tá ná xinu da ñacana yohó nū íún já cachi da já xūhun: “Amigo, cuáhán yaha nū ndúu na náhnu coún.” Xihín ña yóho ndindita jícún nuú na ndúu coo nū mesa xíxi xūhun cán. ¹¹ Jáchi ndá na cája cáhnu mé, na cán cacuu na ñanuu ndáha joho. Ta na cō ndíñehe jícó mé, na cán cúú na ndicáhnu —ñacachi Jesús.

¹² Anda já ñacahan Jesús xihín mé da ñacana ñahá cán já ñacachi a já xihín dá:

—Tá ná cavaḥa cuahún ña cajáhñu na á ña cajíni na, a cána tohún na cúú amigún jan ni na cúú

ñanún jan ta ni a cána tohún na cúu táhún ta ni a cánún na cuicá ndúu yati xuhun jan. Jáchi tá ná caja na víco cana ri na jan va yohó ta xihín ña jan táhnda cuéntá sahá ñamaní ñacajún xihín na cán. ¹³ Ña ndítahan cajún tá ná cavahún in víco quea canún na ndahví ta canún na réncó ta canún na cuaá. ¹⁴ Ta já cajii ínún jáchi na cán a cúu toho caja na चाहvi na ñamaní ñacajún xihín ná ñuyívi yóho. Joo vaxi quívi tá ná nditacu ñayivi ñasañehe ínima vaha ñuyívi yóho já चाहvi Ndióxi ñamaní ñacajún jan —ñacachi Jesús xihín ná.

Sácú Jesús quiahva sahá in dataa, da ñacana cuaha chá ñayivi ña ná cuhun na víco vehe da (Mt. 22:1-10)

¹⁵ Tá ñaxini johó in táhan da iin coo nu mesa xihín Jesús cán ña yóho já ñacachi da já xihín á:

—Tahví ñacuu na ná ñehe táhvi cuhun indivi ña ná cacomí Ndióxi cuéntá saha ná —ñacachi da xihín Jesús.

¹⁶ Anda já ñasacu Jesús in quiahva nu dá já ñacachi a já xihín dá:

—In dataa ñacavaha da in víco cáhnu ta ñacana cuahá ndivaha da ñayivi. ¹⁷ Ta tá sa ñaxinu coo hora cajini na já ñasahnda da chuun nu mozo da ña ná cuhun da cana da na ña quixi na ndaca nduu na nu mesa. Já ñacachi da já xihín ná: “Naha quíndo jáchi sa ñacandívi ndihi ñaha”, ñacachi mozo xihín na cán. ¹⁸ Joo tóco ndihi na cán ñacasáhá na cáhan na ña a cúu toho cuhun na. Ta in táhan da cán ñacasáhá cáchi da já xihín mé mozo cán já: “Jácá ñaxeen uun i in ñúhu ta xíní ñúhu cuhun i candehé e nu á. Cáhnu coo ínún”, ñacachi da

xihin mozo cán. ¹⁹ Ta inga da ñacachi da xihin mé mozo cán já: “Jácá ñaxeen e uhun yúntá tindi qui ta viti cúni cuhun i coto ndojó i ri. Cáhnu coo inún”, ñacachi da xihin mozo cán. ²⁰ Ta inga tucu da ñacasáhá cáhí da já: “Jácá ñatandaha vi sahá ña cán quéa a cúu toho cuhun i”, ñacachi da xihin mozo cán. ²¹ Tá ñandicó coo mozo cán nuú xitoho da já ñandicani ndihi da nuú xitoho da ña ñacachi na cán xihin dá. Anda já ñacasáhá ñandicuehe xitoho da cán já ñacachi tucu da já xihin mozo da: “Ta viti cuáhán camún ndijáá cáyé ñuu játacún na ndahvi xihín na réncó xihín na cuaá. Cañehún na quisún yóho ná cuxu na”, ñacachi xitoho da cán xihin dá. ²² Tá ñandihí já ñasahan mozo cán já ñacaja da ña ñacachi xitoho da xihin dá. Ta tá ñandicó coo da já ñacachi da já xihín xitoho da: “Sa ñacaja i tá iin ñasahnda ndó nuú i. Joo yójó tá yójó nuú cuu canduu chága na”, ñacachi da xihín xitoho da. ²³ Anda já ñacachi xitoho da já xihin dá: “Cuáhán ndijáá cáyé xihin ndijáá íchi ta xihín ña ndúsa játacún na ña ná quixi na já ná chutú vehe e. ²⁴ Jáchi ni in túhún toho táhan na ñacana i quixi vehe e nu cuítí cán, a quíxi ga na cajíni na ña ñacatáhan vehe e”, ñacachi da xihin mozo da — ñacachi Jesús.

Ndítahan jándacoo í ndá ña ndáyahvi nu yo tá ta mé a ndaa cúni yó candico yó Jesús

(Mt. 10:37-38)

²⁵ Cuahá ñayivi ndíco na jata Jesús cuahan na. Anda já ñandicó coo játa nuu Jesús já ñacachi a já xihin ná:

26 —Ndá nā cúnī jácuaaha xihín i xíní ñúhú quihvi ini chága nā yehe a juú ga tátá nā xihín náná na. Ta xíní ñúhú quihvi ini chága nā yehe a juú ga ñájíhí nā á jahyi na á ñani na á quiahva na. Ta xíní ñúhú quihvi ini chága nā yehe a juú ga mé ná. 27 Ta ndá nā cō ndíco yehe sahá ña yíhví nā quivi na, mé a ndaa cōo saha toho na cacuu na cuéntá yehe. 28 Tá cúnī ndó cavaha ndó in vehe jícó ña cája ndó quéa tavá vaha ndó cuéntá ña á queta jihún ndo á a quéta já ná jáxinu ndó ña. 29 Jáchi tá ná a tává jihna ndó cuéntá ta casáhá ndó cavaha ndó vehe ndó joo tá nandihí cō quéta ga jihún ndó ña ná jáxinu cōo ndó ña já quéa cacahan nuu ndo jáchi casáhá ñayivi cuacu ndaa na ndohó. 30 Já cachi na já xihín ndo: “Taa jan nacasáhá da cavaha da vehe da joo cōo nacuu jáxinu dá ña”, já cachi na cuacu ndaa na ndohó —nacachi Jesús.

31 Anda já nacachi tucu Jesús já:

—Tá ná caní táhan in rey, da cómí uxu mil soldado xihín inga rey, da cómí oco mil soldado já quéa xíní ñúhú ndicani vaha ini da ña á cuu quee vaha da xihín da inga rey cán tá ná quihvi táhan da xihín dá. 32 Ta tá natavá vaha da cuéntá ña a cuú quee vaha da xihín rey, da cómí oco mil soldado cán janda xicá va íin da já chindahá da java nataa ña ná cūhun da caca da ñamaní nuú inga rey cán ña ná ndico va tondóhó. 33 Quiahva já íin ri xihín ndóhó va. Ndá ndóhó, nā cō cúnī jándacoo tóco ndihí ña cómí ndo sahá yehe já quéa cōo saha toho ndó cacuu ndó cuéntá yehe —nacachi Jesús.

Cáhan Jesús ña tá jándacoo ñayivi íchi cuéntá mé á

cúu ná tátuhun ñii, ña co óhva ga
(Mt. 5:13; Mr. 9:50)

³⁴ Anda já ñacachi tucu Jesús já:

—Ña vaha ndivaha cúu ñii yívi na joo coó chuun toho a tá co óhva ña. ³⁵ Mé ñii, ña co óhva ga jan ni co váha ña jácana í nu ñúhu yo jáchi co ndáhá toho ñúhu yo cája ña. Ña cája na xihín ñii jan queá sátá va na ña. Na ín johó, ná cuni johó na —ñacachi Jesús.

15

Sácu Jesús quiahva sahá in ndicachi, rí nandiñúhú
(Mt. 18:10-14)

¹ Cuahá na játaca jiuhún cuéntá impuesto xihín cuahá na cája cuachi ñacasáhá na cáyati na nu ín Jesús jáchi cuni na cuni johó na nu cáhan mé á. ² Sahá ña cán queá ñacasáhá na fariseo xihín na jánaha ley Moisés cáhan núu na sahá. Já cáchí xihin táhan na já:

—Taa jan ndíquehe vaha da ñayivi cája cuachi ta xíxi da xihin ná —cáchí xihin táhan na cán.

³ Anda já ñasacu Jesús in quiahva nu ná já ñacachi a já xihin ná:

⁴ —Mé ndó tá cómí ndo in ciento ndicachi ta tá in cuití ndiñúhú in ndicachi jana ndo ña cája ndó queá jándacoo ndó comi jíco sahun comi rí cán yúcu ta já queé ndó cuahan ndó ndinducú ndó rí nandiñúhú cán janda quiahva ndiñehe ndó rí. ⁵ Ta tá ndiñehe ndó rí já cávatá ndo já quehe ndó rí chínúu ndó rí sahá jiqui ndo vaxi ndó. ⁶ Ta tá xínu coo ndó vehe ndó já játaca ndó ñani táhan

ndo xihín nà xíní táhan xihín ndó. Já casáhá cáchí ndó já xihín ná: “Xíní ñúhú cajúí íní ndó xihín i jáchí cajúí íní i sahá ña nandiñehé e ndicachi janá i, rí nandiñúhú cán”, cáchí ndó xihín ná. ⁷ Mé a ndaa ná cahan i xihín ndo ña quiahva já ta janda chága ví cajúí ini nà ndúu indiví tá jándacoo in ñayivi cuachi cája na a juú ga sahá comí jícó sahun comí ñayivi, nà cája tá cája ña vaha.

Sácu Jesús quiahva sahá in jiuhún, ña nandiñúhú

⁸ Ta viti ná cahan tucu u inga quiahva xihín ndo. In ñáñáha nasahiin uxu jiuhún caa ña yahvi ndivaha nu ña. Ta tá ndíñúhú in táhan ña cán já ndícahmi ñá ñúhu ta tíhví ñá vehe ñá jáchí ndíhi ini ñá ndínducú ñá ña ta vií vií ndínducú ñá ña janda quiahva ná ndiñehé ñá ña. ⁹ Ta tá sa nandiñehé ñá ña já játaca ñá ñani táhan ñá xihín nà xíní táhan xihín ña já casáhá cáchí ña já xihín ná: “Xíní ñúhú cajúí íní ndó xihín i jáchí cajúí ini i sahá ña nandiñehé e jiuhún i, ña nandiñúhú”, cachi ñá cán —nacachi Jesús.

¹⁰ Anda já nacachi tucu Jesús já:

—Mé a ndaa ná cahan i xihín ndo quiahva já cajúí íní tátó Ndióxi ndúu indiví tá jándacoo in ñayivi cuachi cája na —nacachi Jesús.

Tá najándacoo in dataa tátá da ta naquee da cuahan xicá da

¹¹ Anda já nasacu Jesús in quiahva nu ná já nacachi a já:

—In dataa nasahiin ivi jahyi taa da. ¹² Ta da loho chá cán nacachi da já xihín tátá da: “Taa i, á a váha ná ndicahnda va ndó ñaha cómí ndo já ná ndiquehe e ña cáni nuú i ndiquehe e”, nacachi

da cán xihín tátá da. Anda já nasahnda java tátá da ñaha, in táhnda ñaquehe mé dá ta in táhnda ñaquehe ñani da. ¹³ Ta chá va quiví nayaha já najicó ndihi da loho chá cán ñaha ña ñañehe dá nu tátá da ta xihín jjuhún nacana cán ñaquehe da cuahan xicá ndivaha da chí ñuu tóho. Ta cán ñacasáhá da jativí ndaja nacuu johu da jjuhún da ña caja da ña núu. ¹⁴ Ta tá sa najativí ndihi da jjuhún da já naxinu in tama ndeé ndivaha mé nu ín da cán. Já ñacasáhá naxinu joco nu dá ta ñacasáhá cuico da. ¹⁵ Anda já ñaquehe da nasahan da ndúcú da chuun caja da nuú in dataa mé nu ín da cán. Ta nasahan da cán chuun nu dá ña ná cuhun da candaa da cóchí janá da cán. ¹⁶ Ta tá cuni coo ndiava já cuni coo ña sáxí cóchí cán. Ta chí caxí da ña cán janda quiahva chutú tixi da cuni da. Joo co sahan na ña nu dá. ¹⁷ Anda já ñacasáhá da ndicani ini da já ñacahan da já: “Cuaha chá mozo táhan na caja chúun nu tátá i chí yójó johu ñaha xixáhan na ta yóho xihí va yehe joco ín i. ¹⁸ Ña caja i quea ndicó coo tucu u nu ín tátá i ta já cachi i já xihín ná: Tátá maní i, ñacaja i cuachi nu Ndióxi ta ñacaja ri cuachi nu ndóhó va. ¹⁹ Ta chí coo saha mí vi cacuu u jahyi ndó sahá ña ñacaja i. Ndiqeehe ndó yehe ná cacuu u tátuhun in mozo va ndó, já cachi i cuhun i nu tátá i”, ñacahan da. ²⁰ Anda já ñaquehe da íchi cuanúhu dá vehe tátá da.

’Ta janda xicá va vaxi da já naxini tátá da mé dá já nandicuni a da. Ta ñatahvi ini a saha dá. Já xínu a nasahan ñehé a da já ñanumi a da ta ñatati yúhu á sajóho da. ²¹ Anda já ñacachi da já xihín tátá da: “Tátá maní i, ñacaja i cuachi nu Ndióxi

ta nacaja ri cuachi nu ndóhó va. Ta chí coó saha mí i cacuu u jahyi ndó”, nacachi da xihin tátá da.
 22 Ta ndaja coo tátá da nacasáhá cáhan xihin java ga mozo já nacachi a já xihin ná: “Cama ndó ta tavá ndó jáhma, ña vaha ta jacandixi ndó jahyi i. Ta chicaan ndó in jéhe nducu ndáha dá. Ta chicaan ndó ndusa saha dá. 23 Ta cañehe ndó chélo, rí ndató nandaha jan já ná quivi rí cuxú jáchi caja i in víco viti. 24 Jáchi jahyi i yóho tá naquee da cuahan da nacahán i naxih*i* da. Joo viti nandicó coo da nuú i. Sahá ña cán cúu á tátuhun nanditacu tucu da. Nasacuu da tátuhun da nandiñúhú joo viti nandee va da”, nacachi tátá da cán. Anda já nacasáhá na caja na víco.

25 Joo ndaja coo da cúu ñani da, da sacuaha chága cán, ndácaan da caja chúun da yúcu va. Ta tá nandicó coo da já naxini joho da tívi musica ta cáxita sáhá na. 26 Anda já nacana da in da caja chúun cán já nandaca tuhún ñahá da ndia cúu. 27 Anda já nacachi da caja chúun cán xihin dá: “Cúu víco jáchi nandicó coo ñanún. Ta nasahnda tátún chuun ña ná quivi chélo, rí ndató nandaha cán jáchi cáji íni na ña nacasaa vaha ñanún ta coó a nandoho da”, nacachi da cán. 28 Joo ndaja coo da sacuaha cán najoo da ta chí coó naxeen da quihvi da nu cúu víco cán. Sahá ña cán naqueta tátá da jata véhe já cáhan ndahví a xihin dá ña ná quihvi da. 29 Anda já nacasáhá cáchí da já xihin tátá da: “Taá i, sa cándaa vaha ini ndó ña sa cuahá ndivaha cuia caja chúun i nu ndo ta caja i tócó ndihi ña sáhnda ndó nuú i caja i. Joo ni in túhún toho tañu coó nasahan ndó ni in tijúhu loho nuú i ña ná caja i in víco loho cuxu u xihin na xíni táhan xihin i.

³⁰ Joo viti *na*sahní ndó chélo, rí ndató *na*ndaha *jan*, ña cája ndó víco jáchi *na*casaa ñani i *jan*. Ta mé da *jan* *na*xica nuu da *na*játiví ndaja *na*cuu da *jiuhún* ndo *xihín* *na*jihí xíca *jií*”, *na*cachi da cán *xihín* tátá da. ³¹ *Anda* já *na*cachi tátá da já *xihín* dá: “Candehé *ja*hyi a. Mé a *nda*a níí tiempo íún *xihín* i. Ta ñaha mé vún cúú ndihi ña íin nuú i. ³² Joo mé a *nda*a ndítahan nu *yo* caja í víco ta *cajii* íní *yo* viti jáchi *na*ndicó coo ñanún, mé da *na*cahán *yo* ña *na*xihí. Ta viti *na*casaa da cúú á tátuhun *na*nditacu tucu da. *Na*sacuu a tátuhun *na*ndiñúhú da joo *na*ndiñehe *yó* da viti”, *na*cachi a cán *xihín* *ja*hyi a —*na*cachi Jesús.

16

Ndindaa chuun ndáha in mozo jáchi coó nacaja vaha da nuú xitoho da

¹ *Anda* já *na*sacu tucu Jesús inga *quia*hva nuú *na* xíca tuun *xihín* á. Já *na*cachi a já *xihín* ná:

—*Na*sahíin in *ta*a cuicá ta *na*sahíin in da ndáa ñaha da. Joo java ñayivi *na*sahan *na* *chica*an *na* *cuachi* *jata* dá nuú *xitoho* da ña *játiví* ndaja *na*cuu *joho* da ña cúú ñaha *xitoho* da. ² *Anda* já *na*cana *xitoho* da mé dá já *na*cachi da já *xihín* dá: “*Joho* cáhí ñayivi *na*quixi na cáhan *na* *sahun* *sahá* ña cán *quea* táxi i *cuénta* *nuun* ña *ndicanún* nuú i ndaja *cáa* *chuun* *na*cajún *jáchi* *ndindaa* *chuun* *ndáhun* ta a *cácuu* *gaún* da ndáa ñaha i”, *na*cachi *xitoho* da cán *xihín* dá. ³ *Anda* já *na*casahá da cúú *mozo* cán *ndícani* ini da já *na*cahán da já: “*Ndía* *caja* i viti *jáchi* *ndindaa* *va* *chuun* *nda*há i *caja* *xitoho* i. Ta *co* *ndée* *toho* i *caja* i *chuun* *vee*. Ta tá ná *caca* nuu i *cuati* i ta *cacahan* *va* *nuú* i. ⁴ *Sa* *xíni* *vi* *ndía* *caja*

i já ná ndiquehe vaha ñayivi yehe vehe na tá ná ndindaa chuun ndahá i caja xitoho i”, ñacahán da. ⁵ Anda já ñacana da tá in tá in ña yíca nuú xitoho da. Ta tá ñaxinu da nu cuití cán nu dá já ñandaca tuhún ñahá da já ñacachi da já xihín dá: “Ndaja yícún nuú xitoho i”, ñacachi da xihín da yíca cán. ⁶ Já ñanducú ñehe da cán tuhún já ñacachi da já: “In ciento lata sítí yíca i nuú xitohún”, ñacachi da cán xihín dá. Anda já ñacachi da cúú mozo cán já xihín dá: “Candehé nu tutu yóho ndáa ndaja yícún nuú xitoho i. Joo cacoo quíi jan ta cahyí ña yícún ivi jico uxu lata sítí cuití va”, ñacachi mozo cán xihín da yíca nuú xitoho da cán. ⁷ Tá ñandihi já ñandaca tuhún da inga da yíca nuú xitoho da já ñacachi da já xihín dá: “Ta yóhó ri ndaja yícún nuú xitoho i”, ñacachi da. Anda já ñanducú ñehe da yíca cán tuhún nu dá já ñacachi da já xihín dá: “In ciento maquila trigo yíca i nu dá”, ñacachi da cán. Anda já ñacachi tucu da ndáa ñaha cán já: “Candehé yóho ndáa ndaja yícún. Joo cacoo quíi jan ta cahyí ña yícún comi jico maquila trigo cuití va”, ñacachi da ndáa ñaha cán xihín dá. ⁸ Tá ñandihi já ñacachi xitoho da xihín dá ña mé a ndaa cúú dá in da ndíchí jiní jáchi xihín ña ñacaja da cán candoo vaha da nuú ñayivi yíca nuú xitoho da vatí coo ñacaja vaha da nuú xitoho da —ñacachi Jesús xihín quiahva sácú a nuú ña xíca tuun xihín á cán.

Anda já ñacachi tucu a já xihín ná:

—Ñayivi cátóo canduu vaha ñuyíví yóho xíni vaha chága ña ndaja cája na candoo vaha nu táhan na a juú ga ña sa xíca íchi cuéntá Ndióxi.

⁹ Ñayivi ndúu ñuyíví yóho cája na ña núu xihín ña

cómí ña. Joo ndóhó, xíní ñúhú caja ndó ndinuhu ña vaha xihín ña cómí ndo. Jáchi ña ñan quéa cúní Ndióxi caja ndó. Jáchi tá ná xinu quiví quiví ndó já ndiquehe vaha na ndohó indiví sahá ña ñacaja vaha ndó xihín ña ñasacomí ndo.

¹⁰ Ta ndá da xihín ndinuhu ini ndáá da ñaha da vatí loho cúú á quiahva já caja ri da candaa da ñaha da tá cuaha cúú á. Joo ndá da co ndáá da ñaha da xihín ndinuhu ini da vatí loho cúú á quiahva já a cándaa vaha da ñaha da tá cuaha cúú á. ¹¹ Ta tá co ndáá vaha ndó ñaha ñuyiví yóho já quéa ni Ndióxi a quiahva toho a ñaha cuéntá indiví nu ndo jáchi a catiahva ndó candaa ndó ña. ¹² Ta tá co tiáhva ndó candaa ndó ña ñasahan too inga na nu ndo, náha ña a cúu ndiquiahva na ña cacuu ñaha mé ndó nu ndo jáchi a catiahva ndó candaa ndó ña.

¹³ Ni in túhún toho mozo a cúu caja chúun nuú ivi xitoho. Jáchi candají da in xitoho da ta inga xitoho da quihvi ini chága da. Á tá coó ta caja ndíví vaha da chuun nuú in xitoho da ta inga da cán a cája chúun vaha da nuu. Ta quiahva já in ri xihín ndóhó va jáchi a cúu caja cáhnu ndó Ndióxi tá chínúu ndó ínima ndó jatá jihún ndo —ñacachi Jesús.

¹⁴ Ta nu cáhan Jesús cán ndíta ña fariseo, ña catóo ndivaha jihún táa johó na nu cáhan mé á. Ta ñacasáhá ña sácú ndaa na Jesús. ¹⁵ Anda já ñacachi Jesús já xihín ná:

—Cája ndó tátuhun cúú ndó ñayivi vaha nuú ñayivi joo sa xíní vaha Ndióxi ínima ndo. Ndá ña cáhvi ini ñayivi ndayahvi chága, ña ñan quéa co ndayahvi nu Ndióxi —ñacachi Jesús xihín ná.

Ndítahan nuú ñayivi caja na ña nasahnda Ndióxi anda quiahva ná naá saha ñuyívi xihín indiví

¹⁶ Anda já nacachi tucu Jesús já:

—Janda tá cámaní xinu Juan, da nacaja ndúta ñayivi já nasahin ley Moisés xihín ña najánaḥa na profeta sanahá. Joo viti ndijáá ndícuíta nuu tuhun Ndióxi cuahan ña vaxi quivi cacomí Ndióxi cuénta sahá ñayivi. Ta ndá na cuni ndiquiahva na mé ná ndáḥa Ndióxi ndítahan nu ná ndihi ini na ndihvi na ichi cuénta mé á.

¹⁷ Joo janda quiahva ná naá saha ñuyívi xihín indiví ndítahan nuú ñayivi caja na tóco ndihi ña sáhdá ley. Jáchi janda vaha chága ín a ná ndihi sahá ñuyívi xihín indiví a juú ga ña ná ndihi sahá in túhún tuhun ndácaan nu ley Moisés —nacachi Jesús.

Tá jándacoo táhan na sa natandaha

(Mt. 19:1-12; Mr. 10:1-12)

¹⁸ Anda já nacachi tucu Jesús já:

—Tá jándacoo in dataa ñájíhí da ta tándaha dá xihín inga ñáñáḥa já quéa cája da cuachi nu Ndióxi. Ta ndá da tándaha xihín in ñáñáḥa, ña najándacoo yíi, cája ri da cán va cuachi nu Ndióxi —nacachi Jesús.

Ña nandoho in da cuicá xihín ña nandoho in da naní Lázaro

¹⁹ Ndícani Jesús nuú ñayivi já nacachi a já xihin ná:

—Nasahin in da cuicá ta a juú quiahva vaha jáhma nasandixi da ta chí a juú quiahva ñúchí nacaja cutú da vehe da jáchi ndijáá ní quivi nasacaja da víco nu xixáhan cuicá ndivaha da. ²⁰ Ta

ñasah̄iin in ða ndah̄ví naní Lázaro. Quíhv̄i ða ta ndóho da cuehe nd̄ihi táhyi. Ta ndáh̄ví cáa ða ín coo da nu ñúhu yuyéhé ða cuicá cán. ²¹ Ta mé ða ndah̄ví yóho cúni ða jáchutú ða tixi da xih̄ín ña ndícava nu mesa ða cuicá cán. Ta xih̄ín ña ndeé quíhv̄i ða ndah̄ví yóho chí janda tina xínu coo rí yácó ndaa rí nuú nd̄ihi nanana ní ða cán. ²² Ta ndaja coo in quiv̄i ñaxih̄i ða ndah̄ví cán. Já ñaxinu tátō Ndióxi já ñéhe na ða cuahan ða coo da indivi nu ín Abraham. Ta jári ða cuicá cán va ñaxih̄i ða ta ñasahan ña najánduxu ná ða. ²³ Ta nani ndóho ini ða cuicá cán ndácaan ða indayá já ñandiñehe da nuu dá. Já ñaxini xicá ða Abraham. Ta ñaxini da ín Lázaro xih̄ín dá. ²⁴ Anda já ñacasáhá ða cuicá cán cáyuhú ða já ñacachi da já: “Tátá Abraham, candáh̄ví loho ini ndó yehe. Ta ná chindahá ndó Lázaro ná quixi da yóho quiahva loho da ticuif jándaxi loho da yaá i jáchi ndóho ndivaha ini i indayá yóho nu cáyi ñuhú ita.” ²⁵ Anda já ñacachi Abraham já xih̄ín dá: “Jah̄yi a, xíní ñúhú ndicuhun inún ña vaha ndivaha ñasahiún ñuyíví. Ta Lázaro yóho ndáh̄ví ndivaha ñandoho da ñuyíví sahá ña cán quéa co ndóho ga ini da yóho viti nani ndóho inún ñan viti. ²⁶ Ta a cúu saá toho Lázaro nu iún ñan jáchi ín in táhv̄i cúná ndivaha tañu ndehe, ña ndúu xoo chóho xih̄ín ndóhó, ña ndúu xoo chí ñan. Sahá ña cán quéa a cuú cuhun ña ndúu xoo chóho chí ñan ta ni ña ndúu xoo chí ñan a cuú quixi xoo chóho”, ñacachi Abraham xih̄ín ða cán. ²⁷ Anda já ñacachi ða cuicá cán já xih̄ín Abraham: “Tá ta já ta caja loho ndó ñaman̄i, tátá Abraham ña ná chindahá loho ndó Lázaro ña ná cuhun ða vehe tátá i ²⁸ ná cahan loho da xih̄ín ña vehe e. Jáchi

ndúu uḥun ñani i ta cō cūni i ña ná quixi na cán yóho ndoho ini na tá quiahva ndóho ini i viti”, naçachi da cuicá cán xihín Abraham. ²⁹ Joo nanducú ñehe Abraham tuhun nu dá já naçachi da já xihín dá: “Sa ñin va ley naçahyí Moisés xihín ña naçahyí na profeta nuú na cán. Vaha va ná caja na ña cáchí a”, naçachi Abraham xihín dá. ³⁰ Anda já nanducú ñehe da cuicá cán tuhun nu Abraham já naçachi da já xihín dá: “Mé a ndaa quea cáhan ndó jan, tátá Abraham. Joo vaha chága ná chindahá ndó in táhan na sa naxihí já ná cahan na xihín ñani i já ná jándacoo cama na cuachi cája na”, naçachi da xihín Abraham. ³¹ Anda já naçachi tucu Abraham já xihín dá: “Tá cō cūni ñanún caja da ña naçahyí Moisés xihín ña naçahyí na profeta quiahva já a cándusa toho ri na ndiquehe vaha na in ndii tá ná nditacu a cuhun a cahan xihín ñanún”, naçachi Abraham xihín da cuicá cán —naçachi Jesús xihín ñayivi.

17

*Tá jácahan táhan ñayivi caja na cuachi
(Mt. 18:6-7, 21-22; Mr. 9:42)*

¹ Anda já naçachi Jesús já xihín na xíca tuun xihín á:

—Níi tiempo quixi ñaha ña cája ña ná ndicají ini ñayivi caja na cuachi. Joo ndáhvi naçuu na tá ná jándicava na inga na nuú cuachi. ² Janda vaha chága ná candico in yuú yojó jico ná ta ná ndihi saha ná cahá tañuhú a juú ga ña jándicava na na ndáhvi yóho nuú cuachi. ³ Cuéntá coo ndó xihín ña cája ndó.

ʼTá ná caja ñani táhan ndó cuachi nu ndo, jánani ndó da. Ta tá ná tahvi ini da sahá cuachi nacaja da, caja cáhnu ini ndó saha dá. ⁴ Ta vatí usa táhnda ná caja da cuachi nu ndo in quivi ta já vaxi tucu da nu ndo usa táhnda ta já cásahá cáchi tucu da xihin ndo ña a ndicó coo ga da caja da ña já ndítahan nu ndó caja cáhnu ini ndó saha dá —nacachi Jesús.

Cúni na xica tuun xihin Jesús candeé cáhnu chága ini na mé á

⁵ Tá nandihí já nacachi na xica tuun xihin Jesús cán já xihin á:

—Vá ná caja ndó ña ná candeé chága ini nde ndohó —nacachi na xihin á.

⁶ Anda já nacachi Jesús já xihin ná:

—Tá ná candeé ini ndó yehé vatí cúú á tátuhun in ndiquí mostaza cuu cachi ndó xihin in yito cáhnu ña ná cuhun dó candichi dó ini tañuhú ta chí já ndusa coo.

Ña ndítahan caja in da nuú xitoho da

⁷ Tá ín in mozo ndo ta chindahá ndó da yucu ña ná tiin da yata á candaa da quití jana ndo ta tá ná ndicó coo da cán já ama ná cachi ndó xihin dá ña ná yaha da cacoo da nu mesa cuxu da. ⁸ Ña caja ndó quéa cachi ndó já xihin dá: “Jácatáhan ñaha ná cajíni i ta caja ndíví ná cuxu u. Ta tá sa nandihí naxixi i já cuxu mún tá cúnun”, ña jan va quéa cahan ndó xihin mozo ndo. ⁹ Ta ama ná ndiquiahva ñayivi ndixahvi nu mozo na tá nandihí nacaja da in chuun nasahnda na nu dá caja da. ¹⁰ Ta quiahva já ndítahan coo ri xihin ndóhó va. Tá ná ndihí nacaja ndó tóco ndihí chuun nasahnda Ndióxi nu ndo já ndítahan nu ndó cachi

ndó já: “Mé nde cúu nde mozo coó saha ta nacaja cuití va nde chuun ndítahan nuú nde caja nde”, já ndítahan cachi ndó —nacachi Jesús xihín na cán.

Tá nandaja vaha Jesús uxu taa ndóho cuehe táhyi

¹¹ Ta nani xíca Jesús cuahan chí ñuu Jerusalén já nayaha chí xoo nu ín lindero na Samaria xihín na Galilea. ¹² Ta tá naxinu coo a in ñuu loho já naqueta uxu taa ndóho cuehe táhyi nu á joo nasacuíta xíca da nu á. ¹³ Já nacasáhá cáyuhú da nu Jesús já nacachi da já xihín á:

—Jesús, maestro, candáhví loho ini ndó ndehe —nacachi da xihín Jesús.

¹⁴ Tá naxini Jesús ndíhuxu da cán já nacachi a já xihín dá:

—Cuáhán ndó naha ndó mé ndó nuú na cúu jutú —nacachi Jesús xihín dá.

Ta nani xíca ndihi da cuahan da nandivií yiquí cuñu da ta nandindaa cuehe da. ¹⁵ Ta ndaja coo in táhan ndíhuxu da cán tá naxini da ña nandivií yiquí cuñu da já nacavatá ndivaha da. Ta nacasáhá da cája cáhnu da Ndióxi cáyuhú cóhó da já nandicó coo da nu Jesús. ¹⁶ Já nacaxítí da nu á janda quiahva naxinu taan da nu ñúhu jáchi ndiquiahva ndivaha da ndixahvi nu á. Ta mé dataa yóho cúu dá da Samaria. ¹⁷ Anda já nacachi Jesús já xihín dá:

—Uxu cúu da nandivaha nacaja i. Joo in da cán coo naxeen toho da ndicó coo da ndiquiahva da ndixahvi nuú i. ¹⁸ In túhún da tóho yóho cuití va cúu da nandicó coo ndiquiahva ndixahvi nu Ndióxi —nacachi Jesús.

¹⁹ Anda já nacachi Jesús já xihín dataa cán:

—Candichi ta cuáhán. Nandivahún jáchi ñacandúsún yehe —ñacachi Jesús.

Ndaja coo tá ná xinu coo quivi cacomí Ndióxi cuéntá sahá ñayivi

(Mt. 24:23-28, 36-41)

²⁰ Ta ndaja coo ña fariseo ñacasáhá ña ndáca tuhún ña Jesús ña ndá ama casáhá Ndióxi cacomí a cuéntá sahá ñayivi. Anda já ñanducú ñehe Jesús tuhun nu ná já ñacachi a já xihin ná:

—A cúu cuni ndó nuú cacomí Ndióxi cuéntá sahá ñayivi. ²¹ Coó toho ñayivi cachi xihin ndo: “Yóho ín a”, á “Cáa ín a.” Mé a ndaa ná cahan i xihin ndo sa ñaxinu va quivi ta viti tañu mé ndó ñacasáhá cómi Ndióxi cuéntá sahá ñayivi —ñacachi Jesús xihin ña fariseo cán.

²² Anda já ñacasáhá cáchi a já xihin ña xica tuun xihin á:

—Vaxi quivi tá cúni ndó cuni ndó yehe, ña ñachindahá Ndióxi nduu ñayivi vatí ná coo i in quivi cuití va. Joo a cóo toho i xihin ndo. ²³ Ta queta ñayivi cachi xihin ndo: “Yóho ín da.” Á tá coó ta cachi na xihin ndo: “Cán ín da”, cachi na xihin ndo. Joo coto a cuhun ndó candehé ndo. A cándico ndó jata ná cuhun ndo. ²⁴ Jáchi tá ná xinu ndusa quivi quixi yehe já cuni ndó quixi i tá quiahva quixi tasa. Ta ndijáá ñayivi cuni na ndá quiahva ndiyehé a tá xoo tá xoo. Quiahva já coo tá ná xinu quivi quixi yehe, ña ñachindahá Ndióxi nduu ñayivi. ²⁵ Joo jihna ñúhú ndítahan nuú i ndoho ndivaha ini i. Ta a juú quiahva candají ñayivi ndúu tiempo viti yehe.

²⁶ Tá quiahva ñasahiin tiempo tá ñasahiin Noé

sanahá quiahva já coo ri tá ná xinu coo quiví quixi ri yehe, da nachindahá Ndióxi nduu ñayivi. ²⁷ Jáchi mé tiempo cán xíxi na ta xíhi na ta cája na vicó tándaha janda quiahva naxinu quiví naquihvi Noé ini barco cáhnu. Já naxinu javi quíni ndivaha ta najahvi ñuyiví xihín ticuúí já naxihí ndihi ñayivi nasanduu tiempo cán. ²⁸ Ta quiahva já nasahiin ri mé tiempo tá nasatacu Lot sanahá. Jandá joho cáxixi ñayivi ta jandá joho cáxihí na ta jandá joho xéen na ñaha ta jandá joho jíco na ñaha ndúu na jandá joho cáxutu na ta jandá joho cávaha na vehe na. ²⁹ Ta tá naxinu quiví najándacoo Lot ñuu Sodoma cán já naqueta da cuahan da xihín na vehe da já nacuyu ñúhu xihín yuu cáyi chí indiví ta já naxihí ndihi ñayivi nasanduu cán. ³⁰ Quiahva já caja ñayivi mé tiempo já jáchi ndihi ini na catacu na janda quiahva xinu coo quiví quixi tucu yehe ñuyiví yóho, mé da nachindahá Ndióxi nduu ñayivi.

³¹ Ta ndá ndó, na ndúu jata véhe ndó mé quivi já a quihvi ndó ini vehe ndó ña tavá ndó ñaha cómi ndó. Ta ndá ndó, na ndúu yucu a ndíxi ndó vehe ndó. ³² Ndítahan ndicuhun ini ndó ndaja nandoho ñá cúu ñájíhí Lot jáchi nacava játa nuu ña sándehe ñá ña najándacoo ñá ta já nandihí saha mé ñá cán. ³³ Ndá na chínúu ínima játa ñaha ñuyiví yóho, na cán cúu na ndihí saha. Joo ndá na ndíquiahva mé ndáha mí i ta ín tiahva na quivi na sahá i, na cán cúu na catacu anda ama cáa quivi.

³⁴ Mé a ndaa ná cahan i xihin ndo ña tá ná xinu quiví cán já ndiquehe e na cúu cuéntá mí i. Cacuu a tátuhun tá ndúu ivi na quíji na in xito ta

in na ndiquehe e ta inga na candoo va sahá ña coó naçandúsa na mí i. ³⁵ Ta tá ndúu ivi na ndíco na ta in ña ndindita cuhun xihín i ta inga ña candoo va. ³⁶ Ta tá ndúu ivi dataa yucu xutu da ta in da ndindita cuhun xihín i ta inga da candoo va — naçachi Jesús.

³⁷ Tá naxini joho na xíca tuun xihín Jesús ña yóho já nandaca tuhún na mé á já naçachi na já xihín á:
—Ta ndachi yaha tóco ndihi ña cáchí ndó xihín nde yóho, xitoho.

Anda já naçachi Jesús já xihín ná:

—Tá quiahva cája tiyocó tá táca ri nu cándúhu in quiti, rí naxihí quiahva já caja ñayivi taca na nuú i tá ná xinu quiví quixi i —naçachi Jesús.

18

Tá naxica in ña cuáan ñamaní nuú da cúu juéxe

¹ Nasacu Jesús in quiahva nu ná jáchi xihín quiahva yóho cúní a jánahá nu ná ña ní tiempo xíní ñúhú caça tahví na nu Ndióxi ta co ndítahan cuitá ini na xihín á. ² Já naçachi a já xihín ná:

—In ñuu nasahin in juéxe ta coó nasahin toní ñúhú da xihín Ndióxi ta ni co sáhní da mé dá cúu ñayivi. ³ Ta mé ñuu cán nasahin in ña cuáan. Ta ndijáá ní quivi sáhan ña cáhan ndahví ña xihín mé juéxe cán ña ná caja vií da sahá ña sahá in na co cúní táhan xihín ña. ⁴ Ta sa cuahá quivi ta já cúu va ña sáhan ña nu dá ta co cúní da caja vií da saha ña. Joo tá nandihí já naçahán da já: “Vatí coó toní ñúhú i xihín Ndióxi ta ni co sáhní i mí i cúu ñayivi ⁵ joo já caja tá caja vií i saha ña cuáan yóho jáchi jándihí ndivaha ña yehe sahá ña cán ndiquehe e saha ña

já ná a quíxi ga ñá jándihí ñá ini i”, ñacahán da cúu juéxe cán —ñacachi Jesús xihín ná.

⁶ Anda já ñacachi Jesús já xihín na ndúu cán já:

—Ña yóho quéa ñacachi juéxe, da co ñéhe ínima vaaha cán. ⁷ Joo cáhnu ga ví ñaha caja Ndióxi tá ná ndiquehe a sahá na cúu cuéntá mé á tá xíca tahví na nu á ñuu ta ndiví. Jáchi ndáti tiahva chindeé a na cúu cuéntá mé á. ⁸ Mé a ndaa ná cahan i xihín ndo ña ivi laá ndiquehe mé á saha ná. Joo in ñaha cúni ndaca tuhún i ndohó. Á ndiñehé e ñayivi cándéé ini na yehe tá ná xinu quiví quixi tucu u ñuyiví yóho —ñacachi Jesús xihín ná.

Sácú Jesús quiahva sahá in da fariseo xihín sahá da jåtaca jiuhún cuéntá impuesto

⁹ Anda já nasacu Jesús inga quiahva nuú java ñayivi, na ndiñehé jícó mé, na cáhan ña mé cuití na cája ña vaaha. Ta já ñacasáhá cáchí a já xihín ná:

¹⁰ —In tañu ivi tañ nasahan da veñuhu caça tahví da nu Ndióxi. In táhan da cán cúu fariseo ta inga da cán cúu da jåtaca jiuhún cuéntá impuesto.

¹¹ Ta nani xíca tahví da fariseo cán nu Ndióxi cándichi da já cáchí da já: “Tátá Ndióxi, ndiquiahva i ndixahvi nu ndo jáchi co cája i tá quiahva cája java ga ñayivi. Jáchi java na cája cuihná na ta quini cája na ta cátóo na coo na xihín ñájíhí ñani táhan na. Ta jári ndiquiahva i ndixahvi nu ndo jáchi co cája i tá quiahva cája da jåtaca jiuhún cuéntá impuesto yóho. ¹² Jáchi yehe ivi tañu xíjuhun i in in semana ta tá cháhvi na yehe sahá chuun cája i já cávaha i uxu táhndá ta já jóco i in táhndá nu mé ndó”, cáchí da fariseo cán. ¹³ Joo da jåtaca jiuhún cuéntá impuesto cán xíca xíca ñasandichi da ta chí ni nuu

dá cõ cúnî da ndiñehe da indiví sahá ña cáhán da ña cõõ saha dá caja da ña. Ña cája da quea cani da yica ndicá da ta já cáhî da já xica tahví da nu Ndióxi: “Tátá Ndióxi, candáhvî ini ndó yehe jáchi cúú ù in da cája cuachi”, cáhî da. ¹⁴ Mé a ndaa ná cahan i xihin ndo ña nacaja cáhnu ini Ndióxi sahá da jåtaca jiuhún cuéntá impuesto já cuanúhu va da joo cõõ nacaja cáhnu ini a sahá da fariseo cán. Nacaja cáhnu ini Ndióxi sahá da jåtaca jiuhún cuéntá impuesto jáchi ndá na ndiñehe jícó mé jánuu ndáha Ndióxi na. Joo ndá na jánuu mé nu Ndióxi já jándiñehe jícó mé á na —nacachi Jesús xihin ná.

Cája yîi Jesús na valí

(Mt. 19:13-15; Mr. 10:13-16)

¹⁵ Ta cuahá ñayivi ñehe na na valí naxinu cõõ na nu Jesús já ná cani ndaa ndáha á na. Joo tá naxini na xica tuun xihin Jesús cán ña yóho, nacasáhá na cája cuehe na xihin mé na ndáca na valí cán. ¹⁶ Joo nacana Jesús na já nacachi a já xihin ná:

—Quiahva ndó ñamanî ná quixi na valí nuú i. Ta a cájî nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. ¹⁷ Mé a ndaa ná cahan i xihin ndo ndá na cõ cúnî ndiquiahva na mé ná ndáha Ndióxi tátuhun cája na valí yóho já quea a cúu cacomí Ndióxi cuéntá saha ná —nacachi Jesús xihin ná.

Cáhan in da cuicá xihin Jesús

(Mt. 19:16-30; Mr. 10:17-31)

¹⁸ In táhan da sáhdá chuun cán nandaca tuhún da Jesús já nacachi da já xihin á:

—Maestro, mé ndó cúú ndó taa vaha ña cán quea ndáca tuhún i ndohó ndía ndítahan caja i já ná ñehe

táhvi i cuhun i indiví coo i anda ama cáa quivi —
nacachi da xihin Jesús.

19 Anda já nacachi Jesús já xihin dá:

—Ndá cuéntá quéa cáchún xihín i ña cúu u da
vaha. Ni in túhún toho ñayivi co cúu ná na vaha
ñuyiví yóho. In túhún Ndióxi cuití va quéa vaha.

20 Sa xini vún ña sáhdá Ndióxi nuun cajún já cáchi
a já: “Coto a coún xihin ñájíhí á yí ñani táhún. Coto
a cáhnún ndii. Coto a cája cuíhnún. Coto a cahun
ña tuhún sahá ñayivi. Ta caja cáhnún tátún nánún”
—nacachi Jesús xihín da cuicá cán.

21 Anda já nanducú ñehe da cán tuhun nu Jesús
já nacachi da já xihin á:

—Janda ta loho i nacasáhá i cája i tóco ndihi ña
sáhdá Ndióxi caja i —nacachi da xihin Jesús.

22 Tá naxini johó Jesús ña nacachi da yóho xihin
á já nacachi a já xihin dá:

—Inga ñaha cámani cajún: Cuáhán jicún tóco
ndihi ñahún jan ta ndicahnda jjuhún jan nuú na
ndahví já ñehe táhvun coo cuahá ñahún indiví.
Ta tá nandihí já quisún candicún yehe —nacachi
Jesús xihin dá.

23 Tá naxini johó da cuicá cán ña nacachi Jesús
xihin dá já nacacuéha ndivaha ini da jáchi ín
cuahá ndivaha ñaha dá. 24 Tá naxini Jesús ña
nacacuéha ini da cuicá cán já cáchi a já:

—Ndaja yancá ndivaha cáa já ndiquiahva na
cuicá mé ná ndáha Ndióxi ña ná cacomí a cuéntá
saha ná. 25 Jáchi janda cama chága cuu yaha in
camello ini in yávi saha yítucú a juú ga ña ná
ndiquiahva in na cuicá mé ná ndáha Ndióxi ña ná
cacomí a cuéntá saha ná —nacachi Jesús.

26 Tá naxini johō ñayivi ndíta cán ña ñacachi Jesús já ñacachi na cán já:

—Ndá na cúu na cuu cacu ndaa ínima, dá já.

27 Anda já ñacachi Jesús já xihín ná:

—Ndióxi quéa cuu caja tóco ndihi ñaha vatí ñayivi a cuú caja na ña —ñacachi Jesús xihín ñayivi ndúu cán.

28 Anda já ñacachi Pedro já:

—Candehé ndo, xitoho i. Ndehe najándacoo nde tóco ndihi ña nasacomí nde ta ndíco nde ndohó —ñacachi da xihín Jesús.

29 Anda já nanducú ñehe Jesús tuhun nu dá já ñacachi a já:

—Mé a ndaa ná cahan i xihín ndo ña ndá na jándacoo vehe á tátá náná na á ñani na á ñájíhí na á jahyi na sahá ña cúni na ña ná cacomí Ndióxi cuéntá saha ná, ³⁰ na cán cúu na ñehe cuaha chága ñaha ñuyívi yóho jatá tóco ndihi ña najándacoo na. Ta vaxi quívi já ñehe táhvi ri na catacu na indiví anda ama cáa quívi —ñacachi Jesús.

Cáxi tuhun tucu Jesús ña quívi a

(Mt. 20:17-19; Mr. 10:32-34)

31 Tá nandihí já natavá xóo Jesús ndíhuxu ivi na xíca tuun xihín á cán. Já ñacachi a já xihín ná:

—Viti cohó chí ñuu Jerusalén nuú xinu coo tóco ndihi ña ñacahyí na profeta sahá yehe, da ñachindahá Ndióxi nduu ñayivi. ³² Jáchi mé ñuu cán tiin na yehe já ndiquiahva na yehe ndahá na tóho. Cuacu ndaa na yehe. Canahá na xihín i. Cuihna ndaa na tójí na yehe. ³³ Cani na yehe. Ta tá nandihí já cahní na yehe. Joo tá ná yaha uní quívi já nditacu tucu u tañu na naxihí —ñacachi Jesús.

³⁴ Joo na xíca tuun xih̄in á cán ni loho coó naçandaa ini na ña cún̄i Jesús cachi a xih̄in ná. Jáchi cúú á ñaha ña coó naçuu candaã ini na saha.

Tá nandaja vaha Jesús in da cuaá ñuu Jericó
(Mt. 20:29-34; Mr. 10:46-52)

³⁵ Tá naçayati Jesús ñuu Jericó cán ta yati j̄in íchi nu xíca mé á cuaḥan cán ín coo in da cuaá sáti da.

³⁶ Ta tá naçini joh̄o da ña yáha cuaḥá ñayivi cuaḥan na já naçasáhá da ndáca tuhún da ndíã cúu. ³⁷ Anda já naçachi na já xih̄in dá:

—Jesús, da ñuu Nazaret, da cán cúú da yáha cuaḥan yóho —naçachi na xih̄in dá.

³⁸ Anda já naçasáhá da cuaá cán cáyuhú da já cáchi da já:

—Jesús, da naçixi ch̄ichi David, caja ndó ñamañi candáhv̄i loho ini ndó yeḥe —cáchi da.

³⁹ Joo ñayivi, na cán̄uú cuaḥan xih̄in Jesús cán naçasáhá na cája cueḥe na xih̄in dá ña ná caji da yúhu dá. Joo ví ga ví naçasáhá da cáyuhú da já cáchi tucu da:

—Ndóhó, da naçixi ch̄ichi David, caja ndó ñamañi candáhv̄i loho ini ndó yeḥe —cáchi da cáyuhú da.

⁴⁰ Anda já naçandichi Jesús já naçahnda chuun ña ná cañeḥe na da cuaá cán nu á. Ta tá naçinu da nu á já nandaca tuhún a da. ⁴¹ Já naçachi a já xih̄in dá:

—Ndíã cúnun ná caja i xuhun —naçachi Jesús xih̄in dá.

Anda já nanducú ñeḥe da cuaá cán tuhun nu á já naçachi da já:

—Ndaca ndehé e cún̄i i, xitoho i —naçachi da.

⁴² Tá nandihi já naçachi Jesús já xih̄in dá:

—Candehé viti. Nandivahún jáchi cándéé inún yehe —ñacachi Jesús xihín dá.

⁴³ Chí ivi laá nanuna nuú da cuaá cán. Ta chí a juú quiahva cája cáhnu da Ndióxi. Ndíco da Jesús cuahan da. Ta jári tóco ndihi ñayivi tá naxini na ña yóho já ñacasáhá na cája cáhnu na Ndióxi.

19

Tá cáhan Jesús xihín in da naní Zaqueo

¹ Tá nandihí já nandihvi Jesús ñuu Jericó cán já xíca mahñú ñuu cuahan. ² Ta cán ñasahjin in da cuicá naní Zaqueo, da cúu da sacuaḥa nuú na játaca jiuhún cuéntá impuesto. ³ Ta cúní da cuní da Jesús joo a cuú cuní ñahá da jáchi cáti cuahá ndivaha ñayivi nu Jesús. Ta mé dá co xínu co da cuní ñahá da jáchi cúu dá da ndihí. ⁴ Chí xínu da ñacanúu da nuú ñayivi cuahá cán já nandaa da nuú in yító yati mé jín íchi, mé nuú yaha Jesús cán ña ná cuní ñahá da. ⁵ Ta tá nayaha Jesús yati saḥa yító cán já nandiñehe nuu á nu cánúu da cán. Já ñacachi a já xihín dá:

—Zaqueo, cuánuu quí jáchi cúní coo tóo i vehún quiví víti —ñacachi Jesús xihín dá.

⁶ Anda já ndáva nihni Zaqueo nanuu da nu yító cán. Já cávatá da nandiquehe vaha da Jesús cañehe da a cuahan da xihín á vehe da. ⁷ Joo tá naxini tóco ndihi java ga ñayivi cán ña yóho já ñacasáhá na cáhan núu na saḥa Jesús. Ta cáhí na ña cuahan mé á coo tóo a vehe in dataa, da cája cuahá cuachi. ⁸ Ta tá sa ndúu ndihi na vehe Zaqueo já nandaca ndichi Zaqueo já ñacachi da já xihín Jesús:

—Candehé ndo, xitoho i. Cahnda java ndaa i ñaha cómí i ta já ndicahnda i ña nuu na ndahví. Ta ndá na ñacaja cuíhná i ñaha, na cán quiahva i comi táhndá chága ñaha nuu jáchi najándahvi i na —ñacachi Zaqueo cán.

⁹ Andá já ñacachi Jesús já xihín ná:

—Quiví viti cája cáhnu ini Ndióxi sahá cuachi da yóho xihín cuachi na vehe da jáchi xihín ña ñacaja da yóho viti náha ña mé a ndaa cándéé ini da Ndióxi tá quiahva ñacaja Abraham. ¹⁰ Ta yehe, da ñachindahá Ndióxi nduu ñayivi naquixi i ndinducú u na xíca nuu cája cuahá cuachi jáchi cacu ndaa ínimá ná cúni —ñacachi Jesús xihín ná ta já ñaquee a cuahan tucu a íchi chí ñuu Jerusalén.

Tá ñasahan in dataa jjuhún da nuú uxu mozo da (Mt. 25:14-30)

¹¹ Ta nani xini johó ñayivi ña cáhan Jesús já ñasacu mé á in quiahva nu ná jáchi cáyati chága mé á ñuu Jerusalén cuahan. Ta mé ñayivi ndíco cuahan cán ñacahán na ña tá xinu coo a ñuu Jerusalén cán chí ivi laá va casahá Ndióxi cacomí a cuéntá sahá ñayivi vatí a juú a já. ¹² Andá já ñacachi Jesús já xihín ná:

—Ñasahin in dataa, da cúu jahyi in rey. In quiví ñaquee da cuahan xíca da ña ndicojo da chuun cacuu da rey. Tá ñandihí ñasacu ini da nuhu da ñuu da. ¹³ Joo tá cámaní nuhu da já ñacana da uxu mozo da. Ta ñasahan da in in jjuhún nuú in in da cán ta mé jjuhún cán cúu á ña ín ndivaha yahvi. Andá já ñacachi da já xihín mozo dá: “Caja ndó ndahvi xihín jjuhún yóho janda quiahva ná xinu quiví ndicó coo tucu u quixi i”, ñacachi da xihín

mozo da. Já naq̄uee da cuanúhu dá. ¹⁴ Ta ndaja coo ñayivi ñundáhyi xícá cándají na da. Sahá ña cán quéa ñachindahá na in táhndá tátō ña ná cachi na xih̄in tátá da ña co cúni toho na ña ná cacomí da cán cuéntá saha ná. ¹⁵ Joo já nandicojo da cán chuun cacuu da rey mé ñundáhyi xícá. Ta tá naxinu coo da cán já nasahnda da chuun ña ná cuhun na cana na mozo da, da nasahan da jiuhún nu cán. Jách̄i cúni da candaa ini da ndaja jiuhún nañehe in in da cán jatá jiuhún da. ¹⁶ Tá nandih̄i já naxinu coo in táhan da nañehe jiuhún cán nu dá já ñacachi da já: “Candehé ndó, xitoho i. Nasahan ndó in jiuhún nuú i ta viti nanduu a uxu”, ñacachi da. ¹⁷ Anda já nanducú ñehe da cúu rey cán tuhun nu dá já ñacachi da já xih̄in dá: “Vaha ndivaha ñacajún xih̄in ña yóho. Náha ña mé a ndaa cúun in mozo vaha jách̄i ñacaja ndihún tá íin ñacachi i xuhún cajún xih̄in jiuhún i vatí loho quéa nasahan i nuun caja chúun. Ta viti caja i ña ná cacomún cuéntá sahá uxu ñuu”, ñacachi rey cán xih̄in dá. ¹⁸ Tá nandih̄i já naxinu coo inga táhan da nañehe jiuhún cán nu dá já ñacachi da já: “Candehé ndó, xitoho i. Nasahan ndó in jiuhún nuú i ta viti nanduu a uhun”, ñacachi mozo cán. ¹⁹ Anda já ñacachi da cúu rey já xih̄in dá: “Vaha ñacajún sahá ña cán quéa caja i ña ná cacomún cuéntá sahá uhun ñuu”, ñacachi rey cán xih̄in dá. ²⁰ Ta tá nandih̄i já naxinu coo inga táhan da cán já ñacachi da já: “Candehé ndó, xitoho i. Yóho íin mé jiuhún nasahan ndó nuú i. Nachicaan vaha i ña nu jáhma i ²¹ sahá ña yíhv̄i i ndohó. Jách̄i cúu ndó in taa cuehe ndivaha. Ta cátóó ndó ndiquehe man̄i uun ndó ñaha. Ta cátóó ndó ña ná caja chúun inga ñayivi já jandá xinu uun

ndó ndiquehe ndó ñaha nañehē ná jatá chuun cája ndó”, ñacachi mozo cán. ²² Anda já nanducú ñehē da cúu rey cán tuhun nu mozo da já ñacachi da já xihín dá: “Co cúun in mozo vaha nuú i. Xihín tuhun cáhun chícáun cuachi jatun jáchi co cúnun caja chúun sahá i. Cáchún ña xini vahún cúu yehe in da cuehe ndivaha ta cátóo i quehe e jiquí jjuhún i vatí co ñacaja chúun i sahá. ²³ Sahá ña cán queá ndá cuéntá queá co ñasahan tóun jjuhún i, dá já. Já queá tá ná ndicó co i já ná ndiquehe e jiquí á nuú na cán, nduu”, ñacachi rey cán xihín mozo da. ²⁴ Tá nandihí já ñacachi tucu rey xihín java ga ñayivi ndíta cán já: “Candaa ndó jjuhún ndáha dá ta quiahva ndó ña nuú da cómi uxu a jan”, ñacachi da cúu rey cán. ²⁵ Anda já ñacachi na ndíta cán já xihín rey: “Candehé ndo, xitoho i. Ndá túni quiahva ri nde jjuhún yóho nuú da sa cómi uxu a cáa jáchi sa cuahá va jjuhún cómi da cáa”, ñacachi na xihín rey cán. ²⁶ Já ñacachi rey cán já: “Mé a ndaa ná cahan i xihín ndo, ña ndá na sa íin ñaha nuu, mé na cán ñehē táhvi ná coo chága ña nu ná. Joo ndá na coo ñaha nuu sahá ña co cája chúun na já queá janda ña loho cómi na ndindaa”, ñacachi rey cán. ²⁷ Ta ñacachi tucu da já: “Cuáhán ndó quehe ndó ñayivi quini, na co cúní yehe, na coo ñaxeen ña ná cacomí i cuéntá sahá na cán já ná quixi na. Ta cahní ndó na ná quivi na nuu táhyí i”, ñacachi rey cán —ñacachi Jesús ndicani a nuú ñayivi.

*Ndihvi Jesús ñuu Jerusalén
(Mt. 21:1-11; Mr. 11:1-11; Jn. 12:12-19)*

28 Tá nandihí naçachi Jesús ña yóho xihín ná já naquehe tucu a íchi xíca cuañan chí ñuu Jerusalén.
 29 Ta tá sa naxinu coo a jini yucu yitó olivo cán nuú ja chá xinu coo a ñuu Betfagé xihín ñuu Betania cán já nañahnda chuun nuú ivi táhan da xíca tuun xihín á cán. 30 Já naçachi a já xihín dá:

—Cuáhán ndo ñuu loho ndácaan jan. Ta tá ná xinu coo ndó jan ndiñehe ndó in búrrō ndíco ndaa jan, rí a ñaha yíi ndaa na. Ndaxí ndó rí ta cañehe ndó rí quixi ndó. 31 Ta ndá na ná ndaça tuhún ndohó ña ndá cuéntá quea ndaxí ndó rí já cachi ndó já xihín ná: “Mé a cúu xitoho nde xíní ñúhú a rí”, cachi ndó xihín ná —naçachi Jesús xihín da cán.

32 Já naquee ndíví da cuañan da. Ta tá quiahva naçachi Jesús coo chí quiahva já ndusa nañahin.
 33 Jáchi nani ndaxí da búrrō cán ndúu da já naçañan mé na xihín jana rí cán saha rí já naçachi na cán já:

—Ndá cuéntá quea ndaxí ndó búrrō jana nde jan —naçachi na cán.

34 Anda já nanducú ñehe da xíca tuun xihín Jesús cán tuhun nu ná já naçachi da já:

—Ndaxí nde rí jáchi mé a cúu xitoho nde, xíní ñúhú a rí —naçachi da.

35 Já naquehe da rí ñehe da cuañan da nu Jesús. Anda já naçojó ñayivi jáhma ná jata rí já najánda na Jesús jata rí. 36 Ta nani xíca búrrō cán cuañan rí xihín Jesús já naçinduu ñayivi jáhma ná íchi nuú yaha rí cán xihín á. 37 Ta yati ñuu Jerusalén, mé nuú ndica yucu naní yitó Olivo cán já naçasahá cáyuhú tóco ndihí na cúu cuéntá mé á cán. Cája cáhnu na Ndióxi xihín ña cájii íní na saha tóco ndihí

ñá náhnu naxini na nacaja Jesús. ³⁸ Já cáchí nā já cáyuhú nā:

—Ndicáhnu nahá ná cacuu da cómi cuéntá saha yo yóho jáchí cúú dá da vaxi yuhú nuu Ndióxi. Viti cájii ini nā ndúu indiví. Cáhnu ná cacuu Ndióxi — cáchí nā cáyuhú nā.

³⁹ Anda já nacachi java nā fariseo ñúhu tañu ñayivi cán já xihin Jesús:

—Maestro, jánani ndó nā ndíco jata ndó yóho ná a cáyuhú cóhó nā —nacachi na xihin Jesús.

⁴⁰ Joo nanducú ñehe Jesús tuhun nu ná já nacachi a já xihin ná:

—Mé a ndaa ná cahān i xihin ndo ña tá ná catáji yuhú nā yóho janda já yuu ndúu jiiñ íchi jan casáhá cayuhú a caja cahnú a yehe —nacachi Jesús.

⁴¹ Tá nacayati chága Jesús ñuu Jerusalén cán ta tá naxini a ñuu cán já nacasáhá táhvi ini a sácu a sahá.

⁴² Já nacachi a já:

—Cúni jánaha i ndohó ndía ndítahan caja ndó já ná coo vaha ínima ndó nu Ndióxi. Joo co cúni toho ndó candaā ini ndó ña. Ta viti a cúu ga candaā ini ndó ña. ⁴³ Jáchí vaxi quivi tá quixi nā co cúni ndohó ta caji nuu na nu ndo ta cani táhan na xihin ndo. Ta ni in xoo a cúu cunu ndó jáchí níí cúú caji nuu nā cán já ná a quée ndó. ⁴⁴ Ta jándihi na saha ndo jáchí cahní nā tóco ndihi ndó, nā ndúu cán. Ta ni in yuu a cándoō jata inga yuu jáchí ña cuyu cacuu ndihi a. Já ndoho ndó jáchí co cándaā ini ndó ña naquixi i jacaçu u ndohó já ná a ndíhi saha ndo —nacachi Jesús.

*Tá naxaxí Jesús nā ndúu jícó ñaha yéhe veñuhu
(Mt. 21:12-17; Mr. 11:15-19; Jn. 2:13-22)*

⁴⁵ Tá naxinu coo Jesús ñuu Jerusalén cán já nandihvi a veñuhu cáhnu ndácaan ñuu cán. Já nacasáhá táxí a na ndúu jícó cán xihín na ndúu xéen cán. ⁴⁶ Jáchi nacija cuehe a xihin ná ta já nacachi a já:

—Já cáhí tuhun Ndióxi: “Vehe mí i cacuu a nuú quixi na caça tahví na nuú i”, cáhí a. Joo ndóhó nandai cuu ndó yóho cája cuíhná ndó nuú ñayivi —nacachi Jesús.

⁴⁷ Ndijáá ní quivi sáhan Jesús veñuhu cáhnu cán jánaḥa tuhun Ndióxi nuú ñayivi. Joo na cúu sacuaḥa nuú jutu xihín na jánaḥa ley Moisés xihín na sacuaḥá ñuu ndúcú na ndá quiahva caja na cahní na Jesús. ⁴⁸ Joo co ñeḥe íní na ndaja caja na cahní na Jesús jáchi tóco ndihi ñayivi cúni na taa johu na nu jánaḥa Jesús.

20

Tá nandaca tuhún na Jesús ñayo sáhan ñamaní nu á jánaḥa ñayivi

(Mt. 21:23-27; Mr. 11:27-33)

¹ Ta ndaja coo in quivi ndácaan Jesús veñuhu cáhnu jánaḥa ñayivi ndaja cuu cacu ndaa ínimá ná já naxinu na cúu sacuaḥa nuú jutu xihín na jánaḥa ley Moisés ta catáhan ri na sacuaḥá veñuhu naxinu coo na xihin ná nu ndácaan Jesús cán. ² Anda já nacachi na já xihin Jesús:

—Ndá saḥa queá jánaḥún ña yóho. Yo já sáhan ñamaní nuun cajún ña cajún yóho —nacachi na cán xihin Jesús.

³ Anda já nanducú ñeḥe Jesús tuhun nu ná já nacachi a já xihin ná:

—Ndáca tuhún ri yehe va ndohó. Cachi ndó xihín i: ⁴ Yo já nachindahá Juan ña ná quixi da caja ndúta dá ñayivi. Á Ndióxi nachindahá da, á ñayivi nachindahá ñahá —nacachi Jesús xihín na cán ndáca tuhún a na.

⁵ Anda já nacasáhá ndítuhún xihín táhan na sacuahá cán já cáchi na já:

—Ndía cachi yó xihín Jesús yóho. Jáchi tá ná cachí ña Ndióxi quéa nachindahá Juan já nducú ñehe Jesús tuhun nu yo já cachi a já xohó: “Ndá cuénta quéa coó naxeen ndó candúsa ndó da, dá já”, cachi Jesús xohó. ⁶ Ta tá ná cachí ñayivi va cúu na nachindahá Juan já ndicuítá ñayivi ta cahní na mí xihín yuu. Jáchi tóco ndihi ñayivi cándaá vaha ini na ña Ndióxi quéa nachindahá Juan jáyaha da tuhun cáhan mé á nuú ñayivi —nacachi xihín táhan na cán.

⁷ Sahá ña cán quéa nacachi na xihín Jesús ña co xíni toho na yo já nachindahá Juan ña ná quixi da caja ndúta dá ñayivi. ⁸ Anda já nanducú ñehe Jesús tuhun nu ná já nacachi a já xihín ná:

—Ta ni yehe a cáxi tuhun i xihín ndó yo já nasahan ñamaní nuú i caja i ña yóho —nacachi Jesús xihín ná.

Sácú Jesús quiahva sahá java mozo, da nacaja quini xihín xitoho da

(Mt. 21:33-44; Mr. 12:1-11)

⁹ Tá nandihí já nacasáhá Jesús cáhan xihín ñayivi ta já nasacu a quiahva yóho nu ná já nacachi a já:

—Nasahin in dataa ta najándeé cuaha dá tó uva. Ta tá nandihí já nasahan ndojó na mé dó uva cán. Anda já naquee da cuahan xicá da cuaha tiempo.

10 Ta tá naxinu coo tiempo jáquee na uva nu dó uva ñaha da cán já nachindahá da in mozo da ña ná cuhun da ndiquehe da uva, rí ndítahan nu dá ndiquehe da. Joo mé na cája chúun too ñúhu dá cán natiin na mé mozo cán ta nacani na da ta já cáa uun da nandicó coo da nacaja na. 11 Tá nandihi já nachindahá mé da xihín ñaha ñúhu cán inga tucu mozo da. Joo quiahva já nacaja ri na xihín da cán va. Nacannahá na xihin dá ta nacani na da. Ta já cáa uun da nachindahá tucu na da nuú xitoho da. Coo ñaha nasahan na nu dá. 12 Ta mé da xihín ñaha ñúhu cán nachindahá tucu da inga mozo da ta quiahva já nacaja ri na xihín da cán va. Najándicuehe na da ta já nataxí na da.

13 "Ta tá nu ndihí já nacahán mé da xihín ñaha ñúhu cán já: "Ña caja i viti quea chindahá i jahyi maní i jáchi cája i cuénta coo toní ñúhú na xihin dá tá ná cuni na da", nacahán mé da xihín ñaha ñúhu cán. Ta tá nandihi já nachindahá da jahyi maní dá. 14 Joo tá naxini na cája chúun too ñúhu dá cán ña vaxi jahyi da já nacachi xihin táhan na cán já: "Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí", nacachi xihin táhan na cán. 15 Anda já natavá na da cúu jahyi xitoho cán jata cutu ta cán nasahní na da —nacachi Jesús.

Anda já nandaca tuhún Jesús ñayivi ndúu cán já nacachi a já xihin ná:

—Á co xini ndó ndía caja da xihín ñaha ñúhu viti.

16 Ña caja da quea quixi da ta cahní ndihi da na

naçaja chúun tóo nu ñúhu dá. Já ndiquiahva da ñúhu dá nuú java ga na já ná caja chúun na nu á —naçachi Jesús.

Tá naçini johó na ndíta cán ña yóho já naçachi ndihi na já:

—A cándeé Ndióxi coo ña jan já —naçachi na cán.

¹⁷ Joo naçandehé Jesús nu ná já naçachi a já:

—Ta viti cachi ndó xihín i ndía cuni cachi tuhun Ndióxi tá cáchi a já:

Mé yuu ña najácana da cávaha vehe, ña cán cúu ña nanduu yuu ndúhu sahá vehe ña ín chága saha, cáchi tuhun Ndióxi.

¹⁸ Ta yehe cúu u tátuhun in tótó cáhnu. Ta ndá na ná yaha ndicava jata tótó cán chí chachi ndihi na. Quiahva já ndihi sahá ñayivi tá co cuni na candúsa na yehe. Ta mé tótó cáhnu cán tá ná yaha ndicava jata in ñayivi chícaji ndihi ñahá a cán. Quiahva já ndihi sahá ñayivi ini indayá tá co cuni na candúsa na yehe —naçachi Jesús.

Ndáç tuhún na Jesús á ndítahan nu ná चाहvi na jjuhún cuénta impuesto

(Mt. 21:45-46; 22:15-22; Mr. 12:12-17)

¹⁹ Chí sa mé hora já cuni na cúu sacuaça nuú jutú xihín na janaça ley Moisés cán tiin na Jesús jáchi naçandaa ini na ña saha mé va na cán sácú Jesús mé quiahva nuú ñayivi cán. Joo coo na tiin na Jesús jáchi nayihví na ñayivi ndúu táa johó nu cáhan Jesús cán. ²⁰ Ña naçaja na quea naçindahá na java daça ña ná cananí da Jesús. Ta ndája da mé dá ña cúu dá ta vaha ndivaha joo coo cúu da tá quiahva ndáa da. Ta xihín ña yóho cuni da cayati da nu Jesús ná candehé da á yaha yúhu á cahan

ndá ñaha ña cuu cuhun da jicó tuhún da mé á nuú da cúu gobernador. ²¹ Sahá ña cán queá nacayati da nu Jesús ta nandaca tuhún da mé á já nacachi da já xihín á:

—Maestro, cándaá ini nde ña cáhan ndó ta jánaha ndó ña ndaa. Ta cándaá ini nde ña tá cáhan ndó sahá in ñaha cája ñayivi cúu á sahá ña sándehe ndó janda ínima ná. Ta cándaá ini nde ña jánaha ndó ña ndaa saha íchi cuénta Ndióxi. ²² Sahá ña cán queá cúni nde cándaá ini nde viti á ndítahan nuú nde चाहवि nde jjuhún cuénta impuesto nuú da cómi cuénta saha yo ñuu Roma, á co ndítahan toho nuú nde caja nde ña —nacachi na cán xihín Jesús.

²³ Joo sa nacandaá va ini Jesús ña cáhvi núu va ini na sahá ña cán queá nanducú ñehe a tuhun nu ná já nacachi a já xihín ná:

—Cándaá cáxi táhyí ini i ña cúni ndó coto ndojó cuití ndó yehe. ²⁴ Jáñaha ndó in táhan jjuhún jan nuú i. Yo nahná ta yo quivi queá ndaa nu á —nacachi a xihín ná.

Já nacachi na já:

—Ñehe a quivi xihín nahná da cómi cuénta sahá yo ñuu Roma —nacachi na xihín á.

²⁵ Anda já nacachi Jesús já xihín ná:

—Ndiquiahva ndó ñaha da cómi cuénta saha ndó ñuu Roma jan nu dá. Ta ndiquiahva ndó nu Ndióxi ña cúu ñaha mé á nu á —nacachi Jesús xihín ná.

²⁶ Chí cóo nacuu caja na jándahvi na Jesús nuú ñayivi ndúu cán jáchi víi nanducú ñehe ndihi Jesús tuhun nu ná. Ta chí johó cátóntó ndihi ñayivi xihín quiahva nanducú ñehe Jesús tuhun nu ná. Chí nacatáji na cán.

Ndáca tuhún na saduceo Jesús á mé a ndaa nditacu tucu ndii

(Mt. 22:23-33; Mr. 12:18-27)

²⁷ Tá nandihí já naquee java na saduceo cuahan na cahan na xihín Jesús. Ta mé na saduceo co cándúsa na ña nditacu tucu na sa naxihí. Tá nasaa na nu ín Jesús já nacachi na já xihín á:

²⁸ —Maestro, nu ley nacyhi Moisés sanahá natahnda chuun ta cáchí a já: “Tá tándaha in dataa xihín ñájíhí da ta tá coó jahyi ña cácu xihín dá ta tá ná xinu quívi quivi da já quéa cáchí ley Moisés ña ndítahan tándaha tucu ñájíhí da xihín da cúu ñani mé ndii cán já ná coo jahyi da cán xihín yuhú nuú ñani da”, já cáchí ley Moisés. ²⁹ Ta viti cuni johó ndó ná cacu nde in quiahva nu ndo. Nasahin usa ñani. Ta da nu cuítí cán natandaha dá. Joo nayaha tiempo naxihí da ta coó toho jahyi da nacacu xihín ñájíhí da. ³⁰ Anda já natandaha tucu ña cuáan cán xihín ñani chí ivi mé ndii cán. Joo naxinu quívi naxihí ri da yóho va ta chí coó jahyi da nacacu xihín ña cán. ³¹ Anda já natandaha da chí uní cán xihín ña. Joo ni da cán ni java ga ñani da coó nacuu cacu jahyi xihín ña. Ndíhusa da natandaha xihín ña ta ndíhusa da naxihí. Joo ni in da coó nacacu jahyi xihín ña. ³² Tá nu ndíhí já naxihí ri mé va ña. ³³ Ña cuni nde candaa ini nde quéa, ndá da cacuu ndusa yí ña cán tá ná xinu quívi nditacu tucu ndii. Jáchí ndíhusa va ñani da cán natandaha xihín ña — nacachi na cán ndáca tuhún na Jesús.

³⁴ Anda já nanducú ñehe Jesús tuhun nu ná já nacachi a já:

—Nani ndúu ñayivi ñuyíví yóho cuití va tándaha

ná. ³⁵ Jáchi ndá na nanditacu tucu ta nañehē táhvi ná coo na indivi já quēa cō tandaha na ta ni cō sáhan toho na jahyi jihí na tandaha ná. ³⁶ Jáchi mé cán cacuu na tátuhun tátō Ndióxi já a quívi ga na. Ta cacuu na jahyi Ndióxi jáchi sa nanditacu na tañu ndii. ³⁷ Ta sa xini yo ña nditacu tucu ndii jáchi já nacachi Moisés sanahá tá nacahyí da sahá ña naxini da tañu tohíñú, dó cándaha ñúhu cáyi cán. Tá nacahan da sahá Ndióxi, nacachi da ña janda viti cája cáhnu Abraham xihín Isaac xihín Jacob mé Ndióxi vatí naxihí na sanahá. ³⁸ Ta ña yóho cúni cachi a ña tácu yíi va Abraham xihín Isaac xihín Jacob vatí sa naxihí yiquí cuñu na. Jáchi tóco ndihi na cúu cuéntá Ndióxi, tácu na nu mé á —nacachi Jesús xihín ná.

³⁹ Anda já nacachi java na jánaha ley Moisés cán já xihín á:

—Vaha va nacahan ndó, Maestro.

⁴⁰ Ta chí cōo nasahan ndeé ga ini na ndaca tühún chága na mé á.

Jánaha Jesús nuú ñayivi ña cúu Cristo taq ta cúu á Ndióxi

(Mt. 22:41-46; Mr. 12:35-37)

⁴¹ Anda já nacachi Jesús já xihín ñayivi ndúu cán:

—Ndávaha cáhí ñayivi ña vaxi Cristo chichi David. ⁴² Ta ndáa ini Salmos ña nacahyí David já nacachi da já:

Ndióxi quēa nacachi já xihín xitoho i:

“Coo xoo cuáha i yóho,

⁴³ janda quiahva ná caja i ña ná cacomún cuéntá sahá na cō cúní yohó”, nacachi Ndióxi, já nacahyí David sanahá.

44 Ndávaha cáchí ña ña vaxi Cristo chichi David joo mé tiempo cán ñacachi David ña cúú á xitoho da —ñacachi Jesús.

Cáhan Jesús sahá cuachi ña jánaha ley Moisés
(Mt. 23:1-36; Mr. 12:38-40; Lc. 11:37-54)

45 Tóco ndihi ñayivi ndúu cán ñaxini johó na tá ñacasáhá Jesús cáchí a xihín ña xíca tuun xihín á já:

46 —Cuéntá coo ndó xihín ña jánaha ley Moisés jáchi cátoó ña cándixi na jahmá nání caca nuu na. Ta cátoó ña cahan toní ñúhú ndivaha ñayivi xihín ná tá xíca nuu na nuú yahvi. Ta tá cuahan ña veñuhu cátoó ña cacoo na nu sácoo ña ín chága saha. Ta tá cuahan ña víco cátoó ña coo vaha na.

47 Ta cándaa na vehe najihí cuáan. Ta tá nandihí cáni ndivaha cája na xíca tahví ña nu Ndióxi jáchi cúni ña jájahvi na nuú ña núu cája na. Mé a ndaa ná cahan i xihín ndo ña ña jánaha ley Moisés yóho cacuu na ña ndoho chága ini caja Ndióxi nu ndihí —ñacachi Jesús.

21

Ña najoco in ña cuáan ndáhví
(Mr. 12:41-44)

1 Ta ndaja coo ndácaan Jesús ini veñuhu cáhnu cán ta sándehe a ndá quiahva táán ña cuicá jiuhún ini sato nu jóco ñayivi jiuhún nu Ndióxi. 2 Ta jári ñaxini a ñaxinu coo in ña cuáan ndáhví ta nataán ña ivi jiuhún ña núu yahvi ini mé sato cán. 3 Anda já ñacachi Jesús já xihín ña xíca tuun xihín á cán:

—Mé a ndaa ná cahan i xihín ndo ña cuaha chága jiuhún ñasahan ña cuáan ndáhví yóho a juú

ga tóco ndihi java ga na cán. ⁴ Jáchi tóco ndihi na java cán sahan na ña yójo nu va na. Joo ña cuáan ndáhvi yóho nasahan ña nu Ndióxi tóco ndihi ña cómi ña catacu ña —nacachi Jesús.

Cáxi tuhun Jesús ña vaxi quivi ndihi sahá veñuhu cáhnu ndácaan Jerusalén cán

(Mt. 24:1-2; Mr. 13:1-2)

⁵ Java ñayivi cán ndítuhún na sahá veñuhu cáhnu ñuu Jerusalén ndíta na. Ta ndítuhún na sahá yuu ndató ndivaha nacavaha veñuhu cán. Ta cáhan na sahá ñaha najoco ñayivi nu Ndióxi ndáa cán. Anda já nacachi Jesús já xihin ná:

⁶ —Vaxi quivi ndihi saha tóco ndihi ña ndíta ndó sándehe ndo yóho. Ta ni janda in yuu a cándo jatá inga yuu ña nditani cacuu tóco ndihi ña yóho —nacachi Jesús xihin ná.

Ña coo tá ná cayati quivi ndihi saha ñuyivi

(Mt. 24:3-28; Mr. 13:3-23)

⁷ Anda já nandaca tuhún na Jesús já nacachi na já xihin á:

—Maestro, ndá ama coo tóco ndihi ña yóho. Ta ndaja coo tá sa nacayati mé quivi cán —nacachi na xihin Jesús.

⁸ Anda já nacachi Jesús já:

—Cuénta coo ndó ta a quiáhva ndó ñamaní jándahvi ñayivi ndohó. Jáchi quixi cuahá ndivaha na cuénta mí i ta cáhan na ña tuhún tá cachi na já xihin ndo: “Yehe cúu Cristo, da nachindahá Ndióxi cacomí a cuénta sahá ñayivi.” Ta cachi na já: “Viti naxinu coo tiempo ndihi saha ñuyivi”, cachi na xihin ndo. Joo coto a cándusa ndó candico ndó jata ná cahun ndo. ⁹ Tá ná cuni johó ndó ña cáni táhan

ñayivi ñuyiví yóho, a cáyihví toho ndó. Jáchí ndúsa já ndítahan coo. Joo cámaní yíi va jáxinu coo quiví ndihi sahá ñuyiví —naçachi Jesús xihín ná.

¹⁰ Anda já naçahan chága Jesús xihín ná já naçachi a já:

—Ñayivi ndúu in nación ndicuíta na caní táhan na xihín na ndúu inga nación ta caní táhan na in ñuu xihín na inga ñuu. ¹¹ Ta quixi cuahá ña taan tá sa naçayati quiví ndihi sahá ñuyiví. Ta quixi tama ndeé. Ta quixi cuehe nuú ñayivi ndúu cuahá ñuu. Ta chí catóntó ndivaha ñayivi cuni na ñaha náhnu chí indiví. Ta yihví ndivaha na tá cuni na java ñaha xituhún ndivaha.

¹² Joo tá cámaní xinu coo quiví coo tóco ndihi ña yóho já ndicuíta ñayivi caja xíxi na xihín ndó, na cándúsa yehe. Ta cañehe na ndohó cuhun ndó ini veñuhu na ta cán caja vii na saha ndo sahá ña cándeé ini ndó yehe. Ta taán na ndohó ini vecaa ta já cañehe na ndohó cuhun ndó cavií saha ndó nuú na cúu jutixia xihín nuú na cómi cuénta sahá ñayivi. Tóco ndihi ña yóho ndoho ndó sahá ña cándeé ini ndó yehe. ¹³ Ta xihín ña yóho cuu ñehe íni ndo çahan ndó sahá i nuú na cán. ¹⁴ Ta a ndícani ini ndó saha ndá tuhun çahan ndó saha mé ndó nuú na cán tá ná xinu ndó nu ná. ¹⁵ Jáchí mí i quiahva i tuhun nu ndo ta ndaja ndíchí i jini ndo já ná cuu nducú ñehe vaha ndó tuhun nuú na cán. Ta chí a cuú quee vaha yuhú na cán xihín ndo. ¹⁶ Joo cuahá ñayivi jicó tuhún na ndohó. Ta chí janda tátá ndo á ñani ndó á táhan ndó á na xini táhan xihín ndo, na cán cacuu na jicó tuhún ndohó cuahá tañu. Ta java táhan ndó, na cándeé ini yehe quivi ndó caja na. ¹⁷ Ta ndijáá ñayivi ñuyiví candají na ndohó

sahá ña cándeé ini ndó yehe. ¹⁸ Joo ni in ñaha a ndóho ndó anda ni in ijí jini ndó a ndíhi saha. ¹⁹ Ta tá coó nacuitá ndo xihin tóco ndihi ña núu caja na xihin ndo já xinu ndó canduu ndó indivi anda ama cáa quivi.

²⁰ Tá ná cuni ndó ña nacava tiyivi soldado jata ñuu Jerusalén ndúu da, xíní ñúhú candaa ini ndó ña sa naxinu quivi ndihi sahá ñuu cán. ²¹ Ña ndítahan caja ndó mé quivi cán quéa cunu ndó cuhun ndó chí yucu tá ndúu ndó chí estado Judea. Ta ndá ndó, na ndúu ñuu Jerusalén xíní ñúhú jándacoo ndó ñuu jan ta cunu ndó cuhun ndo. Ta ndá ndó, na ndúu yucu, a ndícó coo ga ndó ndihvi ndó ñuu Jerusalén yóho. ²² Jáchi mé quivi já cacuu a quivi ndoho ini ñayivi já ná xinu coo tóco ndihi nuú ña nacachi tuhun Ndióxi coo sanahá ndivaha. ²³ Ndáhví nacuu najihí tá ñúhu jahyi na mé quivi já. Ta ndáhví nacuu na tá ñéhe ndaa na na valí táhan ña chíchi yii. Jáchi ndoho ndivaha ini ñayivi ndúu ñuyivi mé quivi já sahá ña xójo ndivaha ini Ndióxi xihin na cán. ²⁴ Java ñayivi quivi na caja soldado ta java na cató ná já cañehe na na cuhun na ndijáá chí ñuu tóho canduu na jáchi ndihi sahá ñuu Jerusalén yóho. Ta já quixi na ñuu tóho ta casahá na cahnda na chuun nuú ñuu Jerusalén yóho janda quiahva ná xinu coo quivi cacu ini Ndióxi ña ná quee na tóho cán cuhun na.

²⁵ 'Anda já cuni ndó ña náhnu ndivaha chí nuú candii xihin nuú yoo xihin nuú quimi viti. Ta ñayivi ñuyivi yóho yihvi ndivaha na ta chí a candaa ini na ndía caja na jáchi quini ndivaha tacu nuú ndicojo tañuhú. ²⁶ Ta chí janda quivi tóo ñayivi

xihín ña yihví na jáchi casáhá ndicani ndivaha ini na saha tóco ndihi tondóhó vaxi ñuyívi yóho. Jáchi janda mé candii xihín yoo xihín quimi ndiquiji nuu a. ²⁷ Anda já cuni ndó yehe, da nachindahá Ndióxi nduu ñayivi, quixi i tañu vico xihin tóco ndihi ndéé cáhnu i ta chí ndiyihvi ndaa mé nuú quixi i. ²⁸ Tá ná casáhá yaha tóco ndihi ña cáhí i xihin ndo yóho, xíní ñuhú ndindeé ini ndó ta ndiñehe ndó nuu ndó jáchi sa nacayati quivi jácacu Ndióxi ndohó cuhun ndó coo ndó indivi —nacachi Jesús xihin ná.

*Sácú Jesús quiahva sahá titó ñuhú
(Mt. 24:32-35; Mr. 13:28-31)*

²⁹ Anda já nasacu a in quiahva nu ná já nacachi a já:

—Xíní ñuhú candehé ndo ndá quiahva cája chúun in titó ñuhú, á ndá yito nacuu. ³⁰ Tá ná cuni ndó ña jandá johu cana núma do já candaa ini ndó ña nacayati tiempo javi. ³¹ Ta quiahva já tá ná cuni ndó ña sa cúu yaha tóco ndihi ña cáhí i xihin ndo yóho já candaa ini ndó ña sa nacayati quivi casáhá Ndióxi cacomí a cuénta sahá ñayivi.

³² Mé a ndaa ná cahan i xihin ndo ña cuni ñayivi ndúu mé tiempo já yaha tóco ndihi ña nacachi i xihin ndo já quivi na. ³³ Mé a ndaa ña cúu indivi xihin ñundáhyi yóho ndihi sahá joo tuhun nacahan yehe xihin ndo a ndíhi toho sahá jáchi coo tá coo tá in nacachi i xihin ndó coo.

³⁴ Cuénta coo ndó. Xíní ñuhú candati tiahva ndó quivi quixi i ndiquehe e ndohó. A cáca nuu ndó yóho cáa ña caja ndó ña cuni yiquí cuñu ndó. A cóho ndó caca nuu ndó. Ta a ndíhi nahá ini ndó

ndicani ini ndó sahá ñaha ñuyívi yóho. ³⁵ Tá ná xinu quívi quixi i cacuu a tátuhun tá sácú jehé in dataa in trampa nuú in quítí sahá ña cúní da tiin da rí. Mé quítí cán co xíní rí ndáchí ín jehé trampa tiin ñahá cán. Quiahva já co xíní ñayivi ndúu ñuyívi ndá quívi quixi tucu u ñuyívi yóho. ³⁶ Xíní ñúhú canduu tiahva ndó quívi quixi i. Níi tiempo xíní ñúhú caçá tahví ndo nu Ndióxi já ná ndindeé ini ndó tá ná quixi tóco ndihi ña yóho nu ndo ta já ná cuu xinu coo vaha ndó indiví já ná cuu coo víi ndo nuú yehe, da nachindahá Ndióxi nduu ñayivi — naçachi Jesús jánaḥa nuú ñayivi cán.

³⁷ Nini quívi naṣahin Jesús ini veñuhu cáhnu jánaḥa tuhun Ndióxi nuú na cán. Ta tá ñuú já sahan quíji a yúcu yitó Olivo cán. ³⁸ Ndijáá ní quívi naha chá naxinu coo ñayivi veñuhu cáhnu cán jáchi cúní na cuni johó na ña jánaḥa Jesús nu ná.

22

Jándique táhan na tuhun na ña cahní na Jesús

(Mt. 26:1-5, 14-16; Mr. 14:1-2, 10-11; Jn. 11:45-

53)

¹ Ta yati tandaa víco pascua tá xíxi ñayivi pan ña co quée yusá naṣiaa xihin. ² Já naçasáhá na sacuaḥa nuú jutú xihin na jánaḥa ley Moisés ndúcú na ndaja caja na cahní na Jesús. A cuú caja na cahní tívi na ña jáchi yíhví na canahá ñayivi xihin ná.

³ Joo ndaja coo tiñáhá sacuaḥa nandeta nuu rí ínimá in táhan uxu ivi da xíca tuun xihin Jesús. Mé da cán naní da Judas ta Judas Iscariote cáhan na xihin dá. ⁴ Ta naṣahan Judas cahan da xihin na sacuaḥa nuú jutú ta xihin na sacuaḥa nu policía

ndáá veñuhu. Ta nanditúhún dā xihín ná ña cuu caja da jicó túhún dā Jesús ta ndiquiahva ñahá dá mé á nu ná. ⁵ Xihín ña yóho ñacajii ínī ña cán ta ñasahan ña tuhun na nu Judas ña quiahva na jiuhún nu dá. ⁶ Ta ñacandúsa Judas caja da ña chí ñacasáhá dā ndúcú dā ndaja caja da ndiquiahva da Jesús nuú ña cán tá coó ñayivi ndúu xihín á.

Xíjini Jesús vicó pascua xihín ña xica tuun xihín á (Mt. 26:17-29; Mr. 14:12-25; Jn. 13:21-30; 1 Co 11:23-26)

⁷ Ñatandaa mé víco tá xixi na pan ña co quée yusá ñaxiaa xihín. Mé víco yóho ñasacaja na ña tá nu cuiá ta sáhnī ña ndicachi válí jóco ña nu Ndióxi. ⁸ Mé quivi já ñasahnda Jesús chuun nu Pedro xihín nu Juan já ñacachi a já xihín dá:

—Cuáhán ndó caja ndíví ndo ña cajíní vicó pascua —ñacachi a xihín dá.

⁹ Anda já ñacachi dā cán já xihín á:

—Yo vehe cúni ndó cuhun nde ná caja ndíví nde ña cuxú.

¹⁰ Anda já ñanducú ñehe Jesús tuhun nu dá já ñacachi a já:

—Tá ná quihvi ndó ñuu Jerusalén jan já cuni ndó in dataa ta ndójo da in yoo ticuif cuahan dā. Candico ndó jata dá cuhun ndo janda quiahva cuni ndó ndá vehe quihvi da. ¹¹ Ta já cuhun ndó cahan ndó xihín mé dā xihín ñaha vehe cán já cachi ndó já xihín dá: “Dā jánaha ndehe cúú dā cáchí xuhun: Ndáchí íin nuú coo i cajíní i vicó pascua xihín ña xica tuun xihín i.” ¹² Anda já jánaha mé dā cán in cuarto cáhnu ña cánúu jini véhe

pisu n̄inu. Sa íin tiahv̄a va ña. Cán caja ndíví ndó ña cajíni —ñacachi Jesús.

¹³ Anda já naquee ndíví da cán cuah̄an da. Ta tá íin ñacachi Jesús xih̄in dá coo quiah̄va já ndusa ñasah̄iin. Ta chí ñacaja ndíví da tóco ndihi ña cajíni na vicó pascua.

¹⁴ Tá naxinu coo hora cajíni na já ñasacoo Jesús xih̄in tóco ndihi na xíca tuun xih̄in á nu mesa.

¹⁵ Anda já ñacachi Jesús já xih̄in ná:

—Sa xíca ndivaha ini i cajíni i vicó pascua yóho xih̄in ndó nani íin tóo i xih̄in ndo jáchi vaxi quiví quivi i. ¹⁶ Jáchi mé a ndaa ná cah̄an i xih̄in ndo janda ná xinu quiví cacomí Ndióxi cuéntá sah̄á ñayivi anda jávi cajíni tucu u vicó pascua xih̄in ndo —ñacachi Jesús xih̄in ná.

¹⁷ Anda já ñatiin a in vaso nu ñúhu tó uva ta ñandiquiah̄va ndixah̄vi nu Ndióxi. Ta já ñacachi a já xih̄in na xíca tuun xih̄in á:

—Coho ndó dó ñúhu ini vaso yóho ta cahnda java ndó dó nu táhan ndó. ¹⁸ Jáchi a ndíco coo ga i coho i tó uva janda quiah̄va ná xinu coo quiví cacomí Ndióxi cuéntá sah̄á ñayivi —ñacachi Jesús xih̄in ná.

¹⁹ Tá ñandih̄i ñatiin a pan ta ñandiquiah̄va ndixah̄vi nu Ndióxi sah̄á. Anda já ñasah̄nda java ña já ñasah̄an ña nuú na xíca tuun xih̄in á cán já ñacachi a já xih̄in ná:

—Mé pan yóho cúú á tátuhun yiquí cuñu i jáchi ndiquiah̄va i mí i quivi i sah̄á ndihi ndó. Xíní ñúhú caja ndó ña yóho ña ná ndicuhun ini ndó ña naxih̄i i saha ndo —ñacachi Jesús xih̄in ná.

²⁰ Tá sa ñandih̄i naxijíni na ta já ñatiin a vaso nu ñúhu tó uva ta já ñacachi a já:

—Dó ñúhu ini vaso yóho cúú dó tátuhun ñíí i jáchi cahní ña yehe ta cuita ñíí i saha ndihi ndó. Ta xihín ña yóho xinú coo nuú tuhun nasahan Ndióxi nuú ñayivi sanahá tá ñacachi a jácacu a ñayivi.

²¹ Cuni johó vaha ndó ná cahan i xihin ndó. Nu mesa yóho ín coo ña jíco túhún yehe. ²² Jáchi janda sanahá nasacu ini Ndióxi ña ndítahan ndoho ini yehe, ña ñachindahá mé á nduu ñayivi. Joo ndáhví ñacuu ña jíco túhún yehe —ñacachi Jesús.

²³ Xihín ña ñacachi Jesús yóho ñacasáhá ña xíca tuun xihin á cán ndáca tuhún táhan na saha ndá ña cúú ña sácú ini cuhun jíco túhún ñahá.

Ndítuhún ihvi xihin táhan ña xíca tuun xihin Jesús

²⁴ Tá ñandihí já ñacasáhá ndítuhún ihvi xihin táhan ña xíca tuun xihin Jesús cán sahá ndá ña cúú ña ín chága saha. ²⁵ Sahá ña cán quéa ñacachi Jesús já xihin ndihí ña cán:

—Ndijáá ñuyíví sáhná rey chuun nuú ñayivi tá quiahva cúni mé dá. Ta jári cúni ña ña ná cachi ñayivi saha dá ña cúú dá ña cája vaha. ²⁶ Joo coo ndítahan coo ña cán tañu mé ndó. ña ndítahan caha ndó quéa tá in ndó cúni ndó cacuu ndó ña ín chága saha, xíní ñúhú jánuu ndáha ndó mé ndó tátuhun ña loho chága nu ndíhi ndó. Ta ndá ña cúni cahná chuun, xíní ñúhú cacuu ña tátuhun in ña cája ndíví nu mesa xitoho ña. ²⁷ Mé ndó sa cánda vaha ini ndó ña ín chága sahá ña ín coo nu mesa a juú ga ña cája ndíví ñahá. Joo yehe ñajánuu ndáha i mí i ta ñandu u tátuhun in ña cája ndíví nu ndó.

²⁸ Ndóhó cúú ndó ña nasanduu tuun xihin i nu tóco ndihí ña ihvi ñaquixi nuú i. ²⁹ Sahá ña cán quéa tá quiahva ñacaja tátá i ñamaní xihin i ña

ná cacomí i cuéntá sahá ñayivi quiahva já caja i ñamani xihin ndó ³⁰ ña ná nditútú ndó canduu ndó xihin i tá ná cacomí i cuéntá sahá ñayivi. Ta já ná cuu caja vií ndo sahá na ñaqui xi ndíhuxu ivi táhdá na ñaqui xi chichi Israel —ñacachi Jesús xihin ná.

Cáxi tūhun Jesús ña chijehé tūhun Pedro ña xini da mé á

(Mt. 26:31-35; Mr. 14:27-31; Jn. 13:36-38)

³¹ Anda já nandicahan Jesús já ñacachi a já xihin Pedro:

—Simón, cuni johoh vahún. Jáchi naxica Satanás, mé tiñahá sacuahá ñamani ña ná coto ndojó rí tóco ndihi ndó tá quiahva jáxixi na trigo. ³² Joo sa naxica tahví i nu Ndióxi saha yóhó, Simón já ná a jándacoún ña cándéé inún yehe. Ta tá sa nandicó coo inún xihin ña cajún jan, ndítahan chindeún java ga na cándéé ini yehe já ná coo ndacú na íchi cuéntá mí i —ñacachi Jesús xihin dá.

³³ Anda já nanducú ñehe Pedro tūhun nu Jesús já ñacachi da já xihin á:

—Candehé ndo, xitoho i. Yehe sa ín tiahva i cūhun i vecaa xihin ndo. Ta janda ná cahní na yehe xihin ndo tá cūni na jáchi sa ín tiahva vi —ñacachi da xihin Jesús.

³⁴ Já ñacachi Jesús já xihin dá:

—Candehé Pedro ná cahan i ña ndaa xuhun. Mé quiví viti tá camani cana chéle já uní tañu chijehé tūhún sahá i ta cahún ña co xini tohún yehe —ñacachi Jesús xihin dá.

Cáxi tūhun Jesús ña sa cáyati hora ndoho ini a

35 Tá nandihí já nandaca tuhún Jesús na xíca tuun xihín á cán já nacachi a já xihín ná:

—Jihna nachindahá i ndohó cuhun ndó cahan ndó tuhun Ndióxi ta nacachi i xihín ndo ña ná a cañehe ndó yátí ni jiuhún ta ni inga ndusa a cañehe ndó cuhun xihín ndo. Á nandimaní ñaha nu ndo tá nasahan ndo já —nacachi Jesús xihín ná.

Já nacachi na já:

—Ni in ñaha coó nandimaní nuú nde —nacachi na.

36 Anda já nacachi tucu a já xihín ná:

—Joo viti coó ga ña cán coo. Viti cáchí i xihín ndo ña tá íin yátí nu ndo, xíní ñúhú cañehe ndó ña cuhun ndo. Cañehe ndó jiuhún ndo tá ná quee ndó cuhun ndo. Ta tá coó machiti nu ndó, xíní ñúhú jicó ndó jahmá ndeé ndo já cueen ndó machiti ña ná coo tiaha ndó. 37 Jáchi sanahá nacahyi a nu libro yii Ndióxi ta sahá yehe nacahan tá nacachi a já: “Nacachi ñayivi cúú dá ta quini sahá ña cán quea nachitahan na da xihín ñayivi quini.” Tóco ndihí ña nacahyi nuú tuhun Ndióxi sahá yehe sanahá xíní ñúhú xinu coo a viti —nacachi Jesús.

38 Anda já nacachi na xíca tuun xihín á cán já:

—Candehé ndo, xitoho nde. Yóho ñéhe nde ivi machiti —nacachi na.

—Sa íin vaaha —nacachi Jesús xihín ná.

*Cuahan Jesús Getsemaní caca tahví a nu Ndióxi
(Mt. 26:36-46; Mr. 14:32-42)*

39 Tá nandihí já naquee Jesús cuahan yucu yíto Olivo nu sá sahan tuun a caca tahví a nu Ndióxi. Ta já ndíco ndihí na xíca tuun xihín á cán jatá cuahan na. 40 Ta tá sa naxinu coo na cán já nacachi a já xihín ná:

—Caça tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó — nācachi Jesús xihín ná.

⁴¹ Tá nandihí já nātavá xóo Jesús mé á tañu nā cán já nāsañan tátuhun in quiahva nu xínu coo in yuu tá jání yó ña xihín ndáha yo. Quiahva já nācaxíca mé á tañu nā cán já nācaxítí a xíca tahví a nu Ndióxi. ⁴² Já nācachi a já:

—Tátá Ndióxi, á cuu caja ndó ñamaní já ná a ndóho i ña ihvi ndivaha ña vaxi nuú i ndoho i. Joo ná coo tá ín cúní mé ndó ná a cóo toho ña cúní yehe —cáchi Jesús xíca tahví a.

⁴³ Anda já nācanáha in tátō Ndióxi indiví já naxínu a sáhan tuhun ndeé ini Jesús. ⁴⁴ Ta nācasáhá ndóho ndivaha ini Jesús jáchi nācacuéha ini a. Saha ña cán quēa nānducú ndeé chága ví a xíca tahví a nu Ndióxi. Ta chí ndícaa mé teen á nu ñúhu ta dó cán cúú dó tátuhun nīi cúyu nu ñúhu.

⁴⁵ Ta tá nandihí nāxíca tahví a nu Ndióxi já nāndaça ndichí a já nāquee a cuañan nu ndúu nā xíca tuun xihín á cán. Ta nānditahan mé á nā ndúu na quíji nā. A juú quiahva cándíi ini na sahá ña cán nānaá ini na nāquiji nā. ⁴⁶ Anda já nācachi a já xihín ná:

—Ndá cuéntá quēa quíji ndo ndúu ndó. Cuáhán ndacoo ndó ta caça tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nācachi Jesús xihín ná.

Tá natiin na Jesús

(Mt. 26:47-56; Mr. 14:43-50; Jn. 18:2-11)

⁴⁷ Janda cáhan chá va Jesús xihín nā xíca tuun xihín á cán cándichí a já naxínu cuahá ndivaha

ñayivi nu in a. Ta in táhan da uxu ivi xíca tuun xihín á, da naní Judas cán, da cán cúú da ndáca ñayivi vaxi da. Ta ñacayati da tatí yúhu dá sajóho Jesús. ⁴⁸ Andá já ñacachi Jesús já xihín dá:

—Judas, tatí yúhun sajóho i tátuhun da quíhvi ini yehe. Joo xihín ña cájún jan ndíquiahvún yehe ndahá na co cúní yehe, da ñachindahá Ndióxi nduu ñayivi —ñacachi Jesús.

⁴⁹ Tá ñaxini tóco ndihi na ndúu xihín Jesús cán ña cúu já ñacasáhá ndáca tuhún na mé á já ñacachi na já:

—Á cúní ndó, xitoho nde ña ná ndicuíta nde xihín machiti cani táhan nde xihín ná —ñacachi na.

⁵⁰ Joo in táhan da xíca tuun xihín Jesús cán najándicuehe da in da cúu mozo da sacuahá nuú ju tu cán jáchi ñachitúhun dá johó xoo cuáha da.

⁵¹ Joo já ñacachi Jesús já xihín ná:

—Sa in vaha. A cáni táhan ndó xihín ná —ñacachi Jesús.

Tá ñandihí já ñacani ndaa ndáha mé á johó mozo cán já ñandaja vaha mé á da. ⁵² Ta ñacasáhá cáhan Jesús xihín na sacuahá nuú ju tu cán xihín na sacuahá nu policia ndáá veñuhu xihín na sacuahá veñuhu cán, mé na ñacasaa tiin na Jesús já ñacachi a já xihín ná:

—Cája ndó xihín i tátuhun cája na xihín taa cuihná jáchi ñaqueta ndó vaxi ndó tiin ndó yehe xihín machiti ta xihín yíto. ⁵³ Joo coó a ná caja toho ndó xihín i tá ñasahin i tañu ndó veñuhu cán. Joo núná nu ndó viti caja núu ndó jáchi ñasahan Ndióxi ñamaní ña ná tiin ndó yehe. Jáchi ñacuaá viti ta

chindeé tiñáhá sacuaḥa ndohó caja ndó ña núu —
 naçachi Jesús xihín na cán.

Tá nachijehé tūhun Pedro ña xini da Jesús
 (Mt. 26:57-58, 69-75; Mr. 14:53-54, 66-72; Jn.
 18:12-18, 25-27)

⁵⁴ Anda já natiin na Jesús. Já ñeḥe na a cuahan
 na vehe da cúu sacuaḥa nuú juṭu cán. Ta xíca xíca
 ndíco Pedro jaṭa ná cuahan da. ⁵⁵ Ta tá naxinu coo
 ñayivi cán yuhú yéḥe da cúu sacuaḥa nuú juṭu cán
 já nandicahmi na ñúhu nasacoo na xítúni na. Já
 naxinu coo ri Pedro nasacoo da tañu na cán xítúni
 da. ⁵⁶ Joo ndaja coo in ñáñáḥa cája chúun vehe
 juṭu sacuaḥa cán naxini ñá ín coo da xítúni da yávi
 núhu cán. Ta naçasáhá sándeḥé ñá nu dá já cáchi ñá
 já:

—Da xíca tuun xihín Jesús cúu ri da ín coo yóho
 va —naçachi ñá cán.

⁵⁷ Joo naçasáhá Pedro chíjehé tūhun da já
 naçachi da já:

—Candehé, ñáñáḥa. Co xini toho i ndá da cúu da
 jaṅ —naçachi Pedro xihín ñá cán.

⁵⁸ Chá va ta naxini inga daṭaa Pedro ta já naçachi
 da já xihín dá:

—In táhan da xíca tuun xihín Jesús cáa cúu ri
 yóho va —naçachi da cán xihín Pedro.

Anda já naçachi Pedro já:

—Uḥun. A juú toho táhan na cán cúu yeḥe —
 naçachi da.

⁵⁹ Ta tá sa nayaha tátūhun in hora já naçachi
 inga daṭaa já:

—Mé a ndaa da xíca tuun xihín Jesús cúu ri da
 yóho va jáchi cúu dá da estado Galilea.

60 Anda já nacachi Pedro já xihín dá:

—Co xini toho i ndá saha cahun —nacachi Pedro.

Tá chí mé hora já nani cahan Pedro xihín dataa cán já nacana chéle. 61 Anda já nandicoto nihni Jesús nasandehé a nu Pedro. Tá nandicuhun ini Pedro sahá tuhun nacachi Jesús xihín dá tá camani tiin na a tá nacachi a já: “Mé quivi viti tá camani cana chéle já uni tañu chijehé tuhún sahá i ta cahun ña co xini tohún yehe”, nacachi a xihín dá. 62 Anda já naqueta Pedro cuahan da já nacasáhá sácu ndivaha da.

Tá sácu ndaa na Jesús

(Mt. 26:67-68; Mr. 14:65)

63 Ta java dataa, da ndúu ndáá Jesús cán nacasáhá da sácu ndaa da ña. Ta nacani ñahá da. 64 Nachicaji da nuu á ta nacani da jahnda nuu á já nacasáhá da ndaca tuhún da mé á já cáchí da já xihín á:

—Cachi yo já nacani jahnda nuun —cáchí da xihín á.

65 Ta cuahá chága nuú ña núu cahan na xihín á ña canahá na xihín á.

Ndája ndichí na Jesús

(Mt. 26:59-66; Mr. 14:55-64; Jn. 18:19-24)

66 Ta tá sa nativi já nataca na sacuahá nuú na Israel cán xihín na sacuahá nuú jutú cán xihín na jánaha ley Moisés cán viti. Já ñéhe na Jesús cuahan na cavií sahá nuú na cán. Ta tá sa nanditútú ndihi na cán ndúu na já ndaca tuhún na Jesús já nacachi na já xihín á:

67 —Caxi tuhun xihín nde á cúún Cristo, da nachindahá Ndióxi cacomí cuéntá sahá ñayivi —nacachi na xihín á.

Anda já nacachi Jesús já xihín ná:

—Tá ajan ná cachi i xihín ndo ta chí a cándusa toho ndó yehe. 68 Ta cája i cuéntá a cáhan ndó xihín i tá ná ndaca tuhún i ndohó. Ta cája i cuéntá ni a cándusa ndó janí ndó yehe. 69 Joo viti sa natandaa quiví cuhun yehe, da nachindahá Ndióxi nduu ñayivi ta coo i xoo cuáha Ndióxi indivi jáchi íin ndée mé á caja tóco ndihi ñaha —nacachi Jesús xihín ná.

70 Anda já nacasáhá tóco ndihi na cán ndaca tuhún na mé á já nacachi na já:

—Á jivi ndusa yóhó cúún in túhún jiní já jahyi Ndióxi, dá já —nacachi na.

Anda já nacachi Jesús já xihín ná:

—Ajan. Jivi cúú u tá íin cáchí ndó jan —nacachi Jesús.

71 Anda já nacasáhá tóco ndihi na cán cáhan na já nacachi na já:

—Co ndítahan ndinducú chága yó ñayivi cacuu testigo nuú ña cáhan da yóho jáchi sa xíni johó í ña cáhan da ta chícáan da cuachi jatá mé dá —nacachi na cán.

23

Tá nandiquiahva na Jesús ndáha Pilato

(Mt. 27:1-2, 11-14; Mr. 15:1-5; Jn. 18:28-38)

1 Anda já nandaca ndichi ndihi na cán já ñéhe na Jesús nasahan na nu Pilato. 2 Ta cán nacasáhá na chícáan na cuachi jatá já nacachi na já sahá:

—Natiin nde da yóho jáchi xíca nuu da jándivaa da ñayivi ñuu nde. Cáchi da ña co ndítahan toho nuú nde चाहवि nde जिहून cuéntá impuesto nuú da cómi cuéntá saha yó ñuu Roma. Ta cáchi da ña mé dá cúú dá Cristo, da chindahá Ndióxi cacomí cuéntá sahá ñayivi. Ta cáchi da cúú dá in rey — nacachi na cán xihín Pilato.

³ Andá já nandaca tuhún Pilato Jesús já nacachi da já xihín á:

—Á mé a ndaa cúún in rey, da cómi cuéntá sahá na Israel —nacachi da cán xihín Jesús.

Andá já nacachi Jesús já xihín dá:

—Ajan. Jivi cúú u tá quiahva cáchi ndó jan.

⁴ Andá já nandicahan Pilato xihín na sacuaaha nuú jutú cán ta xihín ñayivi ndúu cán já nacachi da já:

—Co ndíñehe mí vi ndá cuachi quéa nacaja da yóho —nacachi Pilato.

⁵ Joo ñayivi cuaha cán nacasáhá cáyuhú cóhó chága na já cáchi na já:

—Mé da jan naxica nuu da jándivaa da tóco ndihi ñayivi estado Judea xihín ña jánaha da nu ná. Ta janda Galilea nacasáhá da jándivaa da ñayivi. Ta viti naxinu da ñuu nde cája da já —nacachi ñayivi cáyuhú na.

Tá ñéhe na Jesús cuahan na nu Herodes

⁶ Tá naxini johó Pilato ña nacachi ñayivi cán já nandaca tuhún da na á cúú Jesús da estado Galilea.

⁷ Ta tá nacachi na ña ndusa cúú Jesús da estado Galilea já nachindahá Pilato Jesús ña ná cuhun a nuú Herodes, da cúú gobernador nuú ñayivi estado Galilea. Jáchi mé tañu já nashijn tóo da

ñuu Jerusalén. ⁸ Tá naxini Herodes Jesús já nacajii íni da jáchi sa janda jihna cuni da Jesús cuni da. Jáchi cuahá tañu nandicani ñayivi nu dá sahá ña cája Jesús. Ta cuni da cuni da ña ná caja Jesús in ñaha xituhún. ⁹ Ta cuahá ndivaha ñaha nandaca tuhún Herodes cán Jesús joo coó nanducú ñehe a tuhun nu dá. ¹⁰ Ta tañu ñayivi cán ñuhu ri na sacuahá nuú jutú xihín na jánahá ley Moisés ta chí a juú quiahva ndúcú ndéé na chícaan na cuachi jata Jesús. ¹¹ Anda já nacasáhá Herodes cája xíxi da xihín Jesús ta quiahva já cája ri na cúu soldado da cán xihín á. Ta najácandixi na Jesús xihín jahmá lándá tátuhun jáhma sándixi in rey. Nacaja na já xihín á jáchi cuni na cuacu ndaa ñahá na. Tá nandihí já nachindahá tucu Herodes Jesús ña ná cuhun a nu Pilato. ¹² Ta chí mé quivi já nandique táhan máni Herodes xihín Pilato jáchi jihna co cuni táhan toho da, nduu.

*Sácú ini na ndaja caja na cahní na Jesús
(Mt. 27:15-26; Mr. 15:6-15; Jn. 18:39-19:16)*

¹³ Anda já najánditaca Pilato na cúu sacuahá nuú jutú cán xihín na jutixia xihín java ñayivi. ¹⁴ Já nacachi da já xihín ná:

—Mé ndó ñehe ndó da yóho nacasaá da nuú i. Ta cáchí ndó ña xíca nuu da jándivaa da ñayivi. Joo sa naxini ndó ña nandaja ndíchí i da nu ndo. Ta ni in tuhún toho cuachi táhan ña cáhan ndó saha jan coó nanditahan i nu dá. ¹⁵ Ta ni Herodes coó cuachi ná ndiñehe jata dá sahá ña cán quéa nanducú ñehe da da nuú i. Cuni johó vaha ndó: Coó saha cúu á ña quivi da. ¹⁶ Ña caja i quéa jándoho i ini da. Anda já janí vi da cuhun da —nacachi Pilato cán xihín ná.

17 Tañu víco pascua cán ñasah̄iin costumbre nu Pilato janí da in táhan da ñúhu vecaa ña ná candoo vaha da nuú ñayivi. 18 Sahá ña cán quea ñacasáhá cáyuhú tóco ndihi ñayivi nu dá já cáchí na já:

—Cahní ndó da jan ta janí ndó Barrabás nuú nde —cáchí na cáyuhú na.

19 Mé Barrabás yóho ndácaan da vecaa jáchi najátaca cuaha dá ñayivi ta nandicuita da xihín na sacuahā ñuu Jerusalén cán ta cúu dá da sáhní ndii. Sahá ña cán quea ndácaan da vecaa. 20 Joo cúni Pilato janí da Jesús sahá ña cán quea ñacahan tucu da xihín ñayivi. 21 Joo ví ga ví ñacasáhá na cán cáyuhú cóho na nu dá já cáchí na já:

—Cata caa ndó da ndica crúxu. Cata caa ndó da.

22 Ta anda já ñacahan tucu Pilato ña cúu uni xihín ná já ñacachi da já:

—Coó toho ña núu nahá ñacaja toho da yóho. A cúu cahnda i chuun ña ná cahní na da jáchi coó cuachi da. Ña caja i quea cahnda i chuun ña ná jándoho na ini da. Anda já janí ví da —ñacachi Pilato.

23 Joo ví ga ví ndúcú ndée na cán cáyuhú na ña ná cata caa na Jesús ndica crúxu. Ta xihín ña ndúcú ndée na cán cahan na ta ndúcú ndée ri na sacuahā nuú jutú cán cahan na. Sahá ña cán quea ñatahnu ini Pilato. 24 Ta ñacandúsa da caja da ña cúni na cán xihín Jesús. 25 Ta najaní da Barrabás jáchi da cán ñacahan mé ná saha ña ná janí dá. Ta mé Barrabás yóho ñasandacaan da vecaa sahá ña najándivaa da ñayivi ta sahá ña ñasahní da ndii. Anda já nandiquiahva da Jesús nu ná ña ná caja na tá cúni mé ná xihín á.

*Tá n̄acata caa na Jesús ndica crúxu
(Mt. 27:32-44; Mr. 15:21-32; Jn. 19:17-27)*

²⁶ Ta tá ñéhe na Jesús cuah̄an na cata caa na a já naxini na in da naní Simón, da ñuu Cirene vaxi da ndihvi da ñuu Jerusalén. Ta já najácuhun ndáha ná da ña ná ndacojo da crúxu nuú taca Jesús cán. Ta nandico da Jesús cuah̄an da.

²⁷ Ta a juú quiahva cuahá ñayivi ndíco jatá cuah̄an na. Ta cuahá najihí sácu ndivaha na ta cáyuhú na cuah̄an na jatá jáchi táhnda ini na sahá. ²⁸ Joo nandicoto nihni Jesús nu ná já n̄acachi a já xih̄in ná:

—Najihí, na ñuu Jerusalén, a cuácu toho ndó sahá yehe. Saha mé va ndó ta sahá jahyi ndó viti ndítahan cuacu ndó. ²⁹ Jáchi vaxi quivi já casahá ñayivi cachi na já: “Tahví n̄acuu najihí, na coó n̄acacu jahyi. Ta tahví n̄acuu na coó jahyí chíchí”, cachi na jáchi ndóho ndivaha ini na. ³⁰ Mé tiempo já casahá ñayivi cachi na já: “Vá ná cuyu yúcu jatá yo já ná quivi”, cachi na. Ta cachi na xih̄in java yúcu: “Chijehé ndó ndehe”, já cachi na sahá ña ndóho ndivaha ini na. ³¹ Candehé ndo ndá quiahva jándoho na ini i ta cúu u tátuhun in yitó cuí, dó tácu. Ta cája xíxi na xih̄in i joo xíxi chága caja na xih̄in ndóhó jáchi cúu ndó tátuhun in yitó íchí —n̄acachi Jesús xih̄in na cán.

³² Ta tá ñéhe na Jesús cuah̄an cata caa na a ndica crúxu já ñéhe ri na ivi da cúu da quini cuah̄an na cata caa na da já ná quivi da xih̄in á. ³³ Ta tá naxinu coo na in nuú naní lásá yiquí jíní ndii cán n̄acata caa na a ndica crúxu. Ta n̄acata caa ri na ivi da quini cán va: in da xoo cuáha Jesús ta inga

da xoo íti a. ³⁴ Ta tá cáta caa na Jesús ndica crúxu já ñacachi a já:

—Tátá Ndióxi caja cáhnu ini ndó sahá ña cája ñayivi yóho xihín i. Jáchi co xini na ndia cája na — ñacachi Jesús.

Ta ndaja coo java soldado cán ñacasáhá da sáíquí da saha jáhma Jesús já quéa ndá da ná quee vaha ndiquehe da jáhma á. ³⁵ Ta ñayivi ndúu cán sándehe na nu tácaa Jesús ndica crúxu nani na cúu jutixia ñasacujta na ndúu na sácu ndaa ñahá cán já cáchi na já:

—Najácau da java ga ñayivi. Ta viti ná jácau da mé dá tá mé a ndaa cúu dá Cristo, da ñacaxi Ndióxi cacomí cuéntá sahá ñayivi —cáchi na sácu ndaa ñahá na.

³⁶ Ta jári java soldado sácu ndaa da Jesús ndúu da. Ta ñacayati da cán nu Jesús já ñachiñee da vino, dó iyá yuhu á ña ná coho a do. ³⁷ Ta já cáchi da já cáyuhú da nu á:

—Tá ta mé a ndaa cúun rey, da cómi cuéntá sahá na Israel chindeé mún já ná a quívun —cáchi da.

³⁸ Ta ñachindaa na in tabla ndica crúxu yati jiní Jesús ta nu mé tabla cán ñacahyí na: “Da yóho cúu rey nuú na Israel.” Ta mé ña yóho ñacahyí na ña tuhun griego, ña cáhan na nación Grecia xihín tuhun latín, ña cáhan na ñuu Roma xihín tuhun hebrero, ña cáhan na Israel viti.

³⁹ Ta in táhan da quini tácaa ndica inga crúxu yati jiní a cán ñacasáhá da cánahá da xihín á. Já cáchi da já:

—Tá mé a ndaa cúun Cristo, da ñachindahá Ndióxi cacomí cuéntá sahá ñayivi chindeé mún já

ná a quívún. Ta chindeé ndehe já ná a quíví nde —cá chí da.

⁴⁰ Joo inga táhan da quini tácaa inga xoo jín a cán nacasáhá da jánani da da cáhan xihín Jesús cán já nacachi da já xihín dá:

—Á co yíhví tohún Ndióxi. Jáchi in cúú yo ndóho iní yóho ⁴¹ joo mé Jesús yóho coó toho cuachi nacaja da. Ta mé cuití ví ndítahan ndoho iní ña ná chahví sahá cuachi nacaja í —nacachi da cán jánani da inga da tácaa cán.

⁴² Tá nandihí já nacachi da já xihín Jesús:

—Jesús, caja ndó ñamaní ndicuhun ini ndó sahá i tá ná casáhá ndó cacomí ndó cuéntá sahá ñayivi —nacachi da xihín Jesús.

⁴³ Anda já nacachi Jesús já xihín dá:

—Mé a ndaa ná cahan i xuhun ña mé quivi víti cuhún coún xihín i indiví —nacachi a xihín dá.

Tá naxihí Jesús

(Mt. 27:45-56; Mr. 15:33-41; Jn. 19:28-30)

⁴⁴ Ta tátuhun caxivi já nacanaá ní cúú ñuyíví. Ta janda caa uní sahini já nacasáhá nandiyehé tucu. ⁴⁵ Nanaá nuú candii. Ta janda já nandatá java ndaa jáhma ndeé ña tácaa veñuhu cáhnu ñuu Jerusalén ña sáji nuu nuú yí ndivaha. ⁴⁶ Anda já nacayuhú cóhó Jesús já cá chí a já:

—Tátá Ndióxi, ndáha mé ndó jándacoo i ínima i.

Ta tá nacachi a ña yóho já naxihí va.

⁴⁷ Ta ndaja coo da sáhdá chuun nuú soldado cuéntá Roma cán tá naxini da tóco ndihi ña nayaha yóho já nacasáhá cája cáhnu da Ndióxi já nacachi da já:

—Mé a ndaa táhyí coó toho cuachi da yóho —
naçachi da.

⁴⁸ Ta tóco ndihi ñayivi nasanduu cán, na naxini nuú naxihí Jesús jandá johó cáni na yica ndíca na sahá ña táhnda ini na saha Jesús já cuanúhu va na. ⁴⁹ Joo tóco ndihi na xíní táhan xihín Jesús naçandoo na ndíta xíca na sándehe na. Ta tañu na cán nasanduu ri najihí táhan na naquixi xihín á janda estado Galilea cán.

*Tá nachicaan na yiquí cuñu Jesús ini cáva
(Mt. 27:57-61; Mr. 15:42-47; Jn. 19:38-42)*

⁵⁰ Ta ndaja coo nasahiin in dataa naní José, da ñuu Arimatea ña ndácaan estado Judea cán. Ta cúú dá in ta va, da cája ña ndaa cuití va. Ta cúú da in táhan na cómí cuénta sahá na Israel. ⁵¹ Mé José yóho coó natahan ini da xihín ña naçaja java ga na cán jáchi ndáti da casaa quivi cacomí Ndióxi cuénta sahá ñayivi. ⁵² Ta nasahan da cahan ndahví da xihín Pilato ña ná ndiquiahva da yiquí cuñu Jesús nu dá. ⁵³ Ta chí nasahan Pilato ñamaní nu dá chí nasahan da najánuu da yiquí cuñu Jesús ndíca crúxu cán. Já nachitíví ñahá da xihín jáhma va ta já nachicaan ñahá da ini in yávi ndácaan ndíca cáva. Ta ni in túhún toho ndíi a ñáha chícaan na ini mé cáva cán. ⁵⁴ Mé quivi cán nasacuu a quivi cája ndíví ñayivi ñaha vehe na jáchi ja chá cacuu a quivi ndíquehe ndée ná sahá ña cán quea ndíhi ini na jáxinu na chuun cája na.

⁵⁵ Ta najihí, na nasandico jata Jesús janda tá naquixi a chí estado Galilea cán nasahan na sándehe na ndíca cáva nuú najáqueta nuu na yiquí cuñu Jesús cán. ⁵⁶ Ta tá nasaa na vehe na já naçaja

ndíví nā perfume xihín java ga ñaha támi sáhan ña ná jándicuchu na yiquí cuñu Jesús. Ta inga quiví itaan nandiquehe ndée ná tá quiahva nasahnda Ndióxi caja na janda sanahá.

24

Tá nanditacu tucu Jesús

(Mt. 28:1-10; Mr. 16:1-8; Jn. 20:1-10)

¹ Ta tá sa nayaha quivi ndiquehe ndée ná ta naha chá quivi domingo já naquee tucu najihí cán cuahan na nuú nachicaan na yiquí cuñu Jesús ini cáva cán. Já ñéhe na perfume, dó nacaja tiahva na cán. Ta ndáca táhan java ga najihí xihin ná cuahan na. ² Ta tá naxinu coo na cán já naxini na ña coó ga yuu ndájí ndaa yuhú cáva nuú nasandacaan yiquí cuñu Jesús. ³ Anda já naquihvi na ini cáva cán joo coó ga yiquí cuñu Jesús nanditahan na. ⁴ Ta chí nayihví na ta co xini na ndía caja na. Ta jonáa va naxini na ndíta ivi dataa yati jin ná. Ta a juú quiahva ndató yéhe jáhma ndíxi da cán. ⁵ Ta chí a juú quiahva yíhví najihí já nacandayi na janda quiahva naxinu jini ná nu ñúhu. Anda já nacachi dataa cán já xihin ná:

—Co ndítahan toho ndinducú ndo in da tácu tañu nu sánduu ndii. ⁶ Coó toho Jesús íin yóho jáchi sa nanditacu va. Xini ñúhú ndicuhun ini ndó ña nacachi a xihin ndo tá nasahin a estado Galilea. ⁷ Mé á cúú á da nachindahá Ndióxi nduu ñayivi ta sa nacachi a xihin ndo ña ndiquiahva na mé á ndahá ñayivi quini. Ta nacachi a xihin ndó ña cata caa na a ndica crúxu ta tá ná xinu uní quiví já nditacu tucu a —nacachi dataa cán.

⁸ Anda já nandicuhun ini najihí cán ña ñacachi Jesús xihín ná. ⁹ Chí ñaquee na cuahan na já nandicaní ndihi na sahá ña yóho nuú na uxu in ñaxica tuun xihín Jesús xihín nuú java ga na ndúu cán viti. ¹⁰ Mé najihí cán, na ñasahan cáxi tuhun ña yóho nuú na apóstol cán ñasacuu María, ñá ñuu Magdala xihín Juana xihín María, ñá cúu náná Jacobo xihín java ga najihí. ¹¹ Joo na apóstol, na ñaxica tuun xihín Jesús cán ñacahán na ña cuéntó uun va queá. Sahá ña cán queá coó ñaxeen na candúsa na ña ñacachi najihí cán xihín ná.

¹² Joo ndaja coo ñaqueta Pedro xínu da cuahan da sándehe da ini cáva nuú ñachicaan na yiquí cuñu Jesús cán. Ñaxini da jáhma vaha ña ñasativí a cán joo coó toho yiquí cuñu a. Ta chí ñacatóntó da ñaquee da cuanúhu dá vehe da.

Cátahan Jesús cuahan xihín ivi na cuahan chí ñuu Emaús
(Mr. 16:12-13)

¹³ Ta mé quivi já ivi táhan na cúu cuéntá Jesús ñaquee na cuahan na in ñuu naní Emaús. Mé ñuu cán ñéhe táhan tátuhun uxu in kilometro xihín ñuu Jerusalén. ¹⁴ Ta ndítuhún na cán cásahan na saha tóco ndihi ña ñacuu ñuu Jerusalén cán. ¹⁵ Ta nani ndítuhún na cásahan na já ñacayati Jesús nu ná já ñacasáhá xíca mé á xihín ná cuahan na. ¹⁶ Ta vatí sándehe na cán nu Jesús joo coó ñacuu ndicuni na mé á. ¹⁷ Anda já ñandaca tuhún Jesús na cán já ñacachi a já:

—Ndía ndítuhún ndó cásahan ndo. Ta ndavaha cácuéha ini ndó cásahan ndo —ñacachi a xihín ná.

18 Já in táhan na cán, da naní Cleofas nanducú ñehe da tuhun nu á já nacachi da já:

—Níí cúú va nandicuíta nuu tuhun sahá ña nacuu ñuu Jerusalén tañu quiví yóho. In túhún yóhó tañu na ndúu cán cúú da co xini ña nayaha —nacachi da.

19 Anda já nacachi Jesús já xihin ná:

—Ndía nacuu, vaha.

Já nacachi na cán já xihin á:

—Naquixi in da naní Jesús chí ñuu Nazaret ta nasacuu da in profeta cáhnu ndivaha jáchi cuahá ndivaha ña náhnu nacahan da. Ta cuahá ndivaha ña náhnu nacaja da nu Ndióxi xihin nuú ñayivi.

20 Joo na sacuahá nuú jutu xihin na jutixia ñuu nde natiin na mé Jesús ta já nandiquiahva na da ña ná cahni na da ta já nacata caa na da ndica cruxu.

21 Joo mé nde nacahan nde ña mé Jesús cán cacuu da da ndati nde chindeé da ndehe, na Israel yóho já ná a cája xixi ga na ñuu Roma xihin nde, nacahan nde. Joo nandihí va viti jáchi sa nayaha uní quiví naxihí da cán. 22 Vatí naqueta java najihí tañu nde yóho najáyihví na ndehe jáchi naha chá nasahan na nuú nanduxu Jesús cán. 23 Ta cáhí na ña coó ga yiquí cuñu Jesús ndacaan cán. Sahá ña cán quea naxinu na nuú nasanduu nde ta nandicani na nuú nde ña nacanáha java táto Ndióxi nu ná ta nacachi na ña tácu va Jesús. 24 Ta java táhan da xica tuun xihin nde cán nasahan da sándehe da ini cáva cán ta chí já ndusa cáa tá quiahva cáhí najihí. Ta co mé Jesús naxini na —nacachi na cán xihin Jesús.

25 Anda já nacachi Jesús já xihin na cán:

—Ñayivi tóntó ndivaha cúú ndó. Jáchi yancá ndivaha já xinu ini ndó candúsa ndó ña ndaa ña

naçahan na profeta sanahá. ²⁶ Á co cándaá ini ndó ña jihna ñúhú nanditahan nuú da cúu Cristo ndoho ini da ta tá sa nandihi já ndiñehe jícó Ndióxi da já ndacojo da chuun cacomí da cuéntá sahá ñayivi —naçachi Jesús.

²⁷ Anda já naçasahá ndícani a nu ná ña naçahyi nuú tuhun Ndióxi nu cáhan saha tóco ndihi ña ndítahan ndoho da cúu Cristo. Naçasahá ndícani a janda libro naçahyi Moisés sanahá janda quiahva naxinu a nu tóco ndihi libro ña naçahyi na profeta sanahá.

²⁸ Ta tá naxinu coo na ñuu nuú cuahan na cán já naçaja Jesús tátuhun yáha saa cuahan. ²⁹ Joo mé na cán naçaja ndúsa ná xihin á ña ná coo tóo a xihin ná. Já naçachi na já xihin á:

—Yóho candoo ndó coo tóo ndó jáchi sa nahini cuí va ta ja chá cuaá —naçachi na xihin á.

Anda já naquihvi Jesús ini vehe ña candoo a xihin ná. ³⁰ Ta tá nasacoo a nu mesa xihin ná já natiin a in pan já nandiquiahva ndixahvi nu Ndióxi sahá. Ta nasahnda java ña já nasahan ña nu ná. ³¹ Ta chí ivi laá nanuna xini túni ná ta já nandicuni na mé á ña cúu á Jesús. Joo ivi laá najándiñúhú a mé á nu ná. ³² Anda já naçachi xihin táhan na já:

—Íchi quéa cájii ndivaha iní tá nandicani Jesús tuhun Ndióxi nu yo tá vaxí íchi xihin á —naçachi xihin táhan na cán.

³³ Chí ivi laá naquehe tucu na íchi ña ndicó coo tucu na ñuu Jerusalén. Tá naxinu na cán nandiñehe ná ña ndítútú ndihuxu in táhan na naxica tuun xihin Jesús cán ndúu na xihin java ga

na ndúu cán. ³⁴ Anda já nacachi na cán xih̄in ndíví na yóho:

—Mé a ndaa táhyí nanditacu tucu Jesús, xitoho í. Ta naxini Simón mé á —nacachi na.

³⁵ Anda já nacasáhá ndíví na cán ndícani na ña nasandaca táhan na xih̄in Jesús nasahan na. Ta nandicani na ña nandicuni na mé á nani nasahnda java mé á pan ña cuxu na.

*Náha Jesús mé á nuú na naxica tuun xih̄in á
(Mt. 28:16-20; Mr. 16:14-18; Jn. 20:19-23)*

³⁶ Ta nani ndítúhún yij ná ndúu na já naxinu coo Jesús nandaca ndichi a mahñú na cán já nacahan Ndióxi á xih̄in ná já nacachi a já:

—Ná caja Ndióxi ña ná coo vaha ini ndó.

³⁷ Joo nayihví na cán ta nacahan na ña cúu á in ínimá ndii va. ³⁸ Joo já nacachi Jesús já:

—Ndá cuéntá quéa yíhví ndo. Ta ndá cuéntá quéa co cándusa ndó ña cúu yehe Jesús. ³⁹ Candehé ndó ndahá i ta candehé ndó sahá i. Sa mé yehe cúu vj. Cani ndaa ndáha ndó yehe ta candehé vaha ndó yehe. Jáchi in ínimá ndii coó toho yiquí cuñu a tá quiahva sándehe ndó ña íin yiquí cuñu yehe —nacachi Jesús xih̄in ná.

⁴⁰ Ta nani cáhan Jesús xih̄in ná já nacasáhá náha ndáha á xih̄in sahá nu ná. ⁴¹ Joo cámaní yii candúsa na cán ña cúu mé á Jesús jáchi nacatontó na ta cájii ndivaha ini na ña cán quéa nacachi tucu Jesús já xih̄in ná:

—Ndá ñaha íin nu ndó ná cuxu u —nacachi Jesús xih̄in ná.

⁴² Anda já nasahan na in túhun tiyacá nayata nu á xih̄in in ñimá ñuñu nu á. ⁴³ Já natiin a ña ndáha

ná já naxixi a ña nani sándehe ná a. ⁴⁴ Tá nandihí já ñacachi a já xihín ná:

—Sa nayaha tá íin ñacachi i xihín ndó jihna. Sa naxinu çoo tá íin ñacahyí Moisés xihín na profeta sanahá sahá ña ndítahan ndoho i. Ta jári David tá ñacahyí da libro Salmos já ñacahan ri da cán va sahá ña ndoho i —ñacachi a xihín ná.

⁴⁵ Anda já ñacaja Jesús ña ná ndinuna xíní túní ná já ná candaa ini na ña cúní cachi tuhun Ndióxi cán. ⁴⁶ Ta ñacachi a já xihín ná:

—Janda sanahá ñacahyí ña ndítahan quivi yehe, da cúú Cristo, da ñachindahá Ndióxi cacomí cuéntá sahá ñayivi. Joo ñacahyí ri ña ndítahan nditacu tucu u quiví uní. ⁴⁷ Ña cán quéa ndítahan nuú ñayivi caca nuu na çahan na tuhun vaaha sahá i níí cúú ñuyiví já ná ndicó çoo ini ñayivi ta jándacoo na cuachi cája na. Anda já caja cáhnu ini Ndióxi sahá ndihí cuachi na. Ta janda ñuu Jerusalén xíní ñúhú ñayivi casahá na çahan na tuhun vaaha sahá i ta já cuhun na janda ndijáá ñuyiví. ⁴⁸ Ta ndóhó cúú na naxini ndaja cáa ña ñandoho i ña cán quéa ndítahan nu ndó cuhun ndó çaxi tuhun ndó tóco ndihí ña yóho nuú ñayivi. ⁴⁹ Cuni johó vaaha ndó jáchi chindahá i ínimá yíi Ndióxi já ná cañuhu a ini in in ndó. Jáchi quiahva já ñacachi Ndióxi, tátá i tá ñacahan tuhun a nu ndo. Joo ndítahan canduu ndihí ndó ñuu Jerusalén yóho janda quiahva ná ndicutú ndaa ínimá ndo xihín ndée Ndióxi ña quixi indiví —ñacachi Jesús xihín ná.

*Tá nandaa Jesús cuahan indiví
(Mr. 16:19-20)*

⁵⁰ Anda já ndáca Jesús na cán nasahan na xihin á yuhú ñuu Betania. Ta nandiñehe a ndáha á já nacaja yii á na. ⁵¹ Ta tá cája yii á na já natavá xóo a mé á já nandaa cuahan indiví. ⁵² Tá nandihi nacaja cáhnu na cán Jesús já cávatá ndivaha na nandicó coo na ñuu Jerusalén. ⁵³ Ta ní tiempo nasanduu tuun na veñuhu cáhnu cája cáhnu na Ndióxi. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f